OʻZBEKISTON RESPUBLIKASI OLIY VA OʻRTA MAXSUS TA'LIM VAZIRLIGI

OʻZBEKISTON DAVLAT JAHON TILLARI UNIVERSITETI ALISHER NAVOIY NOMIDAGI TOSHKENT DAVLAT OʻZBEK TILI VA ADABIYOTI UNIVERSITETI

Gulnoz Xalliyeva

QIYOSIY ADABIYOTSHUNOSLIK

Toshkent «Akademnashr» 2020 UOʻK: KBK:

Qiyosiy adabiyotshunoslik yoʻnalishidagi tadqiqotlar keng qamrovli tahlilni amalga oshirishni taqozo etadi. E'tiboringizga havola qilinayotgan qoʻllanmada qiyosiy adabiyotshunoslik metodologiyasiga oid eng muhim ilmiy-nazariy tushunchalar yoritilgan. Qoʻllanma filologiya yoʻnalishidagi barcha talaba, magistr va tadqiqotchilarga moʻljallangan.

Mas'ul muharrir:

B.Karimov - filologiya fanlari doktori, professor

Taqrizchilar:

A.Qosimov – filologiya fanlari doktori, professorU.Joʻraqulov – filologiya fanlari doktori

Oʻzbekiston Respublikasi Oliy va oʻrta maxsus ta'lim vazirligining 2019-yil 27-dekabrdagi 1186-son buyrugʻi bilan 5120900 – Oʻzbek-ingliz tarjima nazariyasi va amaliyoti ta'lim yoʻnalishi talabalari uchun oʻquv qoʻllanma sifatida nashrga tavsiya etilgan.

Oʻquv qoʻllanma Alisher Navoiy nomidagi Toshkent davlat oʻzbek tili va adabiyoti universiteti Ilmiy kengashining 2019-yil 28-avgustdagi 1-sonli qarori bilan nashrga tavsiya etilgan.

ISBN

© Gulnoz Xalliyeva «Qiyosiy adabiyotshunoslik» © «Akademnashr», 2020

KIRISH

Fanning maqsad va vazifalari

Qiyosiy adabiyotshunoslik yoki adabiy komparativistika ikki va undan ortiq adabiy hodisaning qiyoslanishiga asoslangan fan yoʻnalishidir. Xalqaro ijtimoiy, madaniy va adabiy aloqalar kundan kunga rivojlanayotgan zamonamizda qiyosiy adabiyotshunoslik kelajagi yorugʻ fan yoʻnalishlaridan biridir.

Har qanday qiyosiy tadqiqotda adabiy hodisalarning mushtarak va oʻziga xos jihatlari aniqlanadi. Bu esa adabiyotlararo umumiy nazariy qonuniyatlarning yuzaga kelishida asos boʻlib xizmat qiladi.

Fanning maqsadi talaba, magistr va barcha tadqiqotchilarga komparativistika, qiyosiy adabiyotshunoslik metodologiyasi haqida nazariy ma'lumotlarni yetkazish, badiiy asarlarni qiyosiy tadqiq qilish usullarini tushuntirish, bu boradagi bilimlarini takomillashtirishdir. Shuningdek, «...adabiy hodisalar (tasviriy vositalar, badiiy asar, yozuvchilarning adabiy merosi, adabiy maktablar, janrlar va h.k.)ning tipologik va genetik mohiyatini aniqlash, tarixiy fenomen yoki konkret-tarixiy shartlanganligini hisobga olmasdan, adabiy fakt sifatida adabiy hodisaga tegishli boʻlgan ichki qonuniyatlarini namoyon qilishdan iborat»¹.

Fanning vazifasi qiyosiy-tarixiy metod va uning asoschilari, asosiy tushunchalari; makro va mikrokomparativistika; Sharq va Gʻarb adabiy aloqalari, tarjima tanqidi, badiiy matnning qiyosiy tahlili mezonlari kabilar haqida nazariy bilim berish va tadqiqotchilarda adabiy hodisalarni qiyoslash va chogʻishtirish koʻnikmalarini hosil qilishdan iborat.

¹Дюришин Д. Теория сравнительного изучения литературы. – М.: Прогресс, 1979. – С.69.

Mazkur fanni oʻzlashtirish davomida talaba, magistr va tadqiqotchilar:

- qiyosiy tadqiq metodologiyasi va uning asosiy tushunchalarini izohlay olishi;
- qiyosiy adabiyotshunoslikka oid asosiy adabiyotlarni va ularning qisqacha mazmunini bilishi;
- tarjima, tarjima turlari, tarjima tanqidi haqida umumiy tasavvurga, original va tarjimani qiyoslashga oid muayyan bilimga ega boʻlishi;
- qiyoslash orqali adabiy hodisalarning umumiy va xos tomonlarini aniqlash, poetika, adabiy aloqalar va adabiy ta'sir masalalarini tahlil qilish boʻyicha malakalarni egallashi lozim.

Qiyosiy adabiyotshunoslik, badiiy asarlarni qiyosan oʻrganish metodologiyasi va tamoyillari boʻyicha Yevropa, Rossiyada juda koʻp darslik va oʻquv qoʻllanmalar yaratilgan. Ular adabiy komparativistikaning turli xil masalalariga bagʻishlangan. Ammo oʻzbek adabiyotshunosligida bu borada hanuz darslik yaratilmagan. Shuningdek, qiyoslash metodining yaxlit nazariyasi, metodologiyasi va metodikasi ishlab chiqilmagan. Qiyoslash usulining tahlil, sintez, induksiya, deduksiya va hokazolarga munosabati va oʻzaro aloqasi borasida muayyan toʻxtamga kelinmagan. Nimani, qachon, nima bilan, nima uchun qiyoslasa boʻladi, kabi savollarga oʻzbek adabiyotshunosligining zamonaviy nazariyasi bizga toʻliq va aniq javoblar bermagan.

D.Bahronovaning ispan tilidagi, A.Qosimov, A.Hamroqulov, S.Xoʻjayevlar birgalikda tayyorlagan oʻzbek tilidagi oʻquv qoʻllanmalarini bu boradagi dastlabki qadam sifatida baholash mumkin¹. Mazkur qoʻllanmalarda sohaning taraqqiyot bosqichlari, asosiy adabiy aloqa turlari hamda qiyosiy tahlil masalalari yoritilgan.

Oʻzbekistonda har yili «Qiyosiy adabiyotshunoslik, chogʻishtirma tilshunoslik va tarjimashunoslik» (10.00.06) ixtisosligi boʻyicha oʻnlab ilmiy tadqiqotlar qilinayotganiga qaramay, oʻquv-metodik manba yaratish masalasi dolzarb boʻlib qolmoqda. Natijada qiyosiy adabiyotshunoslik metodologiyasini yaxshi oʻzlashtirmasdan turib, ilmiy ishlar yuzaga kelmoqda. Bu esa komparativistika yoʻnalishidagi tadqiqotlarning umumiy saviyasiga ta'sir qilmoqda.

Aynan shu ehtiyoj tufayli mazkur oʻquv qoʻllanma yaratildi va asosiy e'tibor qiyosiy adabiyotshunoslik metodologiyasiga qaratildi. Bundan tashqari, qiyosiy adabiyotshunoslik mohiyatini yorqin misollarda koʻrsatish maqsadida Oʻzbekistonda amalga oshirilgan ilmiy ishlar roʻyxati va ulardan ayrim namunalar ham berildi. Shuningdek, jahon adabiyotshunosligida tanilgan komparativist olimlar va ular yaratgan ilmiy asarlar haqida ham qisqacha axborot berildi.

Albatta, oʻz fikrlarimizni yoritishda bizdan oldin bu borada bildirilgan Yevropa, Rossiya, oʻzbek olimlarining nazariy qarashlariga tayandik. Ayniqsa, N.Konrad, M.Jirmunskiy, A.Dyurishin, I.Neupokoyeva, A.A.Kokorin kabi olimlarning fikr mulohazalari biz uchun metatekst vazifasini bajardi. Shuning uchun bizga qadar qiyosiy adabiyotshunoslik nazariyasi va metodologiyasini shakllantirgan barcha olimlarga oʻz minnatdorchiligimizni bildiramiz.

¹ Bakhronova D. Literatura comparada. – Tashkent: Turon, 2019; Qosimov A., Hamroqulov A., Xoʻjayev S. Qiyosiy adabiyotshunoslik. – Toshkent: Akademnashr, 2019.

1-mavzu:

FILOLOGIK KOMPARATIVISTIKA: MAZMUNI VA MOHIYATI

Reja:

- 1.1. Filologik komparativistika haqida tushuncha
- 1.2. Adabiy komparativistikaga xos xususiyatlar
- 1.3. Qiyosiy adabiyotshunoslik fan sifatida

Tayanch tushunchalar: komparativistika, qiyosiy adabiyot-shunoslik, qiyosiy-tarixiy metod, D.Dyurishin, A.N.Veselovskiy, N.Konrad, I.Neupokoyeva, makro va mikrokomparativistika.

Komparativistika (lot.comparativus – qiyosiy) turli xil jarayonlarning qiyosiy oʻrganilishiga asoslangan fan yoʻnalishi boʻlib, boshqa sohalar qatorida til va adabiyotni ham qamrab oladi.

Mazkur termin birinchi marta Fransiyada («littérature comparée», 1817), keyin Angliyada («Comparative literature» 1886), Germaniyada (jurnal nomlanishida «Zeitschrift für vergleichende Literaturgeschichte», 1887–1910), Rossiyada (1889 yil A.N.Veselovskiy tadqiqotlarida) qoʻllanila boshlangan.

Filologik komparativistika til va adabiyot sohasida olib boriladigan qiyosiy tadqiqotlardir. Shu jihatdan filologik komparativistika ikkita katta guruhga ajratiladi:

- 1. Lingvistik komparativistika, ya'ni qiyosiy tilshunoslik.
- 2. Adabiy komparativistika qiyosiy adabiyotshunoslik.

Lingvistik komparativistika, bir-biriga yaqin boʻlgan va yaqin boʻlmagan tillarni turli yoʻnalishlarda qiyosan oʻrganishni

maqsad qiladi. «Tillarni qiyosiy nuqtayi nazardan tadqiq qilish, ularga tarixiylik jihatidan yondashish kabilar qiyosiy-tarixiy tilshunoslikning maydonga kelishiga, tilshunoslikning alohida, mustaqil fan sifatida qat'iy tan olinishiga zamin yaratdi»¹. Adabiy komparativistika barcha adabiy hodisalarning mushtarak va oʻziga xos jihatlarini oʻrganadi va ular uchun umumiy boʻlgan qonuniyatlarning yuzaga kelishiga zamin yaratadi.

Adabiy komparativistikaga xos xususiyatlar

Adabiy komparativistikaning **obyekti** adabiy jarayondir. Badiiy adabiyotni oʻrganish bilan bogʻliq barcha masalalar (mas., asar syujeti va kompozitsiyasi, mazmun va shakl, badiiy asar tili, yozuvchi uslubi va h.k.) adabiy komparativistikaning predmetini tashkil etadi. Sintetizm, mentallik, retseptiv estetika, intertekst(lik), paratekst(uallik), metatekst, gipertekst, arxitekst, imagologiya, vorislik, semiotika, tipologiya, motiv boshqa atamalar qiyosiy adabiyotshunoslikning asosiy tushunchalari hisoblanadi.

Ilmiy adabiyotlarda ta'kidlanganidek, asarning syujeti va kompozitsiyasi, asar tili, motivlar, tarjima, asar poetikasi, yozuvchi mahorati, oʻzga xalqning boshqa bir xalq adabiyoti haqidagi qarashlari, ya'ni, adabiy retsepsiyasi (oʻzga xalq adabiyotini qabul qilish jarayoni) qiyosiy adabiyotshunoslik obyekti boʻlishi mumkin. (masalan, «Navoiy rus kitobxoni nigohida», «Pushkin va oʻzbek kitobxoni», «Fitratshunos yaponlar» kabi mavzular) Shuningdek, ayni badiiy asarga olimlarning turlicha qarashlarini (masalan, «Boburnoma» haqida oʻzbek, rus, yapon, nemis olimlarining ilmiy izlanishlari), xalqaro

¹ Batafsil garang: Расулов Р. Умумий тилшунослик. – Тошкент, 2010. – Б.78 – 115.

adabiy aloqalar, oʻzaro ta'sir, an'anaviylik va novatorlik, turli xil san'at (musiqa, rassomchilik, haykaltaroshlik, kino) turlarining adabiyotga ta'siri kabi masalalarni ham qiyosan oʻrganish mumkin.

Sharqshunos N.I.Konrad (1891–1970) qiyosiy adabiyotshunoslik obyekti boʻlishi mumkin boʻlgan 5 ta jihatga e'tiborni qaratadi: 1.Tarixiy umumiylikka ega millat adabiyotlari qiyosi (mas., fors va tojik). 2. Turli xalqlar adabiyotida tipologik xususiyatlar qiyosi (mas., XIX asr klassik realizmi). 3. Turli makon va zamondagi xalqlar adabiyoti qiyosi (mas., rus va oʻzbek adabiyoti). 4. Bir-biriga bogʻliq boʻlmagan holda tipologik xususiyatlarga ega boʻlgan adabiyotlar qiyosi (mas., ritsarlik romanlari va yapon harbiy epopeyalari). 5. Xalqlararo adabiy aloqalar qiyosi. Bu oʻrinda olim adabiy ta'sir va adabiy aloqalarga alohida urgʻu beradi¹.

V.M.Jirmunskiyning (1891–1971) ta'kidlashicha, yozuvchi ijodini unga ta'sir oʻtkazgan milliy va xalqaro adabiy an'analar bilan qiyosan oʻrganish ham juda katta metodik ahamiyatga ega boʻlib, adibning ijodiy individualligini, milliy va jahon adabiyoti taraqqiyotida tutgan oʻrnini aniqlashga yordam beradi².

Germaniyada nashr qilingan monografiyada komparativistika fani 1) adabiyot nazariyasi komparativistikasi (Dichtungs-Literaturtheorie); 2) adabiyot tarixi komparativistikasi; 3) komparativ intermedial tadqiqotlar (komparatistische Intermedialitätsforschung / Comparative Arts); 4) komparativ madaniyatshunoslik (komparatistische Kulturwissenschaft)

¹ Конрад Н.И. Избранные труды. Литература и театр. – М.: Наука, 1978. – С.32 – 33.

kabi toʻrtta guruhga ajratilgan¹. Bu oʻrinda mualliflar adabiyot bilan aloqasi boʻlgan har bir hodisani komparativistika nuqtayi nazaridan oʻrganish mumkinligi nazariyasini ilgari surgan.

Bundan tashqari komparativistika nazariyasiga koʻra adabiy jarayonni ikki xil yondashuv orqali qiyoslash mumkin:

- 1. Adabiy jarayonga tarixiy genetik yondashuv (kelib chiqishi jihatidan bir xil yoki yaqin xalqlar adabiyoti);
- 2. Adabiy jarayonga qiyosiy tipologik yondashuv (kelib chiqishidan qat'iy nazar umumiy tomonlarga ega bo'lgan xalqlar adabiyoti).

Masalan, turli xalqlar adabiyotidagi abadiy mavzular, an'anaviy qahramonlar, janrlar, adabiy yoʻnalishlarni oʻrganish masalasi.

Adabiyotni qiyosan oʻrganish jihatdan komparativistika ikkita katta guruhga boʻlinadi.

- 1. Makrokomparativistika genetik jihatdan bogʻlanmagan turli millat doirasidagi adabiy hodisalarning qiyosiy tahlili (masalan: Shekspir va Navoiy ijodi).
- 2. Mikrokomparativistika bir millatga yoki hududga (region) mansub adabiy hodisalarning qiyosiy tahlili *(masalan: A.Qahhor va Oʻ.Hoshimov, Yassaviy va Maxtumquli ijodi singari)*

Adabiyotshunos olimlarning ilmiy ishlarini qiyosan oʻrganish ham makro yoki mikrokomparativistika obyekti boʻlishi mumkin. Ye.E.Bertels (1890–1957) va A.N.Malexova (1938–2009) bir makonda yashab ijod etgan rus olimlaridir. Ularning

² Жирмунский В.М. Проблемы сравнительно-исторического изучение литератур // Известия АН. Т.XIX. Вып. 3. – М., 1960. – С.183.

¹ Handbuch Komparatistik: Theorien, Arbeitsfelder, Wissenspraxis / Hrsg. von Zymner R., Hölter A. – Stuttgart: Verlag J.B. Metzler, 2013. – 405 s; Bu haqda qarang: Социальные и гуманитарные науки. Отечественная и зарубежная литература. Сер. 7 // Литературоведение: Реферативный журнал. – М., 2016. – C.7 – 21.

«Lison ut-tayr» dostoniga oid ilmiy izlanishlari mikrokomparativistika obyekti hisoblanadi. Har ikkala sharqshunosning ilmiy qarashlarini qiyosan oʻrganish shunday xulosalarga kelish imkonini berdi¹:

- 1. Ye.E.Bertels (1928) va A.N.Malexova (1978) tadqiqotlarida germenevtik ta'limot (talqin) muvozanati buzilmagan, matn mohiyati oʻtkinchi gʻoya va mafkuraviy manfaatlar uchun qurbon qilinmagan. Ye.E.Bertelsning 40-yillardagi tadqiqotlari haqida bunday deyish qiyin, chunki qatagʻon siyosati olimni davr mafkurasi bilan hisoblashishga majbur qilgan; Har ikkala sharqshunosning asar syujeti, Navoiyning tasavvuf ta'limotiga aloqasi, Foniy taxallusini tanlash sababi, Sharq naziranavisligi xususidagi fikrlari deyarli hamohang. Masalan, Navoiy va tasavvuf masalasida Ye.E.Bertels shoirning tasavvuf ta'limotini chuqur bilgani, ammo soʻfiy amaliyotchi boʻlmaganini qayd qilsa, A.N.Malexova tasavvuf shoir uchun maqsad emas, vosita boʻlganini ta'kidlaydi.
- 2. Ye.E.Bertels masalaga tarixiy-biografik, A.N.Malexova struktur-sistematik jihatdan yondashadi. Olim hikoyatlar mohiyatini siyosiy, ijtimoiy-madaniy kontekstda mayda unsurlarigacha tahlil qiladi, A.N.Malexova esa asosiy e'tiborini asarning ichki kompozitsiyasi, muallif shaxsiyati, hikoyatlar tipologiyasi tadqiqiga qaratadi.
- 3. Har ikkala tadqiqot mohiyatan bir-birini toʻldiradi. Ye.E.Bertels va A.N.Malexova qarashlardagi fikrlar tadriji «Lison ut-tayr» dostonini turli aspektda oʻrganish mumkinligi va davomiyligini koʻrsatadi.

Qiyosiy adabiyotshunoslik fan sifatida

Fan tarixidan ma'lumki, qiyosiy adabiyotshunoslik haqidagi dastlabki nazariy qarashlar adabiy jarayonlarning oʻxshash va farqli tomonlarini izohlash ehtiyoji tufayli XIX asrning boshlarida Yevropada, XIX asrning ikkinchi yarmida Rossiyada shakllangan¹.

Qiyosiy tadqiqotlar dastlab tilshunoslik yoʻnalishida olib borilgan va keyinchalik adabiyotshunoslikka ham oʻz ta'sirini oʻtkazgan. «Qiyosiy-tarixiy metod rivojida Frans Bopp, Rasmus Rask, Yakob Grimm kabi Yevropa tilshunoslarining alohida hissasi boʻlib, ular novator tilshunoslar sifatida maydonga chiqdilar»².

Ilk nazariy komparativistik qarashlar Germaniyada shakllangan. Nemis tarixchisi I.G.Gerder (1744-1803) va buyuk adib I.V.Gyote (1749-1832) tadqiqotlari, ayrim asarlari aynan qiyosiy yoʻnalishda yaratilgan. I.G.Gerder birinchilardan boʻlib e'tiborini Yevropa xalqlari madaniy hayotidagi umumiy jihatlarga qaratadi. Uning gʻoyalarini davom ettirgan buyuk adib I.V.Gyote esa fanga «jahon adabiyoti» tushunchasini olib kiradi. Oʻzining «Gʻarb-u Sharq devoni»da Sharq va Gʻarb madaniyatiga xos mushtarak jihatlarni yoritadi.

Rus sharqshunosligida qiyosiy-tarixiy metod rus tarixchisi va nazariyotchisi A.N.Veselovskiy (1838–1906) nomi bilan bogʻliq. Olim mazkur atamani birinchi boʻlib fanda muomalaga kiritgan. «Qiyosiy-tarixiy metod umumjahon adabiy jarayonini tadqiq etganda ijtimoiy-tarixiy taraqqiyotning rivojlanish qonuniyatlariga asoslanadi. Chunki tarixiy jarayon har bir geografik mintaqa doirasida oʻziga xos belgilarga ega boʻlgani

¹ Халлиева Г. XX аср Россия шарқшунослиги ва ўзбек мумтоз адабиёти. Монография. – Тошкент: Мухаррир, 2018. – Б.133 – 134.

¹ Batafsil qarang: Академические школы в литературоведении. – М., 1975.

² Расулов Р. Умумий тилшунослик. – Тошкент, 2010. – Б.81.

holda, bir qator umumiy qonuniyatlarga ham egaki, aynan shu qonuniyatlardan kelib chiqib, turli xalqlar adabiyotlarini qiyosiy aspektda oʻrganish mumkin»¹ Shuning uchun, dastlabki tadqiqotlaridayoq A.N.Veselovskiy masalaga tarixiylik prinsipi asosida yondashgan. Masalan, nemis olimi G.Flotoning «Ilohiy komediya» haqidagi maqolasiga(1859) taqrizida, yozuvchini zamondan ayri holda tasavvur qilish qiyinligi, Dante ijodiy merosi faqat Danteniki emas, bunda davrning ham rolini anglash joizligi haqida fikr bildirib, G.Flotoning ayrim qarashlarini tanqid qiladi.² Uning nazarida *adabiyot tarixi – ijtimoiy fikr, madaniyat va fan tarixidir*, shoir shaxsiyatini esa ma'lum tarixiy sharoit shakllantiradi. Shoirning individuallik, shaxsiy tashabbus darajasini aniqlash uchun, dastavval uning ijodi nima bilan qurollangani tarixini kuzatish kerak.

A.N.Veselovskiy barcha fikrlarini jamlab, qiyosiy metodologiyaga tayangan holda «Tarixiy poetika» asarini yaratadi.³ Rus olimasi M.G.Bogatkinaning fikricha, zamonaviy komparativistika metodologiyasi matnni oʻrganishning qiyosiy metodlari majmuasidan iborat boʻlib, aynan A.N.Veselovskiy yaratgan qiyosiy-tarixiy maktab an'analariga asoslanadi.⁴

Xullas, qiyosiy tadqiqotlar uchun asosiy metod hisoblangan qiyosiy-tarixiy metod⁵ adabiy jarayon dinamikasini, vorisiylik va an'analar almashinuvini, badiiy qadriyatlarni toʻliq anglashda yordam beradi.

A.N.Veselovskiydan keyin adabiy komparavistikaning metodologik jihatlarini V.M.Jirmunskiy, A.Dima, D.Dyurishin, N.I.Konrad, I.G.Neupokoyeva, M.B.Xrapchenko, A.Kokorin, M.Bogatkina, V.R.Amineva, Yu.I.Mineralov kabi olimlar tadqiq qilgan va dunyo adabiyotshunosligida bu jarayon davom etmoqda.

Bugun qiyosiy adabiyotshunoslik fani kundan kunga rivojlanmoqda. Amerika olimlari V.Fredrik (komparativistlarning xalqaro Amerika assotsiatsiyasi prezidenti) va Rene Uellek boshlab bergan an'analar davom ettirilib, dunyoning turli joylarida komparativistika ilmiy markazlari, maktablari tashkillashtirilmoqda. Moskva komparativistika maktabi, Britaniya va Amerika qiyosiy adabiyotshunoslik assotsiatsiyalari ¹ shular jumlasidandir.

Hozirda qiyosiy adabiyotshunoslik boʻyicha dunyoda bir qancha ilmiy jurnallar nashr qilinadi. Rossiyada chop etiladigan «Imagologiya va komparativistika», «Tarixiy poetika», Fransiyadagi «Revue de litterature compare» ana shunday nufuzli jurnallardan boʻlib, ularda komparativistikaga oid eng yaxshi maqolalar beriladi².

Nazorat savollari:

- 1. Filologik komparativistika deganda nimani tushunasiz?
- 2. Lingvistik va adabiy komparativistikaning bir-biridan farqini izohlang.
- 3. Qiyosiy adabiyotshunoslik fan sifatida qachon shakllangan?
- 4. Qiyosiy-tarixiy metod asoschilaridan kimlarni bilasiz?
- 5. A.N.Veselovskiyning nazariy qarashlariga izoh bering?
- 6. Qiyosiy adabiyotshunoslik fanining bugungi kundagi istiqboli haqida qanday fikrdasiz?

¹ Qosimov A., Hamroqulov A., Xoʻjayev S. Qiyosiy adabiyotshunoslik. – Toshkent: Akademnashr. 2019. – B.24.

² Академические школы в русском литературоведении. – М.: Наука, 1975. – С.211.

³ Веселовский А.Н. Историческая поэтика. – М.: Высшая школа; – 1989. – С.405.

⁴ Богаткина М.Г. О формировании новой парадигмы в современной компаративистике // Международная научная конференция. – Казань, 2004. – С.75.

⁵ Qarang: Эшонбобоев А. Қиёсий-тарихий метод ҳақида // Ўзбек тили ва адабиёти. – Тошкент, 2008. №4. – Б.38 – 46; Каримов Б. Адабиётшунослик методологияси. – Тошкент: Муҳаррир, 2011. – Б.73 – 75.

¹ www.bcla.org/index.htm; www.agla.org

² http://journals.tsu.ru; www.cairn-int.info/journal-revue-de-litterature-comparee.htm

2-mavzu:

QIYOSIY TAHLILNING ILMIY-NAZARIY ASOSLARI VA PRINSIPLARI

Reja:

- 2.1. Qiyosiy tahlil obyektlari.
- 2.2. Qiyosiy tahlilning vazifalari.
- 2.3. Qiyoslash jarayonidagi eng muhim bosqichlar.
- 2.4. Qiyoslanishi mumkin boʻlgan tipik vaziyatlar.

Tayanch tushunchalar: obyekt, tabiiy, ijtimoiy, ma'naviy, gnoseologik, mantiqiy, metodologik, metodik, akseologik vazifalar, qiyoslash bosqichlari, muhit, ichki xususiyatlar, tipik vaziyatlar

Qiyosiy tahlil oddiy tahlildan farq qiladi. An'anaviy tahlil obyektlardan, ular esa oʻz tashkil etuvchilaridan iborat. Tadqiqotchilar uchun shuni bilishning oʻzi kifoya. Qiyosiy tahlil esa aytib oʻtilgan harakatlardan tashqari, yana tahlil obyektlarining tashkil etuvchilarini ham bir-biri bilan qiyoslashga qaratiladi.

Qiyosiy tahlildan maqsad – qiyoslanuvchi obyektlarning oʻxshash va farqli jihatlarini aniqlash, ular orasidagi umumiy qonuniyatlarni yuzaga chiqarishdan iborat.

Azaldan, «Haqiqat qiyosda bilinadi» deymiz. Shuning uchun ham qiyoslash metodologiyasi odamlarning hayotiy faoliyatida keng tarqalgan va qoʻllanilmoqda. Bugungi kunda qiyoslash metodi barcha bilish va hodisalarni tahlil etish jarayoniga tatbiq etilgan. Fan va amaliyotning barcha sohalarida qiyoslash metodologiyasidan foydalaniladi.

Qiyoslash metodologiyasining mazmuni, mohiyati va vazifalarini yanada chuqur anglash uchun muayyan ilmiy-amaliy asoslar mavjud.

Qiyosiy tahlil obyektlari tabiiy, ijtimoiy va ma'naviy obyektlarga boʻlinadi. Ushbu uchta nisbatan mustaqil hodisalar guruhlari bir-biriga uygʻun bogʻlangan. Aynan ular bir butunlikda inson yashaydigan muhitni shakllantiradi va badiiy adabiyotda obraz shaklida oʻz ifodasini topadi.

Tabiat hodisalarining nisbatan mustaqilligiga qaramay, ular odamlarning ijtimoiy hayotiga jalb qilinganidan keyingina qiyoslash obyektlariga aylanadi. Boshqacha aytganda, tabiat hodisalarining qiyosiy tahlili bilan odamlar shugʻullangani bois ular oʻz manfaati va qarashlaridan kelib chiqib, unga oʻzlarining ijtimoiy xususiyatlarini singdiradilar. Buning natijasida tabiat hodisalarining qiyosiy tahlili ma'lum darajada ijtimoiylashadi. Shunday qilib, ijtimoiy omillar ta'sirisiz tabiat hodisalarini qiyoslash mexanizmi mavjud boʻla olmaydi.

Qiyosiy tahlil obyektlarining ikkinchi guruhini **ijtimoiy hodisalar** tashkil etadi. Ularning qiyoslash metodi oʻz xususiyatlariga ega. Bunda tahlil maydoni kengayadi, qiyosiy tahlil koʻrsatkichlari soni ortadi. Sababi, bu oʻrinda ijtimoiy taraqqiyot qonunlari, ijtimoiy munosabatlarning barcha guruhlari: iqtisodiy, siyosiy, ma'naviy-gʻoyaviy, huquqiy, ilmiy-texnik, axborot, harbiy, ekologiya va boshqa koʻplab munosabatlar e'tiborga olinadi.

Ma'naviy-g'oyaviy masalalar qiyosiy tahlil obyektlarining uchinchi guruhini tashkil etadi. Bu jarayon ma'naviy-g'oyaviy soha obyektlarini qiyosiy tahlil qilish bilan bogʻliq.

Demak, badiiy adabiyotda mavjud tabiiy, ijtimoiy va ma'naviy-gʻoyaviy hodisalar – qiyosiy tahlil obyektlaridir. Ammo bu obyektlar oʻziga xos boʻlib, ular oʻzining bir qator xususiyatlarini hisobga olishni talab qiladi.

Qiyosiy tahlilning vazifalari

Ilmiy adabiyotlarda izohlanishicha, qiyosiy tahlilning gnoseologik, mantiqiy, metodologik, metodik, akseologik kabi vazifalari mavjud¹. Boshqacha aytganda, biz adabiy hodisalarni qiyoslash jarayonida, albatta, shu bosqichlardan oʻtamiz.

Qiyosiy tahlilning gnoseologik vazifasi. Uning mohiyati va asosiy maqsadi, qiyoslash obyektlari haqida yangi bilim va koʻnikmalarga ega boʻlishdir. Bu orqali biz quyidagi natijalarga erishamiz:

Birinchidan, qiyosiy tahlil jarayonida, har bir taqqoslanadigan obyekt haqida yangi ma'lumot olamiz.

Ikkinchidan, qiyoslanayotgan adabiy hodisalarning oʻzaro ta'siri haqida yangi tushunchalarga ega boʻlamiz.

Uchinchidan, agar obyektlarni taqqoslash jarayoni yetarli darajada toʻliq va aniq boʻlsa, unda ularning oʻtmishi, buguni va kelajagi haqida umumiy tasavvur hosil qilamiz. Shu bilan birga qiyoslash metodikasi nazariyasini boyitamiz.

Qiyosiy tahlilning mantiqiy vazifasi. Adabiy hodisalarni taqqoslash jarayonida mantiqiy qonun-qoidalar ifodasi. Qiyosiy tahlil jarayonida mantiq talablaridan uzoqlashmaslik uchun quyidagilarga rioya qilish kerak:

1.Turli xil asosga ega adabiy hodisalarni taqqoslash mantiqqa toʻgʻri kelmaydi. Koʻpincha adabiy hodisalarni qiyosiy tahlil etish uchun turli asoslar tanlanadi. Bu hol yuz berganda – qiyoslash jarayoni oʻzining aniqligini yoʻqotadi. U koʻp jihatdan predmetsiz, demak, samarasiz boʻlib qoladi. Qiyoslash uchun aniq asos boʻlishi kerak. Toʻgʻri kelgan narsani bosh-

qasi bilan qiyoslab boʻlmaydi. Masalan, syujetni syujet bilan, asar tilini boshqa bir asar tili bilan qiyoslash mantiqan toʻgʻri boʻladi;

2.Obyektlarga aloqasi boʻlmagan ma'lum bir vaziyatlar tahlildan olib tashlanmasa, kutilgan natijaga erishib boʻlmaydi;

3.Qiyoslash jarayonida ziddiyatlarga, qarama-qarshiliklarga uchrash mumkin, bu tabiiy. Hatto, oʻta qarama-qarshi boʻlgan personajlarda ham albatta, mantiqqa zid boʻlmagan umumiy tomonlar topiladi.

Qiyosiy tahlilning metodologik vazifasi. Qiyoslash jarayonida biz koʻplab metod va usullardan foydalanamiz. Bu esa bizning nafaqat obyekt haqidagi bilimlarimizni, balki hayotdagi ayrim muammolarni hal qilishdagi emperik bilimlarimizni, ya'ni tajribamizni ham oshiradi va amaliy imkoniyatimizni kengaytiradi.

Qiyosiy tahlilda dunyoqarash vazifasi. Ma'lumki, har bir jarayon insonlarning bilimi va dunyoqarashiga bogʻliq holda amalga oshadi. Qiyosiy tahlilning qanchalik keng qamrovli boʻlishi, aynan inson dunyoqarashi, bilimi va saviyasining qay darajada boʻlishiga bogʻliq. Demak, dunyoqarash bu jarayonda muhim rol oʻynaydi. Subyektlarning dunyoqarashi, omma dunyoqarashining boyishiga xizmat qiladi.

Qiyosiy tahlilning baholovchi (akseologik) vazifasi koʻpgina shaklda, koʻpgina jihatlarda namoyon boʻladi. Biz nimaniki qiyoslamaylik, albatta, xulosada ilmiy-nazariy fikrlarimizga yakun yasab, u yoki bu adabiy hodisani baholaymiz. Shuning uchun ham qiyosiy tahlil mohiyatan akseologikdir, ya'ni, uning mazmunida oʻzaro oʻxshashlik va tafovutlari nuqtayi nazaridan qiyoslanadigan hodisalarning bahosi mujassamlashgan boʻladi. Bu esa nafaqat nazariy dargʻalarni boyitadi, balki ayrim masalalar yechimida amaliy ahamiyat ham kasb etadi.

¹ Минералов Ю.И. Сравнительное литературоведение (Компаративистика). Учебник. – М.: Юрайт, 2018; Жирмунский В.М. Сравнительное литературоведение // Изб. тр. – М.: Наука, 1979; Кокорин А.А. Сравнительный анализ: теория, методология, методика. – М.: МГОУ, 2009.

Qiyosiy tahlilning emperik vazifasi asosan amaliy vazifalarni hal etishni ta'minlashga yoʻnaltirilgan. Bizning qarshimizda har kuni amaliy masalalar silsilasi paydo boʻladi. Qiyosiy tahlil amaliyotga xizmat qilsa va inson hayotida ahamiyatga ega boʻlsagina, u chinakamiga natija beradi.

Qiyoslash jarayonidagi eng muhim bosqichlar

Qiyosiy tahlil kutilgan natijani berishi uchun tadqiqotchi nima qilishi, qanday bosqichlardan oʻtishi kerak?

Avvalo, tadqiqotchi qiyoslash obyektlarini toʻgʻri tanlab olishi kerak. Chunki qiyoslash obyektlarining mavjudlik vaziyati bu bosqichlarni yuzaga keltiradi.

Birinchidan, hodisalarning ichki xususiyatini, ichki parametrlarini qiyoslamay turib, ularni qiyoslash, oʻxshashlik va farqlarini aniqlashning iloji yoʻq. Ularning asosiylari – qiyoslanadigan obyektlarning mazmun, mohiyat, sifatlaridir. Shuning uchun, hodisalarning mazmun, mohiyat va sifatlari orasidagi oʻxshashlik va tafovutlarni aniqlash qiyoslash jarayonidagi birinchi bosqichdir.

Ikkinchidan, bilamizki, hodisalarning ichki xususiyatlari, ya'ni ularning mazmun, mohiyat va sifati muhitda oʻziga xos shaklda namoyon boʻladi. Demak, qiyoslash obyektlarining ichki xususiyatlarini, muhitda namoyon boʻlish darajasidagi oʻxshashlik va tafovutlarni oʻrganish kerak. Bu qiyosiy tahlilning keyingi bosqichidir.

Uchinchidan, nafaqat qiyoslanadigan obyektlar muhitga ta'sir koʻrsatadi, balki muhit ham ularga oʻz ta'sirini oʻtkazadi. Bu tashqi sharoitlarning tahlil obyektlariga ta'sir etish xususiyatlarini qiyoslashni koʻzda tutadi. Shu tarzda, tabiiy ravishda

hodisalarni qiyoslash bosqichida uchinchi yoʻnalish belgilanadi. Uning mohiyati – muhitning qiyosiy tahlil obyektlariga ta'siridagi oʻxshashlik va tafovutlarni aniqlashdan iborat.

Toʻrtinchidan, har qanday hodisaning, jumladan, adabiy hodisaning paydo boʻlish sababi, zaruriyati mavjud. Qiyoslash chogʻida albatta, ularni ham e'tiborga olish zarur. Har bir hodisaning vujudga kelishi, mavjudligi, rivojlanishi va faoliyat koʻrsatishida koʻplab zaruriyatlar rol oʻynaydi va ular orasida ayrimlari ustuvor ahamiyatga ega boʻladi. Buni adabiyotda koʻpincha motiv deb ataymiz. Demak, bizga kerak narsaning qiyosiy tahlilini amalga oshirishdan oldin, uni yuzaga keltirgan ehtiyoj va zaruriyatlarni ham taqqoslash kerak. Bu bizga qiyoslanayotgan obyektlarning mavjudligi sabablarida oʻxshash va xos tomonlarni ochishga yordam beradi. Buning uchun biz zaruriyat (motiv) – obyekt – mohiyat (natija) algoritmi asosida qiyosiy tahlilni amalga oshirishimiz maqsadga muvofiq boʻladi.

Demak, zaruriyat (motiv)larni qiyoslash **obyektni** tahlil qilishning muhim bosqichi. Chunki ehtiyoj va zaruriyatsiz hech narsa yuzaga kelmaydi. Axir, Alisher Navoiyning «Lison ut-tayr» asarida asl manzilga yetish uchun tanlangan yettita vodiyning birinchisi aynan talab boʻlgan¹.

Qiyoslanishi mumkin boʻlgan tipik vaziyatlar

Ba'zida qoʻlimizda shuncha material boʻla turib, nimani nima bilan qiyoslashni yoki taqqoslashni bilmaymiz. Ma'lumki, qiyosiy tahlil jarayoniga, uning natijalariga koʻpgina holat-

¹ http://kh-davron.uz/kutubxona/alisher-navoiy

lar ta'sir qiladi. Masalan, qiyoslash obyektlarining mazmuni; tahlildagi metodologik vositalar; qiyosiy tahlilni oʻtkazish usullari va h.k. Bularning barchasini hisobga olgan holda, qiyoslanishi mumkin boʻlgan quyidagi tipik vaziyatlarni koʻrsatish mumkin:

Birinchi vaziyat. Bir makon va zamonda mavjud boʻlgan adabiy voqea hodisalarni qiyoslash. Bunday qiyoslash jarayoni oʻziga xos xususiyatlariga ega. Birinchidan, qiyoslanayotgan obyektlarning makoniy birligi, muhit umumiyligi uning bu xususiyatlarga ta'sir qilishini oʻrganishni kun tartibidan chiqaradi. Umumiy makon va zamon esa, qiyoslash obyektlarining muhiti bir ekani haqida dalolat berib, bu muhit ularga asosan bir xil ta'sir koʻrsatadi. Bu esa qiyosiy tahlilning birmuncha «soddalashuviga», yengillashuviga olib keladi. Ikkinchidan, qiyoslanuvchi fenomenlarning bir makon va bir zamonda mavjudligi, tabiiyki, ularning tarixiy birligi haqida gapirishga imkon beradi. Masalan, Oʻtkir Hoshimov va Tohir Malik ijodini qiyosan oʻrgansak, bir makon va zamonda yashab ijod etgan yozuvchilarning umumiy va xos tomonlarini aniqlay olamiz.

Ikkinchi vaziyat. Bir makon, lekin har xil zamondagi adabiy hodisalarning qiyosidan tashkil topadi. Ma'lum bir sharoitda, bir muhitda, bir makonda, ammo turli vaqtda mavjud, mavjud boʻlgan yoki mavjud boʻlishi mumkin boʻlgan adabiy hodisalarni qiyoslash kerak boʻlganda, ikkinchi vaziyat yuzaga keladi. Shu bilan birga, turli vaqtda, ammo juda oʻxshash vaziyatlarda mavjud boʻlgan hodisalarni qiyoslash – qiyin vazifa. Odatda, bu yerda muayyan muammolar, qiyinchiliklar, jumboqlar yuzaga keladi.

Koʻpincha xuddi oʻsha bir makon, masalan, bir mamlakat sharoitlarida mavjud boʻlgan hodisalarni vaqt omilini inkor etgan holda qiyoslashga harakat qilishadi. Bu notoʻgʻri. Masalan, bir makonda, ammo har xil zamonda yashab ijod qilgan shoirlar: Muqimiy bilan Muhammad Yusufning yoshlar yoki yoshlik haqidagi qarashlariga, albatta, vaqt oʻz hukmini oʻtkazadi. Boshqacha aytganda, agar qiyoslanuvchi obyektlar aynan bir muhitda mavjud boʻlsa ham, oʻz taraqqiyotining turli davrlarida vaqt masalaning mohiyatiga turlicha ta'sir koʻrsatishini hisobga olish lozim. Hatto agar hodisalar mavjud boʻlgan sharoitlar (mamlakat, qandaydir bir makon) tubdan oʻzgarmagan boʻlsa-da, bu vaqt ichida qiyoslash obyektlarining oʻzi oʻzgargan boʻlishi mumkin.

Uchinchi vaziyat. Bir zamon, lekin har xil makonda mavjud boʻlgan obyektlarni qiyoslash. Masalan, bugungi kunda bir zamonda, ammo har xil makonda yashab ijod qilayotgan oʻzbekistonlik yozuvchi Nosir Zohid bilan amerikalik yozuvchi Viktoriya Shvabning bir xil nomdagi «Qasos» romani mavjud. Har ikkala romandagi qasos motivini taqqoslashda, albatta, muhitning qiyoslash obyektlariga ta'sirini hisobga olish juda muhim. Bu jarayon tadqiqotchidan alohida e'tiborni talab qiladi. Chunki qiyosiy tahlil jarayonida sharoit va sabablarning qiyoslanuvchi obyektlarga ta'sirini hisobga olish kerak boʻladi.

Toʻrtinchi vaziyat. Har xil makon va zamon adabiy hodisalarini qiyoslash jarayoni. Bunda turli muhit, makon va turli zamon adabiy hodisalari taqqoslanadi. Bu vaziyat qiyosiy tahlil metodologiyasi va metodikasi uchun eng murakkabi sanaladi. Masalan, Shekspir va Alisher Navoiy asarlarida ma'rifat talqini yoki Abdulla Qahhor va Jek London asarlarida badiiy psixologizm masalasini oʻrganish uchun quyidagilarni hisobga olish kerak:

Birinchidan, qiyoslanadigan hodisalarning mohiyatini tushunish lozim. *Ikkinchidan*, qiyosiy tahlil obyektlari mavjud boʻlgan oldingi sharoitlar va muhitlarni ham imkon qadar

chuqurroq oʻrganish, ularning Shekspir va Navoiy yoki Abdulla Qahhor va Jek London dunyoqarashiga ta'sirini ochib berish darkor. Chunki har xil zamon va makonda yashab ijod etgan adiblarning asarlarini mashhurlikdan boshqa yana nima birlashtirib turganini bilish uchun koʻpgina adabiy hodisalarni yuzaga chiqarish lozim.

Qiyoslash obyektlarining makon-zamon koʻrsatkichlari munosabati bilan, tahlil qiluvchining oldida koʻplab qiyinchiliklar paydo boʻladi. Ammo qiyoslanadigan adabiy hodisalarning rivojlanish jarayonida vujudga keladigan vaziyatlarning xususiyatlari hisobga olinsa, ularni hal etish mumkin. Agar qiyosiy tahlil olib borayotgan tadqiqotchilar farqlanuvchi, ziddiyatli hodisalarni qiyoslash metodologiyasi va metodikasiga ega boʻlsa, qiyoslash natijasi yaxshi samara beradi.

Nazorat savollari:

- 1. Tabiiy, ma'naviy va ijtimoiy qiyosiy tahlil obyektlari bir- biri-dan qanday farq qiladi?
- 2. Qiyosiy tahlilning vazifalari nimalardan iborat?
- 3. Qiyoslash jarayonidagi eng muhim bosqichlarga izoh bering?
- 4. Qiyosiy tahlil kutilgan natijani berishi uchun, tadqiqotchi qanday bosqichlarda ish olib borishi kerak?
- 5. Zaruriyat obyekt mohiyat algoritmida qiyosiy tahlilni amalga oshirish mexanizmini tushuntiring?
- 6. Qiyoslanishi mumkin boʻlgan qanday tipik vaziyatlarni bilasiz?
- 7. Nima uchun har xil makon va zamon adabiy hodisalarini qiyoslash jarayoni qiyosiy tahlil metodologiyasi va metodikasi uchun eng murakkabi sanaladi?

3-mavzu:

QIYOSIY TAHLIL METODOLOGIYASI

Reja:

- 3.1. Ilmiy tadqiqot metodlari va qiyosiy tahlil.
- 3.2. Oiyosiy-tarixiy va chogʻishtirish metodi xususida.
- 3.3. Qiyoslash natijalarini baholashning mezonlari.
- 3.4. Qiyosiy tahlil natijalarining xolisligini ta'minlash shartlari.

Tayanch tushunchalar: ilmiy tadqiqot metodi, emperik va nazariy metodlar, qiyosiy tahlil metodologiyasi, qiyosiy sintez, qiyosiy induksiya, qiyosiy tarixiy va chogʻishirish metodi, baholash mezoni, qiyosiy tahlil natijalari

Qiyosiy tahlil – borliqdagi hodisalarni bilish va oʻzgartirish boʻyicha metodologiya bosqichlaridan biridir. Qiyoslash metodologiyasi ma'lum bir makon va zamonda mavjud turli jarayonlarni qiyoslash uchun asoslarni shakllantiradi. Shuning uchun ham metodologiyada qiyosiy tahlilning oʻrnini aniqlash zaruriyati mavjud.

Ma'lumki, metodologiya ilmiy tadqiqot metodlari haqidagi ta'limotdir. Barcha fanlarda ilmiy tadqiqot metodlari empirik va nazariy metodlarga boʻlinadi. Aynan empirik va nazariy metodlar asosida har bir fan, jumladan, adabiyotshunoslik ham oʻz tadqiqot usullarini shakllantiradi. «Tadqiqot metodlarisiz birorta fan oʻz maqsadiga (strategiyasiga), tadqiqot obyektining mohiyatini ochishga erisha olmaydi. Chunki u yoki bu fanning tabiat va jamiyat hodisalarini aniqlashi, ularga xos qonuniyatlarni topishi, ular haqida ilmiy-falsafiy gʻoyalar

chiqarishi, shak-shubhasiz, muayyan metodlar orqali amalga oshiriladi»¹.

Empirik metod kuzatish va tajriba oʻtkazish bilan bogʻliq boʻlib, **rejalashtirish, tavsiflash, statistika** kabi bosqichlardan iborat.

Nazariy metodlarga esa analiz, sintez, abstraksiya, induksiya, deduksiya, analogiya modellashtirish kabilar mansubdir. Nazariy metodlarning barchasi **qiyoslash, umumlashtirish, tasniflash** (klassifikatsiya), **baholash** kabi bosqichlardan oʻtadi.

Demak, ayon boʻladiki, qiyoslash barcha nazariy ilmiy xulosalarning asosiy bosqichlaridan biri hisoblanadi. Shuning uchun qiyosiy tahlilni amalga oshirishdan oldin ilmiy tadqiqot metodlarini yaxshilab oʻrganish, ularning qiyoslashdagi rolini tushunib yetish kerak.

Nazariy metodlarni qisqagina tushuntiramiz: Analiz – tahlil, sintez – xulosalash, abstraksiya – mavhumlashtirish, induksiya – umumiylikdan xususiylikka oʻtish, deduksiya – xususiylikdan umumiylikka siljish, analogiya – oʻxshash xususiyatlar tahlili, modellashtirish – model yaratish (prototip yaratish: mas: olamning badiiy modeli, darslikning elektron modeli). Bu nazariy metodlarning har biri qiyoslash bosqichidan oʻtishi mumkin. Qiyosiy tahlilda analiz, sintez, deduksiya va induksiya kabilar zarur unsurlar, ularsiz qiyosiy tahlilni amalga oshirish mumkin emas. Masalan, deduksiya – hodisalarni tashkil etuvchilarga ajratish jarayoni, qiyosiy tahlil esa ana shu jarayon natijalarini ham oʻz ichiga oladi.

Demak, qiyosiy tahlil voqelik hodisalarini bilish va oʻzgartirishga qaratilgan barcha nazariy metodlarga oʻz ta'sirini koʻrsatadi. Shundan kelib chiqib, ilmda qiyosiy sintez, qiyosiy induksiya, qiyosiy deduksiya kabi tushunchalar mavjud. Masalan, qiyosiy sintez – hodisalar oʻrtasidagi oʻxshashlik va tafovutlarni aniqlash jarayonidir. Bunda ularni tashkil etgan unsurlarida bilimlarni integratsiyalash natijalari asos qilib olinadi. Mohiyatan, qiyosiy sintez «qiyosiy tahlil obyektlari oʻrtasidagi farq nimada?» degan savolga javob beradi. Qiyosiy induksiya – xususiydan umumiy tomon harakat, qiyoslanadigan adabiy hodisalarning oʻxshashlik va tafovutlarni aniqlash jarayonidir.

Qiyosiy-tarixiy va qiyosiy-chogʻishtirish metodi

Qiyoslash metodologiyasida qiyosiy-tarixiy va chogʻishtirish (yoki qiyosiy-chogʻishtiruv) metodi eng asosiy metodlardan hisoblanadi. Bu metodlar mohiyatan bir-biriga yaqin, ammo farq qiladi.

Qiyosiy-tarixiy metod adabiy hodisalarning umumiy va xos tomonlarini tarixiy taraqqiyot jarayoni bilan bogʻliqlikda qiyoslash usulidir. Qiyosiy-tarixiy metod asosidagi ilk nazariy fikrlar Arastuning «Poetika» asarida bayon qilingan. Faylasuf adabiyotni epos, lirika, drama kabi uch turga ajratish jarayonida ularni qiyoslaydi va mohiyatini tushuntirib beradi. Qiyosiytarixiy metod haqida ilmiy adabiyotlarda juda koʻplab nazariy fikrlar bayon qilingan. Jumladan, adabiyotshunos, B.Karimov qiyosiy-tarixiy metoddan foydalanib, quyidagi yoʻnalishlarda ilmiy tadqiqot olib borish mumkinligini ta'kidlaydi:

- 1. dunyo adabiyoti durdonalari yoki milliy adabiyotning goʻzal namunalari oʻzaro qiyoslanadi;
- 2. adabiy asarlar yaratilgan davriga koʻra taqqoslab oʻrganiladi;
- 3. bir milliy adabiyot vakillarining qiyos uchun asosli asarlari oʻrganiladi;
- 4. milliy adabiyot namunalari dunyo adabiyoti kontekstida tekshiriladi;

¹ Расулов Р. Умумий тилшунослик. – Тошкент, 2010. – Б.291.

5. adabiy jarayon yoki adabiyot tarixida mavjud adabiy hodisalarning farqli va oʻxshash qirralari tadqiq qilinadi;

6. mavzu yoki ilmiy muammo nuqtayi nazaridan oʻzaro yaqin boʻlgan adiblarning asarlari tekshiriladi;

7. adabiy-estetik evolyutsiyani kuzatishda ma'lum bir adib tomonidan yozilgan asarlar obyekt qilib olinadi¹.

Qiyosiy-tarixiy metodning nazariy asoslari A.N.Veselovskiy, V.M.Jirmunskiy, N.I.Konrad, A.Dima, A.Dyurishin, V.R.Amineva kabi olimlar tomonidan juda yaxshi yoritilgan².

Chogʻishtirish metodi – filologik hodisalarni tizimli qiyoslashga asoslangan metod boʻlib, asosan farqli xususiyatlarni ochib berishga qaratilgan metoddir. Shuning uchun ham tilshunoslikda boshqacha nomi kontrastiv metod deb ataladi. Garchi nazariy asoslari ishlab chiqilmagan boʻlsa-da, antik davrlardan boshlab turli xil filologik hodisalarni chogʻishtirishga qaratilgan asarlar yaratilgan. Alisher Navoiyning fors va turkiy tillar muhokamasiga qaratilgan «Muhokamat-ul lugʻatayn» asari chogʻishtirish metodining yorqin namunasidir. Fanda mazkur metodning nazariy asoslari tilshunos olim I. A. Boduen de Kurtene tomonidan XIX asrda ishlab chiqilgan. Ye. D. Polivanov, L. V. Sherba, S. I. Bernshteyn, A.A.Reformatskiy, Sh. Balli kabi olimlar bu boradagi ilmiy ishlarni davom ettirishgan³.

Tilshunos olim R.Rasulov ilmiy xulosalariga koʻra, chogʻishtirish metodi ikki va undan ortiq qarindosh yoki qarindosh boʻlmagan tillarni, til hodisalarini oʻzaro qiyolash usuli boʻlib, ushbu xususiyatga koʻra faqat qarindosh tillarni taqqoslab, qiyoslab oʻrganadigan qiyosiy-tarixiy metoddan farq qiladi. Shuningdek, qiyosiy-tarixiy metoddan farqli ravishda, chogʻishtirilayotgan tillarning tarixiga, ularning kelib chiqishiga – genetik jihatlariga, taraqqiyotiga e'tibor bermaydi, ularga asoslanmaydi.¹

Agar yuqoridagi nazariy fikrlarni adabiyotga tatbiq qilsak, tahlil bir millat yoki bir hudud adabiyoti doirasida olib borilsa, adabiy hodisalarning genetik jihatlariga e'tibor qaratilsa, bunda qiyosiy-tarixiy metoddan (mas., «oʻzbek mumtoz adabiyotida ramzlar qiyosi»), turli millatga mansub adabiyotlar tadqiqi va tahlili asosida (mas., rus va oʻzbek, ingliz va ispan) u yoki bu adabiy hodisalarning spetsifik xususiyatlari ochib berilsa, chogʻishtirma metoddan foydalaniladi.

Qiyoslash natijalarini baholashning mezonlari

Qiyoslash natijalarini baholash yuqorida koʻrib oʻtilgan qiyosiy tahlil vazifalarining qay darajada bajarilganiga koʻp jihatdan bogʻliqdir. Ilmiy adabiyotlarda qiyoslash natijalarini xolisona baholashning tarixiy, gnoseologik, mantiqiy, metodologik, ma'naviy-gʻoyaviy va boshqa mezonlari mavjud. Ularni aniqroq tasavvur qilish uchun, ba'zilarini koʻrib chiqamiz.

Tarixiy mezon – qiyosiy tahlil natijalarining tarix faktlariga qanchalik mos kelishini baholashdir.

Gnoseologik mezon – qiyosiy tahlil natijalarini ularning bilish nazariyasi qonunlari va tamoyillariga mos kelishi nuqtayi nazaridan baho berishdir.

¹ Каримов Б. Адабиётшунослик методологияси. – Тошкент: Муҳаррир, 2011. – Б.74.

² Bu haqda yana qarang: Эшонбобоев А. Қиёсий-тарихий метод ҳақида // Ўзбек тили ва адабиёти. 2008. №2.

³Поливанов Е.Д. Русская грамматика в сопоставлении с узбекским языком. – Ташкент, 1933; Реформатский А.А. О сопоставительном методе // Русский язык в национальной школе. 1962. №5: Методы сопоставительного изучения языков. – М., 1988.

¹ Расулов Р. Умумий тилшунослик. – Б.263.

Mantiqiy mezon – qiyosiy tahlil natijalarining mantiq qonunlari talablariga mos kelishini baholashdir.

Metodologik mezon – qiyosiy tahlil natijalarining qaysi metodlarga toʻgʻri kelishi yoki kelmasligi nuqtayi nazaridan baholashdir.

Ma'naviy-g'oyaviy mezon – bu qiyosiy tahlil natijalarining jamiyat ma'naviyati, g'oyaviy maqsadlariga qay darajada mos kelishini e'tiborga olib, baho berishdir.

Xullas, yuqoridagi mezonlar qiyosiy tahlil natijalarini baholash, komparativistik tadqiqotning ilmiy-nazariy jihatlarini aniqlash imkonini beradi.

Qiyosiy tahlil natijalarining xolisligini ta'minlash shartlari

Qiyosiy tahlilda haqqoniy, xolis natijaga erishish uchun quyidagilarga diqqatni qaratish lozim:

Birinchidan, qiyosiy tahlilni yakuniga yetkazmoqchi boʻlgan tadqiqotchi qiyosiy adabiyotshunoslikning nazariy, metodologik va metodik asoslarini bilishi kerak. Bu borada ular bilishning nazariy va empirik vositalari imkoniyatlaridan unumli foydalana olishi lozim.

Ikkinchidan, qiyosiy tahlil obyektlari mavjud boʻlgan, mavjud yoki mavjud boʻlishi mumkin boʻlgan muhitning xususiyatlari hisobga olinishi lozim. Boshqacha aytganda, ilmiy izlanuvchi, qiyosiy tahlil jarayoniga ta'sir etishi mumkin boʻlgan barcha holatlarni tahlilga tortishi kerak.

Uchinchidan, qiyoslash faqat statistik ma'lumot yigʻish va koʻrsatishdan iborat boʻlib qolmasligi kerak. Qiyoslash obyektlari toʻxtovsiz oʻzgaradi, tadqiqotchilar ana shuni hisobga olishi kerak. Oʻrganilayotgan obyektlarning statistik

manzarasi ularning dinamik xususiyatlari bilan toʻldirilishi, tadrijiy takomili koʻrsatilishi kerak. Aks holda qiyosiy haqiqat toʻlaqonli, xolis boʻla olmaydi. Demak, olib borilgan statistika, dinamika bilan birga tahlil va talqin qilinishi lozim.

Toʻrtinchidan, tahlilda subyektivizmga yoʻl qoʻymaslik. Soxta qiyoslash, muayyan manfaatlarga xizmat qilishi mumkin, lekin fan rivojiga xizmat qilmaydi. Ba'zi tadqiqotchilarning bir-biriga umuman toʻgʻri kelmaydigan filologik jihatlarni qiyoslashi, ana shunday soxta qiyoslashga olib keladi. Natijada, qiyosiy tahlil mazmuni va natijalari buzib koʻrsatiladi, odamlarning ijtimoiy ongida notoʻgʻri tushuncha paydo boʻladi. Masalan, Abdulla Qodiriyning «Oʻtkan kunlar» asaridagi Otabekning ishqiy sarguzashtlarini, Jorj Bayronning Don-Juan obrazi ishqiy sarguzashtlari bilan qiyoslash kutilgan natijani bermaydi.

Demak, qiyosiy tahlilning asosiy qoidalari, talablari bajarilmasa, adabiy hodisalarni qiyoslash jarayoni noxolis natijalar beradi.

Nazorat savollari:

- 1. Metodologiya nima va qanday ilmiy tadqiqot metodlarini bilasiz?
- 2. Qiyosiy-tarixiy metod chogʻishtirish metodidan qanday farq qiladi?
- 3. Qiyoslash natijalarini baholashning qanday mezonlari maviud?
- 4. Qiyosiy tahlil natijalarining xolisligini ta'minlash shartlari nimalardan iborat?
- 5. Qanday holatlarda adabiy hodisalarni qiyoslash jarayoni noxolis natijalar beradi?

4-mavzu:

TARJIMA – QIYOSIY ADABIYOTSHUNOSLIK OBYEKTI SIFATIDA

Reja:

- 4.1. Tarjima nazariyasi fan sifatida.
- 4.2. Tarjimashunoslikka oid muhim tushunchalar.
- 4.3. Tarjima adabiyotlararo kommunikatsiya vositasi.
- 4.4 Tarjima komparativistika obyekti.

Tayanch soʻzlar: tarjima, dastlabki tarjimalar, komparativistika, leksik jihat, adekvatlik, transformatsion model, semantik model, situativ model, kommunikativ model, P.M.Topper, badiiy tarjima, tarjimon mahorati.

Tarjima tarixiga nazar soladigan boʻlsak, uning ildizlari eramizdan oldingi davrlarga borib taqaladi. Birinchi boʻlib yozma tarjimani qadimgi Rim shoiri, dramaturgi va tarjimoni Liviy Andronik (280–205) qilgan. U Homerning mashhur «Odisseya» asarini yunon tilidan lotin tiliga oʻgirgan.

Tarjima nazariyasi haqidagi dastlabki fikrlarni eramizgacha boʻlgan birinchi asrda Tulliy Sitseron(106-43) asarlarida yozib qoldirgan. Uning fikricha, «tarjimada shaklni emas, mazmunni yetkazish kerak. Soʻzma soʻz tarjima tarjimonning ojizligidan darak beradi»¹.

Oʻrta asrlardagi tarjimalar diniy asarlarni tarjima qilish ehtiyoji tufayli paydo boʻlgan. Uygʻonish davrida (XIII asr oxiri, XIV asr boshi Yevropada) nafaqat diniy va yana badiiy asarlar tarjima qilingan.

¹ http://linguisticus.com/ru

XX asrlarga kelib tarjima nazariyasi fan sifatida toʻliq shakllanadi va bir qancha nazariy asarlar yaratiladi. Gʻ.Salomovning «Tarjima nazariyasi asoslari» ilmiy asari oʻzbek adabiyotshunosligida tarjima nazariyasiga oid eng yaxshi asarlardan biridir¹. Ushbu kitobda madaniy ilmiy hamkorlik va tarjima, adabiy aloqa va badiiy tarjima, tarjima tarixi saboqlari, badiiy tarjimada uslub, milliy koloritni ifodalashning mazmun va mundarijasi, milliy moslashtirish prinsiplari (oʻzga xalqning ijodiy mahsulini oʻz xalqining xarakteriga moslashtirish, masalan, Navoiyning ruscha tarjimadagi she'rlari rus xalqining mulkiga aylanishi) she'riy tarjimada vazn transformatsiyasi kabi masalalar yoritilgan.

B. Ilyasovning ilmiy asarlari she'riy tarjima asoslari, tarjimon mahoratiga bagʻishlanadi².

Zamonaviy tarjima nazariyasiga oid ilmiy asarlarda koʻproq tarjima usullari, tarjima tanqidi, tarjimaning madaniyatlararo muloqot va qiyosiy adabiyotshunoslikning obyekti sifatidagi oʻrniga ahamiyat qaratilgan³.

Tarjima nazariyasiga oid muhim tushunchalar:

Tarjima nazariyasi umumiy va alohida nazariyaga ajratilib oʻrganiladi. Umumiy tarjima nazariyasi til uchun umumiy

¹ Саломов F. Таржима назарияси асослари. – Тошкент: Ўқитувчи, 1983.

² Илясов Б. Свободный стих и перевод. – Термез: Джайхун, 1995; Авторская концепция оригинала и мастерство переводчика. – Ташкент, 1995; Замысел автора и переводческие плеоназмы // Зунделовические чтения: Материалы международной конференции. – Самарканд, 2000. – C.102 – 105; Искусство поэтического перевода. – Ташкент: Фан, 2007. – 124 с.

³ Топер П.М. Перевод в системе сравнительного литературоведения. – М., 2000; Белик Е.В. Перевод как разновидность межкультурной коммуникации // Преподаватель XXI век. – М., 2013. – С.289 – 293; Утробина А.А. Теория перевода. – М., 2010; Мусаев Қ. Таржима назарияси асослари. – Тошкент: Фан, 2005.

boʻlgan qonuniyatlarni oʻrganadi va barcha tarjima turlarini qamrab oladi. Alohida tarjima nazariyasi esa bir tildan ikkinchi tilga boʻlgan tarjimaning faqat lingvistik aspektlarini oʻrganadi.

Tarjima kommunikativ jarayon hisoblanadi va shu jihatdan ikki xil xususiyatga ega:

- 1. Til ichidagi jihatlar matnning uslubi, matn bilan bogʻliq lingvistik xususiyatlar.
- 2. Tildan tashqari jihatlar lingvomadaniy xususiyatlar va madaniy an'analarning original va tarjimada aks etish darajasi.

Ma'lumki, tildan tashqari jihatlarni yaxshi bilmaslik (oʻzga xalq madaniyatini yaxshi anglamaslik) tarjimaga putur yetkazadi.

Tarjima jarayonida **qonuniy muvofiqlik nazariyasi (тео- рия закономерных соответствий)** mavjud. Bu nazariyaning asosiy mohiyati kelib chiqishi jihatidan muvofiq va muvofiq boʻlmagan tillar orasidagi tarjima bilan bogʻliq.

Tarjima nazariyasida transformatsion, semantik-semiotik, situativ va kommunikativ modellar mavjud.

Tarjimaning transformatsion modeli – boshqa tilga tarjima qilinganida tilning oʻz holatini qanday saqlab qolish darajasidir.

Tarjimaning semantik (ma'no) – semiotik (belgilar sistemasi) modeli – original asar semantikasining tarjimada saqlanish darajasi bilan belgilanadi.

Tarjimaning situativ modeli – tarjimada ayrim vaziyatlarni (masalan, milliy-madaniy) hisobga olib, tarjima qilinishini nazarda tutadi.

Tarjimaning kommunikativ modeli tarjimada oʻsha xalqning madaniyatini hisobga olish va oʻzga tilga adaptatsiyasi masalasidir.

Tarjimaning to'rtta lingvistik jihati mavjud:

- 1. Leksik-semantik.
- 2. Frazeologik.
- 3. Grammatik.
- 4. Stilistik.

Leksik-semantik jihat – tarjimada mumkin qadar originalning ma'noviy mazmunini, lingvistik strukturasini saqlab qolinishidir.

Frazeologik jihat – tarjimada frazeologizmlarning ekvivalentini topish masalasi. Ushbu yoʻnalishdagi muhim muammo madaniy-milliy koloritni tarjimada bera olish malakasi bilan bogʻliq.

Grammatik jihat originalning va tarjimaning grammatik qonuniyatlari, gap qurilishiga mos kelish va kelmasligi bilan bogʻliq.

Tarjimada stilistik jihat emotsional boʻyoqdorlikni, yozuvchi uslubining qay darajada saqlanishi va berilishi bilan bogʻliq. Masalan, Umar Hayyom ruboiylari tarjimasida Shoislom Shomuhammedov stilistik jihatni maksimal darajada saqlagan.

Tarjima jarayonida adekvatlikka erishish vositalari:

Adekvatlik barcha talablarni saqlagan holda, jumladan, kommunikativ muloqotni ham hisobga olib qilingan tarjimadir.

Tarjima jarayonida adekvatlikka erishish vositalariga quyidagilar mansubdir:

- Referensial vositalar bu belgilar, ma'lum ramzlar va boshqa vositalardir. Referensial vositalar asosan ilmiy adabiyotlar yoki tarixiy asarlarda boʻladi, ularni tarjima qilish jarayoni nisbatan oson kechadi.
- Pragmatik vositalar bu soʻzlashish jarayonidagi stilistik
 va emotsional vositalar. Bu vositalar kommunikativ jarayon-

ning yetakchisi hisoblanadi. Masalan, dialoglar, aytishuvlar, ichki nutq va h.k.

– **Grammatik vositalar**. Har bir tarjimonga oʻz tilining grammatik qonuniyatlari asosida tarjima qilishga yordam beruvchi vositalar.

Tarjima imkon qadar original asarga yaqin va toʻgʻri boʻlishi kerak. She'riy asarlar tarjimasida ekviritmiyaga ham e'tibor qilish darkor. Ekviritmiya (lotincha «toʻgʻri ritm») – ritm (ohang)ni saqlagan holatda tarjima qilish demakdir.

Notoʻgʻri tarjima notoʻgʻri talqinni yuzaga keltiradi. Albatta, tarjima «qurbonlarsiz» boʻlmaydi, ammo yuqoridagi jihatlarni hisobga olmaslik, tarjimani originaldan ancha uzoqlashtiradi.

Tarjima nazariyasiga oid ilmiy kitoblarda koʻpincha ИЯ, Пя kabi abriveaturalarga duch kelamiz: ИЯ – исходный язык (original tili), ПЯ – переводный язык (tarjima tili) demakdir.

Tarjima nafaqat tilshunoslik, balki adabiyotshunoslik, jumladan – qiyosiy adabiyotshunoslik obyektidir. Chunki asarning oʻzi va tarjimasi qiyoslash uchun asos vazifasini bajaradi. Tarjimani qiyosiy adabiyotshunoslik nuqtayi nazaridan oʻrganayotgan tadqiqotchi, albatta, bu boradagi nazariy adabiyotlar bilan tanishishi, original asar va tarjimada aynan nimani qiyoslash kerakligini anglab yetishi kerak.

Adabiyotshunos M.Topperning «Tarjima qiyosiy adabiyotshunoslik tizimida» nomli ilmiy asarida tarjimaning komparativistika obyekti sifatidagi xususiyatlari juda yaxshi ochib berilgan¹.

Bizga ma'lumki, tarjima mohiyatan kommunikatsiya (oʻzaro muloqot) va retsepsiya (tarjimaning qabul qilinishi) kabi jarayonlardan iborat. Xuddi shu jarayonlar qiyosiy adabiyot-

shunoslik uchun ham xos boʻlib, ikkita har xil millatga mansub adabiy asarni taqqoslash jarayonida, albatta, bu jarayonlar tahlil qilinadi. Masalan, Nosir Zohid va amerikalik yozuvchi Viktoriya Shvabning turlicha nomdagi «Qasos» romanlarini oʻzbek va xorij kitobxoni bir xil qabul qiladi, bu – retsepsiya jarayoni. Har ikkala romanni taqqoslashga kirishish – ikki millat, ikki madaniyat, ikki yozuvchi oʻrtasidagi kommunikatsiya. Demak, birgina kommunikatsiya va retsepsiya tushunchalarining mavjudli tarjimani qiyosiy adabiyotshunoslik obyekti sifatida oʻrganishga toʻla asos beradi. M.Topperning fikricha, qiyosiy adabiyotshunoslik metodologiyasi jahon adabiyotidagi turli xil milliy adabiyot namunalarini qiyoslash imkonini beradi, bu esa tarjimashunoslikka boʻlgan e'tiborni oshiradi¹.

Badiiy asar tarjimasi bilan shugʻullanmoqchi boʻlgan tadqiqotchi asosan quyidagi jihatlarni qiyosan oʻrganishi mumkin:

- 1. Original asar va tarjimaning muvofiqligi.
- 2. Yozuvchi va tarjimonning ijodiy individualligi.
- 3. Adabiy aloqa va tarjima.
- 4. Asar va uning retsepsiyasi (qanday edi, qanday qabul qilindi?).
 - 5. Tarjima va adabiy ta'sir masalasi.
- 6. Janrlararo tarjima: lirik, epik, dramatik tur janrlari tarjimalarida oʻxshashlik va farqlar.
 - 7. Tarjima va madaniyatlararo kommunikatsiya.
- 8. Badiiy tarjimada lisoniy olamning qayta yaralishi muammosi.
 - 9. Yozuvchi va tarjimon mahorati va h.k. masalalar.

Yuqorida tilga olingan jihatlarning barchasida qiyosiy metoddan va metodologiyaning analiz, sintez, induksiya, deduk-

¹ Топер П.М. Перевод в системе сравнительного литературоведения. – М., 2000. – С.19.

siya, modellashtirish va boshqa nazariy metodlaridan foydalaniladi.

Tarjima qiyosiy adabiyotshunoslik obyekti sifatida oʻrganilganda, ushbu tadqiqot xuddi boshqa komparativistik tadqiqotlarda boʻlgani kabi tarixiy, gnoseologik, mantiqiy, metodologik, ma'naviy-gʻoyaviy mezonlar orqali baholanadi.

Xullas, «asliyat ruhini imkon qadar toʻgʻri va toʻla aks ettiradigan tarjima matnini yaratish uchun tarjimon ham talantli badiiy soʻz ustasi, ham iste'dodli tarjimashunos olim boʻlishi kerak»¹

Nazorat savollari:

- 1. Tarjima tarixiga oid nimalarni bilasiz?
- 2. Tarjima nazariyasiga oid muhim tushunchalarni izohlang?
- 3. Tarjimaning lingvistik jihatlari nimalardan iborat?
- 4. Tarjima jarayonida adekvatlikka erishish vositalarini tushuntiring?
- 5. Tarjima muvaffaqiyatini belgilovchi jihatlar?
- 6. Nima uchun tarjima qiyosiy adabiyotshunoslik obyekti hisoblanadi?
- 7. Badiiy asar tarjimasi bilan shugʻullangan tadqiqotchi asosan qaysi jihatlarni qiyosan oʻrganishi mumkin?

5-mavzu:

ASAR POETIKASI – KOMPARATIVISTIKA OBYEKTI

Reja:

- 5.1. Poetika haqida tushuncha.
- 5.2. Poetikaning tasnifi.
- 5.3. Badiiylik va badiiy mahorat.
- 5.4. Poetikaga oid zamonaviy tadqiqotlar.

Tayanch soʻzlar: poetika, umumiy, tavsifiy normativ, nazariy va tarixiy poetika, poetik mahorat, badiiylik, badiiy olam, mezon.

Qiyosiy adabiyotshunoslik boʻyicha olib boriladigan tadqiqotlarning aksariyati poetika tushunchasi bilan bogʻliq. Poetikaning asosiy maqsadi asar yaralishiga xizmat qiluvchi barcha badiiy unsurlarni yuzaga chiqarish, baholash va yozuvchining mahoratini koʻrsatib berishdan iborat. Muayyan yozuvchi yoki shoirning badiiy asariga xos xususiyatlarni talab darajasida tahlil etish uchun avvalo poetika nazariyasini chuqur oʻrganib chiqish kerak.

Poetika atamasini birinchi marta Arastu asarida qoʻllagan¹. Faylasuf adabiyotni epos, lirika, drama kabi uch turga ajratish barobarida ularning badiiy xususiyatlariga xos jihatlarni ham tahlilga tortadi. Shundan soʻng Sharq va Gʻarbda poetika bilan bogʻliq koʻplab ilmiy asarlar yuzaga keladi.

Rus olimi A.A.Potebnya (1835 – 1891) fan tarixida birinchilardan boʻlib, poetikaning nazariy asoslari haqida ilmiy asarlar

¹ Мусаев Қ. Таржима назарияси асослари. – Тошкент: Фан, 2005. – Б.334.

¹ Аристотель. Поэтика. Об искусстве поэзии. – М., 1961.

yozgan.¹ U «Tarixiy poetika» kitobida nazm va nasr, badiiy tasvir vositalari, poetik va mifologik tafakkur, stilistik figuralar haqida ilmiy-nazariy xulosalarini beradi. Uning adabiyotshunoslikka doir ayrim izlanishlari²ni keyinchalik rus olimi M.Baxtin davom ettirgan³. U.Joʻraqulovning ta'kidlashicha, yirik nazariyotchi olim M.M.Baxtin asarlarining birortasi ham tarixiy va nazariy poetika sintezisiz amalga oshirilmagan⁴.

«Poetika» – yunonchadan olingan boʻlib, «san'at, yaratuv-chanlik, mahorat» degan ma'nolarni bildiradi. Rus olimi V.M. Jirmunskiyning fikricha, **poetika poeziyani san'at darajasida oʻrganadigan fandir**. Shu jihatdan olimning «adabiyot haqidagi fan poetika belgisi ostida rivojlanadi» ⁵ degan fikri hozir ham dolzarbligini yoʻqotmagan.

Zamonaviy adabiyotshunoslikda poetikaning umumiy, tavsifiy normativ, nazariy va tarixiy poetika kabi 5 ta asosiy turi ajratib koʻrsatilgan⁶:

- **1. Umumiy poetika** barcha adabiyotlar uchun xos boʻlgan badiiyat mezonlarini oʻrganadi. (Masalan: ijodiy prinsiplar, muallif pozitsiyasi va h.k.)
- **2. Tavsifiy (xususiy) poetika** konkret asarlarning yaratilish jarayonini va yozuvchining badiiy olamini oʻrganadi. (Masalan: H.Olimjonning badiiy olami, Choʻlpon nasri poetikasi h.k)
- **3. Normativ poetika –** «badiiy asar aslida qanday yozilish kerak?» degan masalaga oydinlik kiritadi. Normativ poetika

adabiy asarlarni baholaydi va adabiy tanqid obyekti hisoblanadi. U.Toʻychiyevning «Oʻzbek adabiyotida badiiylik mezonlari va ularning maromlari», B.Sarimsoqovning «Badiiylik asoslari va mezonlari», A.Rasulovning «Badiiylik mezonlari» asarlari normativ poetikaga oid ilmiy asarlar hisoblanadi¹.

- **4.** Nazariy poetika bevosita adabiyot nazariyasi bilan bogʻliq boʻlib, har bitta koʻrib chiqilayotgan adabiy hodisaning nazariy tomonini yoritib beradi. (Masalan, Oybek romanlarida psixologizm, Pushkin she'riyatida shakl va mazmun) U.Joʻraqulovning nazariy poetika masalalariga bagʻishlangan asarida poetikaning muallif, janr, xronotop kabi qirralari ochib berilgan².
- **5. Tarixiy poetika** bunda asar yaratilishiga xizmat qiladigan barcha badiiy unsurlarning genezisi oʻrganiladi. Ijodkorning badiiy olami va mahorati tarixiy-adabiy jarayonga va davr ruhiga bogʻlab ochib beriladi. Tarixiy poetika rivojida A.Veselovskiy, M.Jirmunskiy, N.Konrad, I.G.Neupokoyeva, M.M.Baxtin kabi olimlarning ilmiy asarlari alohida ahamiyat kasb etadi³.

I.V.Stebleva, A.B.Kudelin, B.Ya.Shidfar, Ye.E.Bertels, V.I.Braginskiy, R.Musulmonqulov, Sh.M.Shukurovlarning ilmiy izlanishlari sharqshunoslikdagi tarixiy poetika masalalariga bagʻishlangan⁴.

¹ Потебня А.А. Эстетика и поэтика. – М., 1976: Теоретическая поэтика. – М., 1990.

² Потебня А.А. Из записок по теории словесности. – Харьков, 1905.

³ Бахтин М.М. Эстетика словесного творчества. – М.: Искусство, 1979.

⁴ Бахтин М. Романда замон ва хронотоп шакллари. Тарихий поэтикадан очерклар / Рус тилидан У.Жўрақулов таржимаси. — Тошкент, 2015.

⁵ Жирмунский В.М. Задачи поэтики / Теория литературы. Поэтика. Стилистика. – Л., 1977. – С.15: Историческая поэтика: Итоги и перспективы изучения. – М., 1986. – С.12.

⁶ Темирболат А.Б Поэтика литературы. Учебное пособие. – Алмааты, 2011.

¹ Тўйчиев У. Ўзбек адабиётида бадиийлик мезонлари ва уларнинг маромлари. — Тошкент, 2011; Саримсоқов Б. Бадиийлик асослари ва мезонлари. — Тошкент, 2004; Расулов А. Бадиийлик — безавол янгилик. — Тошкент: Шарқ, 2007.

² Жўракулов У. Назарий поэтика масалалари: Муаллиф. Жанр. Хронотоп. – Тошкент: Faфур Fулом, 2015.

³ Веселовский А.Н. Историческая поэтика. – М., 1989; Жирмунский В.М. Историческая поэтика А.Н.Веселовского и ее источники // Ученые записки ЛГУ. Сер. филол. наук. 1939. Вып. №3. – С.3 – 19; Конрад Н.И. Запад и Восток. – М.: Восточная литература, 1966; Михайлов А.В. Проблемы исторической поэтики в истории немецкой культуры: Очерки из истории филологической науки. – М., 1989; Храпченко М. Историческая поэтика: основные направления исследований // Вопросы литературы. 1982. №9. – С.73 – 79; Историческая поэтика: Итоги и перспективы изучения. – М., 1986.

⁴ Проблемы исторической поэтики литератур Востока. Коллективная монография. – М.: Наука, 1988.

Poetik yoki badiiy mahorat yozuvchining oʻziga xos badiiy olami, badiiy asarni yaratishdagi san'atkorligidir. Ijodkorning badiiy mahorati asar tilining mohirona berilishida, obraz yaratishida, badiiy tasvir vositalaridan oʻz oʻrnida, mohirona foydalanishida, asar kompozitsiyasini toʻgʻri va tizimli shakllantirishda va h.k.larda yaqqol namoyon boʻladi.

Bulardan tashqari badiiylikning quyidagi 10 ta mezoni¹ yozuvchining badiiy mahoratini aniqlashga yordam beradi:

- 1. Gumanizm (insonparvarlik).
- 2. Estetik tuygʻuni shakllantira olish.
- 3. Hayotiy haqiqatga sodiqlik.
- 4. Chugur mushohoda.
- 5. Muallif gʻoyasining mantiqiyligi va ijodiy fantaziyasining kengligi.
 - 6. Umumlashtirish va tipiklashtirish qobiliyati.
- 7. Badiiy detallarning aniqligi va qaysidir gʻoyaga xizmat qilishi.
- 8. Syujet qurilishi va obrazlar tizimini yaratishdagi mahorat.
- 9. Qahramonlar ichki dunyosini mahorat bilan ochib berilishi.
 - 10. Asar tilining boyligi va rang-barangligi.

Badiiy asar kompozitsiyasiga xizmat qiladigan har bir unsurning poetikasini oʻrganish va shu asosda ilmiy tadqiqot olib borish mumkin. Masalan, rus olimlaridan D.S.Lixachev qadim rus adabiyoti poetikasini, I.V.Silanev motivlarning, V.V.Vinogradov syujet va uslubning, N.E.Falikova xronotopning, N.Bandurina va Z.Suvanov obrazlarning, Y.Solijonov badiiy nutqning, K.Hamrayev kompozitsiyaning poetikasini tadqiq qilishgan va

muhim ilmiy-nazariy xulosalarni chiqarishgan¹. Ayniqsa, asar syujeti va janrlar tipologiyasi bilan shugʻullanmoqchi boʻlgan olimlarga **O.M.Freydenberning** fundamental monografiyasi juda katta nazariy material beradi².

Adabiyotshunos olimlarning tafakkur tarzi va tadqiqotchilik mahoratini ham poetika nuqtayi nazaridan oʻrganish mumkin. Masalan, rus olimi O.Presnyakov nazariyotchi olim A.A.Potebnya ilmiy ijodining poetikasini oʻrgangan³.

Poetikaga oid zamonaviy tadqiqotlar asosan nazariy va tarixiy poetika masalalariga bagʻishlanadi. Tarixiy poetikaga oid maxsus jurnal ham mavjud boʻlib, unda jahon adabiyoti boʻyicha rus, ingliz, italyan va ispan tillarida eng yaxshi maqolalar chop etiladi⁴.

Nazorat savollari:

- 1. Poetika deganda nimani tushunasiz?
- 2. Poetikaning qanday turlarini bilasiz?
- 3. Badiiylik va badiiy mahorat tushunchalarini izohlang?
- 4. Yozuvchining badiiy mahorati nimalarda namoyon boʻladi?
- 5. Ilmiy asarlar poetikasini oʻrganish mumkinmi?
- 6. Poetikaga oid qanday zamonaviy tadqiqotlarni bilasiz?

¹ Темирболат А.Б. Поэтика литературы. Учебное пособие. – Алматы, 2011.

¹Лихачев Д.С. Поэтика древнерусской литературы. – М.-Л., 1967; Силантьев И.В. Поэтика мотива. – М., 2004; Виноградов В.В. Сюжет и стиль – М., 1963; Фаликова Н.Э. Хронотоп как категория исторической поэтики // Проблемы исторической поэтики. – Петрозаводск, 1992. №2 // http://poetica.pro; Бандурина Н. Поэтика образа в литературном творчестве В.Г.Шершеневича. – М., 2012; Суванов З. Тоғай Мурод насрида образлар поэтикаси. – Тошкент, 2019; Солижонов Й. XX асрнинг 80 – 90-йиллари ўзбек насрида бадиий нутқ поэтикаси. Филол. фан. докт... дисс. – Тошкент, 2002; Хамраев К. Хозирги ўзбек ҳикоясида композиция поэтикаси. Филол. фан. докт... дисс. автореф. – Тошкент, 2018.

² Фрейденбер О.М. Поэтика сюжета и жанра. – М.: Лабиринт, 1997. – 448 с.

³ Пресняков О.П. Поэтика познания и творчества: Теория словесности А.А. Потебни. – М., 1980.

⁴Проблемы исторической поэтики // http://poetica.pro

6-mavzu:

ADABIYOTLARARO JARAYONLARNING SHAKLLARI

Reja:

- 6.1. Milliy, hududiy va jahon adabiyoti.
- 6.2. Adabiyotlararo aloqalar.
- 6.3. Tipologiya va tipologik mushtaraklik.
- 6.4. Adabiyotshunoslikda multikulturizm.

Tayanch tushunchalar: milliy, hududiy va jahon adabiyoti, adabiy aloqalar, Alisher Navoiy, multikulturalizm, A.Hayitmetov, N.Konrad, M.Jirmunskiy, Sh.Rizayev.

Milliy, hududiy va jahon adabiyoti doimo oʻzaro aloqada rivojlanadi va bir-birini boyitadi. Jahonda biror adabiyot faqat oʻz qobigʻida, oʻz adabiy an'analari doirasida rivojlanmaydi, balki boshqa adabiyotlarning ilgʻor tajribalariga tayangan holda oʻz taraqqiyotini belgilaydi.

Milliy adabiyot – har bir xalq madaniy hayotining ajralmas qismi, muayyan millatning, masalan oʻzbek, rus, yapon xalqining adabiy merosi, nazmiy va nasriy durdonalari, oʻlmas asarlaridir. Rus komparativist olimi B.G.Reizovning fikriga koʻra, milliy adabiyot koʻplab adabiy va madaniy kuchlarning, tendensiya va imkoniyatlarning birlashuvidir¹.

Milliy adabiyotning asosiy koʻrsatkichlaridan biri unda biror xalq mentalitetiga xos an'analarning, urf-odatlarning, millat ruhiyatining aks etishidir.

¹Данилина Г.И. Сравнительное литературоведение. Хрестоматия. – Тюмень, 2011. – С.134.

Regional adabiyot geografik jihatdan ma'lum chegaralanishga ega boʻlgan hududiy adabiyotdir. Masalan, Markaziy Osiyo xalqlari adabiyoti, Yevropa adabiyoti, Yaqin Sharq mamlakatlari adabiyoti va h.k. Ularni tarixiy taraqqiyot bosqichlari, an'analar va ma'lum bir hudud birlashtirib turadi. Bunday tasnif genetik jihatdan bir-biriga yaqin bo'lgan yoki tarixiy taqdir birlashtirgan xalqlar adabiyotiga xos umumiy jihatlarni aniqlashga yordam beradi. Masalan, «oʻzbek, turkman, qozoq, qirgʻiz, tojik va qoraqalpoq xalqlari nafaqat geografik jihatdan oʻxshash mintaqada yoki ijtimoiy-tarixiy sharoiti umumiy xususiyatga ega hududda yashaydi, balki ularning tili, adabiyoti, tarixi va urf-odatlarida ham mushtaraklik oz emas. Ularning xalq ogʻzaki ijodi, yozma adabiyoti tarixida oʻxshashliklar koʻpligiga misollar yetarli. Bu omillar Markaziy Osiyo adabiyotlarini oʻzaro yaqinlashtirishni, ular oʻrtasida adabiy aloqalar va ta'sirlarning yuzaga kelishi va muvaffaqiyatli rivojlanishini ta'minlaydi»¹.

«Jahon adabiyoti» deganda, u yoki bu mamlakatda yaratilib, oʻzining estetik darajasi boʻyicha butun dunyoda talab qilingan asarlar tushunilgan»².

Qaysi mashhur asarni olmaylik, u avvalo, ma'lum bir millat vakilining ijodiy merosi, u yoki bu xalqning ma'naviy boyligidir. Masalan, Alisher Navoiy asarlari turkiy xalqlarning ma'naviy merosi boʻlishi bilan birga, butun dunyo xalqlarining intellektual boyligidir. Chunki shoirning asarlarida ifodalangan insonparvarlik, mardlik, doʻstlik kabi umumbashariy gʻoyalar barcha xalqlar uchun birdek qadrli va ahamiyatlidir.

¹ Курамбоев К. Адабий алоқалар — миллий адабиётлар тараққиётининг қонуниятларидан бири // http://uzadab.ndpi.uz/adabiy aloqalar.html

² Qosimov A., Hamroqulov A., Xoʻjayev S. Qiyosiy adabiyotshunoslik. – Toshkent: Akademnashr, 2019. – B.35.

Har bir millat adabiyoti dunyo badiiy tafakkurining ajralmas qismini tashkil qiladi. Jahon xalqlarining qiziqishi va oʻqishi badiiy adabiyot ahamiyatini belgilovchi asosiy mezonlardandir. U yoki bu xalqning jahonda tanilishi, eng avvalo, oʻsha xalq madaniyati, san'ati va adabiyotining qanday miqyosda tarqalishi va tan olinishiga bogʻliqdir.

Adabiyotlararo aloqalar har bir millatning ma'naviy-madaniy taraqqiyotida muhim ahamiyat kasb etadi. Adabiy aloqalarning qiyosiy adabiyotshunoslik obyekti sifatidagi oʻrni, uning mohiyati haqida juda koʻp ilmiy asar bitilgan. A.Dima, I.Neupokoyeva, N.Konrad, M.Jirmunskiy, B.Nazarov, N.Karimov, B.Karimov va boshqa olimlarning tadqiqotlarida adabiy aloqalar va ularning adabiyotshunoslikdagi ahamiyati borasida muhim ilmiy-nazariy xulosalar bayon qilingan.

T.T.Xamidova, M.Ye. Rasuli , S.Matkarimova, T.Sultanov va boshqa olimlarning ilmiy izlanishlari bevosita adabiy aloqalarga bagʻishlangan¹. I.G.Neupokoyeva xalqlararo adabiy aloqalarni tipologik va genetik turlarga boʻlib oʻrganishni, bunda ijtimoiy omillarni hisobga olish zarurligini qayd etadi. Shuningdek, olima adabiy aloqalar tarixiy ehtiyoj, tajriba almashish maydoni ekanini alohida ta'kidlaydi («...готовых творческих решений ни одна из литератур другой дат не может, но и ни одна литература не может пройти мимо того инонационалного, художественного опыта, который ей исторически нужен»)².

N.I.Konrad adabiy aloqalarni bir xalq adabiyotining boshqa bir xalq adabiyoti olamiga kirib borishi deb ta'riflaydi va adabiyotlararo aloqalarning 5 ta asosiy turini ajratib koʻrsatadi:

- 1. Badiiy asarlar bilan originalda tanishish, oʻrganish va oʻz xalqi orasida ommalashtirish. Masalan, Yevropa yoki rus sharqshunoslari Alisher Navoiy asarlarini tarjimada emas, originalda oʻqiy olishgan.
- 2. Tarjimalar bir xalq adabiyotining boshqa bir xalq adabiyoti olamiga kirib borishidagi yana bir adabiy aloqa shaklidir. Bunda tarjimon adabiy vositachi (литературный посредник) vazifasini bajaradi;
- 3. Aynan bir xil mavzuning turli xalqlar adabiyotida yoritilishi ham adabiyotlararo aloqaning bir shakli. Masalan, Nizomiy, Dehlaviy, Navoiyning «Xamsa» asari aynan adabiy aloqalarning samarali natijasidir.
- 4. Jahon adabiy aloqalari tarixi bir xalq adabiyotining boshqa bir xalq adabiyoti olamiga kirib borishidagi yana bir shakl. Adabiy aloqalarning bu turini N.I.Konrad «milliy adaptatsiya» deb izohlaydi. Masalan, «Otogi boko» (1666) gʻaroyib voqealar haqidagi hikoyalar toʻplami. Asardagi voqelar koʻp jihatdan «Szyanden sinxua» nomli xitoy hikoyalariga mushtarak. Lekin xitoy hikoyalaridan ta'sirlanib yozilgan yapon hikoyalari, yapon odamiga moʻljallanib, ularning tafakkur tarziga mos ravishda bitilgan.
- 5. Hamma xalqlarda mavjud manoqib qissalar (повесть житие) va ularning oʻzaro adabiy aloqasi. Masalan, hotamtoylikda tengsiz Budda, chiroy timsoli Yusuf, Aleksandr Nevskiy haqidagi hikoyatlar¹. Bu kabi hikoyalar bugun narrativ proza

¹ Хамидова Т. Русско-узбекские литературные связи в годы Великой отечественной войны. – Ташкент, 1973; Расули М.Е. К проблеме взаимовлияния и взаимообогащения русской и узбекской литератур. – Ташкент: Фан, 1978; Маткаримова С. Анъана, янгилик ва бадиий махорат (Хоразм шоирлари ижодида Навоий анъаналари мисолида). – Тошкент, 2019; Султанов Т. Алишер Навоий ва Озарбайжон адабиёти: тарихий илдизлар, анъаналар, ворисийлик (Кишварий ва Содикий асарлари мисолида). – Тошкент, 2019.

² Неупокоева И.Г. История всемирной литературы. Проблемы системного и сравнительного анализа. — М.: Наука, 1976. — С.85.

 $^{^1}$ Batafsil qarang: Конрад Н.И. К вопросу о литературных связях // Литература и театр. — М.: Наука, 1978. —5.49 — 59.

deb ataladi. Shuningdek, badiiy asar yozishda narrativ usuldan (qiziqarli hikoya qilish san'ati) ham unumli foydalanilmoqda¹.

M.Jirmunskiyning fikricha, adabiy aloqalar va adabiy ta'sir masalasi tarixiy kategoriya boʻlib, konkret tarixiy sharoitlarda turli xil intensivlik darajasida va har xil shaklda namoyon boʻladi (Литературные связи и взаимодействия представляют категорию историческую и в различных конкретных исторических условиях имеют разную степен интенсивности и принимают разные формы)².

Adabiyotshunos K.Quramboyev ta'kidlaganidek, adabiy aloqalar va ta'sirlar masalasi milliy adabiyotlar taraqqiyotini kafolatlaydigan omillardan biri ekani isbot talab qilmaydigan haqiqatga aylangan. Jahonda biror adabiyot yoʻqki, faqat oʻz qobigʻida, oʻz adabiyoti an'analari doirasida boshqa milliy adabiyotlarning ilgʻor tajribalariga tayanmagan holda rivojlanib, oʻz taraqqiyotining yuqori choʻqqisiga koʻtarilgan boʻlsin³. Soʻnggi yillarda milliy adabiyotimizni rivojlantirish, oʻzbek mumtoz va zamonaviy adabiyotini xalqaro miqyosda targʻib qilish, bu jarayonda dunyo xalqlarining, jumladan, qardosh ellarning adabiyoti bilan yaqindan tanishish, ularning eng sara adabiy asarlarini asliyatidan oʻzbek tiliga tarjima qilish borasida keng qamrovli ishlar amalga oshirilmoqda.

Sh.Rizayev adabiy aloqa har qanday adabiyotning rivoji uchun nihoyatda zarur omillardan biri ekanini ta'kidlarkan, **adabiy mahdudlik** va badiiy tafakkurning biqiq xolga tushib qolishi, avvalo, boshqa adabiyotlarni oʻrganmaslik, oʻz adabiyotlar tanqidiy nazar bilan qaray bilmaslik, qiyoslash, so-

lishtirish imkoniyatidan mahrumlik hisobiga roʻy berishi, shu ma'noda uzoq va yaqin xorijdagi barcha adabiy hodisalarni oʻrganib borish, badiiy yangiliklardan boxabarlik, mutolaa va ijodiy aloqalarga kirishish muayyan xalqqa mansub har qanday adabiy jarayonni professional jihatdan oziqlantirishi haqidagi muhim fikrni bildiradi¹.

Tipologiya – genetik jihatdan oʻzaro bogʻlanmagan, tili, tarixi, madaniyati tamomila farq qiladigan xalqlar adabiyotida mushtarak jihatlarni aniqlashga yordam beradigan komparativistik tushuncha hisoblanadi. Adabiy hodisalarni tipologik jihatdan oʻrganish, jahon adabiyotida kechadigan umumiy jarayonlarni anglab yetishda, adabiyotlararo aloqalarni yuzaga chiqarishda muhim rol oʻynaydi.

Qiyoslash tipologiyasi deganda biz umumiy xususiyatlariga (janri, etnik xususiyatlariga va h.k.) koʻra u yoki bu adabiyot namunalarining qiyoslanishini tushunamiz. Tipologiya natijasida ayrim adabiyotlarga xos boʻlgan umumiy qonuniyatlar shakllanadi.

D.Dyurishin adabiyotni tipologik oʻrganish yoʻnalishining jahondagi eng yirik mutaxassisi, mashhur slovak olimidir. U oʻz izlanishlarida tipologik tahlilni adabiyotshunoslikning muhim masalalaridan biri sifatida e'tirof etadi va uning vazifasi adabiy ta'sirning mohiyatini aniqlash, ichki qonuniyatlarini ochishdan iboratligini ta'kidlaydi².

D.Dyurishin tipologik oʻxshashliklarni uch turga ajratib oʻrganishni tavsiya qiladi:

1. Ijtimoiy-tipologik oʻxshashliklar. Bunda ijtimoiy shart-sharoitlarning asarning gʻoyaviy-falsafiy mazmunida aks etishi nazarda tutiladi. Ijtimoiy va gʻoyaviy omillar badiiy asar

¹ Qarang: О нарративных техниках // http:// litmasters.ru/pisatelskoe-masterstvo/o-narrativnvx-texnikax.html

² Жирмунский В.М. Сравнительное литературоведение. – Л., 1979. – С.77.

³ Курамбоев К. Адабий алоқалар – миллий адабиётлар тараққиётининг қонуниятларидан бири // <http://uzadab.ndpi.uz/adabiy aloqalar.html>

¹ Adabiy aloqalar ijodiy jarayon koʻzgusi (davra suhbati, 2014) // https://ziyouz.uz

² Batafsil garang: Дюришин Д. Теория сравнительнго изучения литературы. – М., 1979.

tarkibiga singdirilgan boʻlib, ayniqsa, gʻoyaviy mazmuni, muallifning davr, ijtimoiy tuzumga nisbatan falsafiy qarashlarini ifodalashda yaqqol namoyon boʻladi. Bunda adabiyotda oʻz aksini topgan ilm-fan, san'at sohalari va huquqiy ong rivojiga turtki beruvchi ijtimoiy-siyosiy, gʻoyaviy qarashlar, axloqqa oid muammolar bilan bogʻliq voqea-hodisalar doirasi nazarda tutiladi.

- 2. Adabiy-tipologik oʻxshashliklar. Mazkur turdagi oʻxshashliklar sof adabiy hodisaga asoslanadi. Adabiyotning bu sohasi qiyosiy-tipologik tadqiqotning obyekti boʻlib, aynan shu yerda u adabiyot nazariyasi bilan birlashadi. Badiiy asardagi umumiy va farqli jihatlarni nafaqat adabiy yoʻnalish, janrlar nuqtayi nazaridan, balki gʻoyaviy-psixologik yondashuv, qahramonlar tavsifi, kompozitsiya, syujet, motivlar, obrazlar tizimi, tasviriy vositalar, she'r tuzilishi unsurlari singari badiiylikni ta'minlovchi komponentlar nuqtayi nazaridan oʻrganish adabiyotshunoslik uchun muhim natijalar beradi. Adabiyotshunos olim Sh.Sirojiddinovning Alisher Navoiy manbalarining qiyosiy-tipologik tekstologik tahliliga bagʻishlangan monografiyasi adabiy-tipologik oʻxshashliklar tahlil qilingan ilmiy asarlardan hisoblanadi¹.
- 3. Psixologik-tipologik oʻxshashliklar. Zamonaviy adabiyot-shunoslikda badiiy asarning adabiy jarayondagi oʻrnini belgilash maqsadida janr-uslubiy jihatdan oʻrganishga katta e'tibor qaratilmoqda. Bunda ijodkor shaxsining ma'lum bir asarni yaratishdan individual psixologik moyilligi tushuniladi. Komparativistlar koʻp hollarda bunday koʻrinishlarni qiyoslanayotgan mualliflarning tabiatidagi ruhiy yaqinlik bilan izohlaydilar. Agar e'tibor qaratil-

sa, «Kichkina shahzoda» va «Oq kema» qissasi oʻrtasidagi oʻxshashlikning asosi bosh qahramonlar ruhiy kechinmalarida namoyon boʻladi»¹.

N.Toirova, A.Qosimov, B.Xoliqov, Z.Qobilova, T.Proxorova, O.Poxolenkov kabi olimlarning tadqiqotlari tipologik tahlilga asoslangan ilmiy ishlar hisoblanadi². Jahon adabiyotshunosligida adabiy janrlar tipologiyasiga oid ilmiy izlanishlar ham mavjud³. Bu kabi tadqiqotlar genetik jihatdan bir-biriga aloqasi boʻlmagan xalqlar adabiyotidagi mushtarak tomonlarni ochib berishi bilan birga, xalqaro adabiy aloqalar rivojiga ham katta hissa qoʻsha oladi.

Adabiyotlararo aloqalar tizimida **multikulturalizm** (koʻpmillatli madaniyat) ham muhim ahamiyat kasb etadi. Multikulturalizmning gʻoyaviy mazmuni koʻp millatli davlatlarda turli xalqlarning oʻzaro kelishib yashashiga, doʻstona munosabatda boʻlib, bir-birlarining madaniyati, tarixi va adabiyotini hurmat qilishga yoʻnaltirilgan. XX asrning oxirgi choragida

¹ Сирожиддинов Ш. Алишер Навоий манбаларининг қиёсий-типологик текстологик таҳлили. – Тошкент: Akademnashr, 2011.

¹ Batafsil qarang: Qosimov A., Hamroqulov A., Xoʻjayev S. Qiyosiy adabiyotshunoslik. – Toshkent: Akademnashr, 2019.

² Қосимов А. Типологик ўхшашликлар ва ўзаро таъсирнинг назарий муаммолари (А.де Сент-Экзюпери ва А.Камю ижоди мисолида). — Тошкент, 2007; Тоирова Н. Бадиий адабиётда кўзгу ва сурат рамзларининг ғоявий-эстетик вазифалари (Омон Мухтор ва Оскар Уайльд асарлари асосида). — Тошкент, 2018; Холиков Б.А. Детектив романларда вокеликнинг бадиий талқинини тизимли моделлаштириш (Марио Пьюзонинг «Тhe Godfather» ва Тохир Маликнинг «Шайтанат» асарлари мисолида). — Тошкент, 2018; Қобилова Н.С. Жек Лондон ва Абдулла Қаҳҳор ижодида бадиий психологизм. — Тошкент, 2019; Прохорова Т. Неожиданные схождения: о типологической близости искусствоведения. — М., 2008. №1; Похаленков О. Концепт «враг» в творчестве Эриха Марии Ремарка и советской «лейтенантской прозе» 1950 — 60-х гг.: контактные связи и типологические схождения. — Смоленск, 2011.

³ Бахтин М.М. Эстетика словесного творчества // К исторической типологии романа. – М., 1979; Эсалнек А.Я. Типология романа (теоретический и историко-литературный аспекты): монография. – М., 1991; Жирмунский В.М. Типология восточной поэмы // Советская тюркология. – М., 1973. №4. – С.35 – 48.

AQShda shakllangan siyosatdir¹. Multikulturalizm ijtimoiy hayotning barcha qirralarini, jumladan, adabiyotni ham qamrab oladi.

Multikulturalizm qiyosiy adabiyotshunoslikda, ayniqsa, adabiyotlararo jarayonlar mohiyatini belgilashda muhim ahamiyatga ega. Uning asosini **yevropatsentrizmdan** (*yevropa xalqlari madaniyati, adabiyoti, tarixi va boshqa xususiyatlarini boshqa xalqlardan ustun qoʻyish*) voz kechish, bir xalqni boshqasidan ustun qoʻymaslik, madaniyat va adabiyotning yagona modelini yaratish gʻoyasi tashkil qiladi. Shu jihatdan multikulturalizm namoyandalari insoniyat sivilizatsiyasini, jumladan, jahon adabiyotini ulkan «mozaikaga» oʻxshatishadi. Ularning fikricha, qotib qolgan dogmalar, markazlashtirish mantiqi bilan u yoki bu adabiy hodisalarga baho berib boʻlmaydi. Badiiy adabiyotdagi multikulturalizm barcha adabiy hodisalarni teng koʻrib, birini ikkinchidan kamsitmagan holda oʻrganadi.

Rus adabiyotshunosligida multikulturalizmga xos ilk nazariy fikrlar XX asr boshida bitilgan ilmiy maqolalarda uchraydi. Rus olimi **S.A.Vengerovning** ta'kidlashicha(1919), haqiqiy adabiyotshunos diqqatini faqat mashhur namoyandalargagina emas, adabiy jarayonning boshqa vakillariga ham qaratmogʻi kerak. Chunki ba'zan aynan ular u yoki bu davrga xos xususiyatlarni yaqqolroq ifodalashga qodirdirlar (...я считаю совершенно ненаучным изучат литературу толко в ее крупных представителях. Бывает даже так, что мелкий писател, сплош да рядом ярче характеризует ту или другую эпоху, чем писател крупный)².

Ba'zi ilmiy maqolalarda aynan bir masalaga turlicha qarashni kuzatish mumkin. V.M.Jirmunskiy(1891–1971) va N.I.Konrad (1891–1970) bir makon va bir zamonda yashab ijod qilgan, qiyosiy adabiyotshunoslik metodologiyasi rivojiga ulkan hissa qoʻshgan taniqli olimlardir. Ularning «Alisher Navoiy va Renessans» masalasiga bagʻishlangan maqolalarida N.I.Konrad multikulturalizm gʻoyalariga¹, V.M.Jirmunskiy yevropatsentrizm aqidalariga² tayanadi.

N.I.Konrad «Layli va Majnun» asaridagi epizodlarni Gʻarb adabiyotidagi Tristan va Izolda, Usta va Margarita bilan qiyoslasa, V.M.Jirmunskiy Navoiy qarashlarini Dante, Leonardo da Vinchi, Petrarka qarashlari bilan taqqoslaydi. N.I.Konrad Navoiy ijodidagi universallikka e'tibor qaratib, Navoiy barcha xalqlar shoiri, degan xulosaga keladi. V.M.Jirmunskiy esa Navoiy «uygʻonish davri Gʻarb titanlari» bilan hamfikr ekani, ularning gʻoyalari shoir asarlarida aks etgani haqidagi fikrni ilgari suradi.

Har ikkala maqolada ham Renessans umumiy maydon sifatida koʻrsatilgan, ammo V.M.Jirmunskiy gʻarbning madaniyat, ma'naviyat, ilm-fan jabhasidagi yutuqlari sharqnikidan ustunligini koʻrsatishga harakat qiladi. N.I.Konrad esa Sharq ma'naviyati va madaniyati oʻzining qadim sarchashmalariga ega boʻlgani, bu borada Gʻarbga ehtiyoj sezmaganini qayd qiladi. Olim multikulturalizmdagi xalqlararo tenglikka asoslangan konsepsiya asosida hech bir xalq oʻzini boshqasidan ustun qoʻyishi kerak emasligi haqidagi gʻoyani qoʻllab quvvatlaydi (...ни у кого нет право считат себя народом особым,

¹Гасанова Н. К определению концепта «мультикультурализм» // https://cyberleninka.ru/article/v/k-opredeleniyu-kontsepta-multikulturalizm

² Академические школы в русском литературоведении. – М.: Наука, 1975. – С.179.

 $^{^{1}}$ Конрад Н.И. Средневосточное возрождение и Алишер Навои // Иностранная литература. №2. – М., 1966. – С.212 – 220.

² Жирмунский В.М. Алишер Навои и проблема Ренессанса в восточных литературах // Ученые записки ЛГУ. Сер. филол. наук. 1961. Вып. №59. — С.86 — 97.

превосходящэм всех других, мания величия у натсии стол же ложна, вредна и просто смешна, как и мания величия у отделного человека)¹.

Xullas, milliy, hududiy, jahon adabiyoti, adabiy aloqalar, multikulturalizm va boshqalar adabiyotlararo jarayonlarning shakllari hisoblanadi.

Nazorat savollari:

- 1. Milliy, hududiy va jahon adabiyoti tushunchalarini izohlang.
- 2. Hududiy va jahon adabiyoti namunalariga misol keltiring.
- 3. Nima uchun adabiyotlararo aloqalar komparativistika obyekti hisoblanadi?
- 4. Tipologiya va tipologik mushtaraklik tushunchalariga izoh bering
- 5. Adabiyotshunoslikda multikulturizm nima?

¹ Конрад Н.И. Средневосточное возрождение. – С.220.

7-mavzu:

OʻZBEK ADABIYOTSHUNOSLIGIDA QIYOSIY TADQIQOTLAR

Tayanch tushunchalar: qiyosiy tadqiqotlar, oʻzbek adabiyoti, jahon adabiyoti, N.Karimov, A.Hayitmetov, E.Rustamov, M.Xajiyeva, N.Toirova, biografik roman, Abdulla Qahhor, Jek London.

Oʻzbek adabiyotshunosligida qiyosiy yoʻnalishdagi ilmiy ishlar olib borish jarayoni asosan XX asrning ikkinchi yarmidan boshlangan. N.Vladimirovaning rus tilidan oʻzbek tiliga tarjimalarning nazariy asoslariga, A.Mirzoyevning Foniy va Hofiz she'riyatiga bagʻishlangan ilmiy ishlari bu boradagi ilk tadqiqotlar hisoblanadi¹.

Bugungi kunga kelib, komparativisitik tadqiqotlar soni va salmogʻi oshib bormoqda. Oʻz davrida taniqli navoiyshunos A.Hayitmetov, «Xamsa» Alisher Navoiy ijodining eng katta yutugʻi boʻlishi bilan birga, uning yuzaga kelishi faqat oʻzbek adabiyoti tarixidagina emas, jahon adabiyoti tarixida buyuk voqea ekanini, Navoiy va jahon adabiyoti mavzusi nisbatan yangi soha boʻlib, bugungacha sanoqli ishlar amalga oshirilganini alohida ta'kidlagan edi².

Ilmiy-adabiy aloqalar natijasida chinakam asarlar boshqa xalqlarning adabiyot olamiga tez kirib boradi va qaysidir darajada ularning ham ma'naviy mulkiga aylanadi. Demak, Navoiy, Bobur, Shekspir, Dante va boshqa koʻplab shoir hamda yozuv-

¹ Владимирова Н. Некоторые вопросы художественного перевода с русского языка на узбекский язык. Автореф. дисс... к.ф.н. – Ташкент, 1957; Мирзоев А. Фоний ва Хофиз // Навоий ва адабий таъсир масалалари. – Тошкент: Фан, 1968. – 5.53 – 62.

² Хайитметов А. Тимурийлар даври ўзбек адабиёти. –Тошкент: Фан, 1996. – Б.68.

chilar ijodi jahon xalqlarining ham umumiy intellektual mulkidir. Bu jarayonda qiyosiy yoʻnalishdagi ilmiy ishlar alohida rol oʻynaydi.

Oʻzbek adabiyotshunosligida X.K.Hamrayev Oybek va Qahhor asarlarini, S.R.Babayeva Gʻafur Gʻulom, G.Xalliyeva Navoiy va Bobur, Z.Mirzayeva Abdulla Qodiriy va boshqa jadid adiblari, B.Xoliqov Tohir Malik, N.Toirova Omon Muxtor, F.Xajiyeva Maqsud Qoriyev, N.Qobilova Abdulla Qahhor asarlarini jahon adabiy kontekstida oʻrganib, qiyosiy adabiyotshunoslik rivojiga oʻzlarining munosib hissalarini qoʻshdilar. Adabiy aloqalar doirasida bajarilgan ilmiy ishlarga M.Xolbekov, Sh.Shamusarov, A.Qosimov, M.Bakayeva, S.Kamilova, T.Sultanov, S.Matkarimova va boshqa olimlarning ilmiy izlanishlarini namuna sifatida koʻrsatish mumkin.

E.Ochilovning «XX asr fransuz she'riyati oʻzbek tilida (tarjimada mazmun va shakl birligi masalasi) mavzusidagi ilmiy ishi, M.Tojixoʻjayevning «Oʻzbek adabiyoti namunalari Martin Xartmann tarjimasi va talqinida» nomli monografiyasi, F.Sapayevaning Maxtumquli she'rlarining oʻzbekcha tarjimalari qiyosiy tahliliga bagʻishlangan tadqiqoti, R.Shirinovaning olam milliy manzarasining badiiy tarjimada qayta yaratilishi xususidagi doktorlik dissertatsiyasi tarjimashunoslik yoʻnalishidagi ilmiy ishlarga misol boʻla oladi.

Xullas, xalqlararo madaniy-adabiy aloqalar kundan kunga rivojlanib borayotgan bugungi kunda qiyosiy tadqiqotlar adabiyotshunosligimizda kelajagi porloq, istiqbolli yoʻnalishlardan biridir. Xalqaro adabiy aloqalar doirasida komparativistik tadqiqotlar olib borish jarayonida, kamida ikki xalq, ikki adabiyotning, ayniqsa, oʻzimizning ma'naviy qadriyatlarimiz, nazmiy va nasriy durdonalarimizning mohiyatini yanada chuqurroq anglaymiz.

Qiyosiy tadqiqot olib borishda metodologik yordam va namuna sifatida bu oʻrinda ayrim ilmiy ishlardan misollar keltirishni lozim topdik.

Oybek va jahon adabiyoti¹

XIX asrning 50–60-yillarida Chor Rossiyasining Oʻrta Osiyoni zabt etishi bilan yurtimizda mustamlakachilik davri boshlandi. Shu davrda masjid va madrasalar yopilib, arab va fors tillarining ma'naviy-madaniy taraqqiyot vositalaridan biri sifatidagi maqomi pasaytirildi. Buning oʻrniga rus tili va rus adabiyoti shiddat bilan kirib keldi. Bu hol, bir tomondan, milliy tarixni oʻrganishga, milliy til va adabiyotning rivojlanish jarayoniga salbiy ta'sir koʻrsatgan boʻlsa, ikkinchi tomondan, oʻzbek xalqining oxir-oqibatda rus tili va adabiyoti orqali Yevropa, shuningdek, Amerika xalqlari adabiyotlarini – yangi adabiy-madaniy olamni kashf etishiga imkon berdi. Oʻzbek yozuvchilari jahon adabiyoti erishgan badiiy yutuqlar va tajribalarni oʻrganish asosida milliy adabiyotimizga yangi adabiy shakl va janrlarni, yangi badiiy-uslubiy vositalarni olib kira boshladilar.

Ana shu jarayonda Mahmudxoʻja Behbudiy, Fitrat, Choʻlpon, Oybek, Gʻafur Gʻulom, Hamid Olimjon, Shayxzoda, Abdulla Qahhor, Mirtemir, Usmon Nosir, Zulfiya, Asqad Muxtor, Odil Yoqubov nafaqat barkamol shoir yoki yozuvchi, balki zabardast tarjimon sifatida ham havas qilishga arzirli ishlarni bajardi. Oʻzbek xalqining jahon adabiyoti namunalari bilan tanishishi, ularni Navoiy yoki Qodiriy asarlarini oʻqigandek sevib oʻqishida badiiy tarjima oltin koʻprik vazifasini oʻtadi.

¹ Каримов Н. Ойбек ва жаҳон адабиёти // https://ziyouz.uz/ilm-va-fan/adabiyot/naim-karimov-oybek-va-jahon-adabiyoti.

Lekin bu ish oson boʻlmadi. XIX asrning 70-yillarigacha asosan fors va arab tillaridagi badiiy adabiyot namunalarini turkiy (eski oʻzbek) tiliga tarjima qilgan tarjimonlar uchun Yevropa xalqlari tillari, jumladan, rus tili ham mutlaqo begona til edi. Shuning uchun ham 1870-yilda Toshkentda oʻzbek tilida chiqa boshlagan «Turkiston viloyatining gazeti» oʻz oldiga muhim va xayrli vazifani qoʻyib, I.A.Krillov, A.S.Pushkin, L.N.Tolstoy, N.A.Nekrasovning bolalarga bagʻishlangan kichik-kichik asarlarini oʻzbek tiliga tarjima qilishni boshlab berdi. Bunga gazeta muharriri N.A.Ostroumovdan tashqari, Shohimardon Ibrohimov, Chanishev, Aydarov, Sattorxon, Mulla Olimlar jalb etildi. Rus adabiyotining dastlabki tarjimonlari tomonidan eski oʻzbek tiliga oʻgirilgan ayrim asarlar Saidrasul Aziziy, Ali Asqar Kalinin, Abdulla Avloniyning darsliklariga ham kiritilib, rus-tuzem va jadid maktablari oʻquvchilari e'tiboriga havola etildi. Bolalarbop badiiy shakl va ibratli-didaktik mazmun bilan yoʻgʻrilgan bu asarlar jadid bolalar adabiyotining maydonga kelishida mumtoz oʻzbek adabiyoti va folklori an'analari bilan birga katta ahamiyatga ega bo'ldi.

Ammo bu tarjimalarga bugungi adabiy-badiiy mezonlar asosida yondashganda ularning til va uslub jihatidan murakkab ekani koʻzga yaqqol tashlanadi. Buning asosiy sababi tarjimonlarning badiiy tarjima amaliyotidan uzoq boʻlganligida koʻrinadi. Oʻzbek adabiy tilining keyingi rivojida birinchi navbatda, Choʻlpon va Qodiriyning ham yozuvchi, ham jahon adabiyoti namunalarining tarjimoni sifatidagi xizmatlari beqiyos. Ular bilan izma-iz oʻzbek adabiy tilining shakllanishi va rivojlanishiga va oʻzbek xalqini jahon adabiyoti bilan tanishtirish ishiga katta hissa qoʻshgan soʻz sehrgarlaridan biri Oybekdir.

Oybek umrining, Navoiy ta'rifi bilan aytganda, ilm maxzanini yigʻish fasli ikki tarixiy davr toʻqnashgan yillarga toʻgʻri keldi. U hayotining ilk davrida, oz fursat boʻlsa-da, madrasada oʻqib, arab va fors tillari bilan oshno boʻldi, inqilobiy boʻronlar bilan boshlangan yangi davrda esa e'tiborini koʻproq shu davrning muhim ijtimoiy masalalariga qaratdi.

Bu qanday davr edi? Bu, Oybekning ustozi Munavvar qori Abdurashidxonov va uning maslakdoshlari uchun 1917-yil fevralidan keyin milliy mustaqillik umidi paydo boʻlgan, 1918yil fevralida Turkiston muxtoriyati tugatilganidan keyin oʻsha umid gullari xazon boʻlgan, lekin «noumid – shayton» hikmatiga amal qilgan ustozlar mustaqillik uchun kurashning yangi yoʻllarini izlayotgan yillar edi. Ular kelgan fikr-xulosaga koʻra, davlat idoralarini boshqara oladigan, ta'lim, fan, madaniyat va xalq xoʻjaligining barcha sohalari boʻyicha yuqori malakali milliy kadrlarni tayyorlamasdan turib, mustaqillik uchun kurashish samarasiz edi. Shuning uchun ham 1922-yilda Buxoro Xalq shoʻro jumhuriyatining mablagʻi va ma'rifat fidoyilarining duoyi salomlari bilan 70 nafar yosh Germaniyaga oʻqishga yuborildi. Ular ishlab chiqqan rejaga koʻra, har yili taxminan shunchadan yoshlar nafaqat Germaniya, balki boshqa davlatlarga, xususan, Rossiyaning Moskva va Leningrad shaharlaridagi oliy oʻquv yurtlariga ham yuborilishi va milliy kadrlar muammosi besh-oʻn yil mobaynida hal qilinishi lozim edi.

«Финансы поют романсы» shu tarixiy davrning shiorlaridan biri edi. Munavvarqori ta'sirida ulgʻayib borayotgan Oybek ham talabalik paytlarida iqtisodchi boʻlishni koʻngliga tugdi. Ammo u faqat iqtisodga doir adabiyotnigina emas, balki Tenning «San'at boʻyicha mutolaa», Frichening «San'at tarixi», Belinskiyning «Adabiy orzular», Lunacharskiyning «Pozitiv (ijobiy) estetika haqida» singari asarlarini qunt bilan mutolaa qildi.

Oybekning rus she'riyati klassiklari bilan tanishishida rus tili va adabiyoti muallimi Goryanovning xizmatlari katta. «Soʻzlarining, qoʻllarining imo-ishorasi bilan taxtaga chizachiza rus tilini oʻrgatishga uringan» Goryanov tufayli u Pushkin, Lermontov, Nekrasov, Blok she'riyati jozibasini ilk bor kashf etdi. Ayniqsa, Pushkin she'riyati uni maftun etdi. «Men Pushkin she'riyati bilan yashay boshladim, deb yozgan edi Oybek olis 20-yillarni eslab. – Yangi bir dunyoga kirdim, yangi hayot, yangi ilhom kashf etdim».

Oʻrta Osiyo davlat universiteti ijtimoiy fanlar fakultetining iqtisod boʻlimida tahsil ola boshlagan Oybek chuqurroq bilim olish maqsadida oʻqishni Leningraddagi Xalq xoʻjaligi institutiga koʻchiradi. U «Shimoliy Venetsiya»da iqtisodiy tanglikda, yarim och-yupun yashaganiga qaramay, yuqori malakali iqtisodchi boʻlish va ayni paytda she'riyatga boʻlgan ruhiy ehtiyojini qondirish uchun tinmay oʻqiydi.

Oybekning bolalik davri oʻrtoqlaridan biri Homil Yoqubov adib bilan Leningradda ilk bor uchrashgan kunlarni bunday xotirlagan edi: «...1927-yilning kuz faslida Oybek Leningradga kelib qoldi... Odatiy salom-alikdan soʻng biz tezroq Oʻzbekistondagi ahvolni bilishga qiziqdik. Oybekning hikoya qilishicha, Oʻzbekistonda mafkura maydonida keskin kurash boshlanibdi. Adabiyot sohasidagi yot mafkuraga qarshi kurash masalasi matbuot sahifalarida koʻtarilgan bahslarda Oybek ham qatnashibdi. Bu haqda u shu qadar kuyunib-yonib soʻzlardiki, biz adabiyot allaqachon hayotining ajralmas qismiga aylanganini sezib turardik. Uning fikricha, ijodkor, avvalo gʻoyaviy barqaror va oʻta bilimdon boʻlmogʻi shart. «Oʻzi toʻgʻri yoʻlda turmagan yozuvchi oʻzgalarni ham aslo Haq yoʻliga boshlay olmaydi», degandi u. Shundan soʻng suhbat inson umrining mazmuni haqida ketdi...».

Xotiranavisning yozishicha, Oybek: «...Endi hamma imkoniyatlardan yaxshi foydalanib, faqat ixtisos(lik) fanlarini oʻzlashtirish bilan qanoatlanmasdan, mustaqil mutolaa yoʻli bilan adabiy-nazariy ma'lumotini chuqurlashtirish, rus va Gʻarbiy Yevropa badiiy ijod xazinalari bilan yaqindan tanishish niyatida ekanini hayajonlanib soʻzla»gan; «ijtimoiy, iqtisodiy va falsafiy fanlarga qiziqishi tobora kuchayib», «iqtisod fakulteti programmasi yuzasidan sistemali ravishda falsafa tarixi, qadimgi va yangi dunyo falsafasini chuqur oʻrgangan». «Badiiy asarlarni aytmaysizmi? – deb davom etgan xotiranavis. – Ular (Oybekning yotoqxonasida – N.K.) qalashib yotardi. Oybek bularning koʻplarini oʻqishga ulgurar, oʻqiganda ham sinchkovlik bilan g'oyaviy-badiiy mag'zini chaqib oʻqirdi. U, xususan, poeziyani yoqtirardi. Pushkin, Lermontov, Nekrasov, Blok, Mayakovskiy, Yesenin she'rlarining ba'zilarini bizga yoddan oʻqib berardi. Biz e'tibor berib tinglardik...».

Oybek Toshkent va Leningraddagi talabalik yillarida nomlari yuqorida tilga olingan shoirlar ijodi misolida rus lirikasidagi his-tuygʻu va lirik kechinmalarning porloqligidan, badiiy tasvir usullarining rang-barangligidan bahra olgan. Ammo rus she'riyatiga rom boʻlmasdan avval u Turkiyada tahsil olgan ustozi Eson afandi va Choʻlpon ta'sirida yangi turk she'riyatiga ixlos qoʻygan edi. Oybek «Adabiyot, tarix, zamonaviylik» (1966) deb nomlangan suhbatida shu jarayon haqida ilk bor soʻzlab, bunday degan edi: «Yangi turk poeziyasining asarlari meni ilk marta lirik soddalik yoʻlida izlanishga oʻrgatdi. Men turk poeziyasi bilan texnikumning studenti boʻlgan yillarimda tanishdim. Oʻsha paytda Bokuda Yahyo Kamol, Rizo Tavfiq, Abdulhaq Homid va boshqa bir necha turk shoirlarining asarlari nashr qilingandi. Bu asarlar mening ham qoʻlimga tushib qoldi. Bular hozir ham menda saqlanadi. Yaqinda ularni qay-

tadan varaqlarkanman, ilk marta ta'sirlanganimni koʻz oldimga keltirdim. Muhim va murakkab narsalar haqida soddagina qilib soʻz aytish mumkin ekan. Qalbni zabt etgan his-tuygʻularni, chuqur lirizmni ifoda etmoq uchun dabdabali shakl shart emas... Eng muhimi, kundalik hayot predmetlari, odatiy nutq poetik olamning butun dabdabasi va jozibasini yoʻqqa chiqarib qoʻyadigan koʻrinardi».

Oybek 20-yillarda Toshkentdagi «Turon» kutubxonasi fondidagi turk shoirlarining majmualari va «Sarvati funun» jurnalida bosilgan asarlarini mutolaa qilish jarayonida sodda uslubi va yoniq tuygʻulari bilan an'anaviy oʻzbek she'riyatidan keskin farq qilgan turk she'riyatiga mehr qoʻydi. U hatto, Ziyo Koʻkalp ta'sirida mashhur «Oʻzbekiston» she'rini yozdi.

Sovet mafkurachilari ta'biri bilan aytganda, panturkizm gʻoyalari bilan sugʻorilgan bu she'rning badiiy shakli Oybekka oʻzbek lirikasining goʻzal namunalaridan birini yaratish sevinchini bagʻishladi. Agar Ziyo Koʻkalp oʻz she'rida turk tilini sharaflagan boʻlsa, Oybek oʻz she'rida ona Vatani –Oʻzbekistonni koʻklarga koʻtardi.

Oybek turk she'riyatiga qiziqa boshlashidan avval, «maktabdalik yillarida Sharq klassikasi bilan tanishib», «hirotlik buyuk Navoiy va ajoyib lirik, ozarboyjon adabiyotining buyuk siymolaridan boʻlgan Fuzuliyga benihoya mehr qoʻygan» edi. Bu mehr uning hayoti, qalbi va ijodini butun umri boʻyi yoritib, quyosh haroratini bagʻishlab turdi.

Oybek 1926-yilda jahon adabiyotiga ilk bor murojaat etib, Anatol Fransning «Bashariyat tarixi» hikoyasini tarjima qiladi. «Bashariyat tarixi», aslida, mustaqil hikoya boʻlmay, fransuz adibining «Jerom Kunyar afandining fikr va mulohazalari» degan kitobidan olingan. Bu kitob dastlab «Echo de Paris» gazetasining 1893-yil 15-mart – 19-iyul sonlarida

feletonlar turkumi tarzida bosilgan. Asar naql shaklida bayon qilingan dialoglar silsilasidan iborat boʻlib, ularda qahramonning davlat tuzilishi, armiya, urush, axloq va huquq haqidagi qarashlari oʻz ifodasini topgan. Bu hikoya tarjimasini oʻqir ekansiz, bir savol tugʻiladi: «Oybek shu asarni toʻla holda oʻqiganmi yoki Anatol Frans asarining biror jurnal yo gazetada e'lon qilingan parchasinimi?» Bizningcha, Oybek dastlab shu hikoya bilan tanishgan boʻlsa ham, bu ibratli Sharq afsonasini tarjima qilganidan soʻng, «Jerom Kunyar»ni, albatta, oʻqib chiqqan.

Anatol Fransning Oybek tarjimasida e'lon qilingan hikoyasi, garchand Sharq afsonalariga asoslangan boʻlsa-da, kitob-xonlarda katta taassurot qoldirdi. Balki Abdulla Qodiriyning «Oʻtkan kunlar» romanidagi: «Moziygʻa qaytib ish koʻrish xayrlik, deydilar», degan soʻzlari bilan hikoyadagi: «Mening donishmand otam moziydan xabardor boʻlib ish qilsalar, koʻp xato qilmaslar edi, deb aytgan edilar», degan soʻzlari oʻrtasidagi mushtaraklik tasodifiy emasdir.

Har holda Oybek bu hikoyani tarjima qilibgina qolmay, undan oʻzi uchun kerakli xulosalarni chiqarib oldi. Birinchi va eng muhim xulosa, bizningcha, shu edi: har bir inson, ayniqsa, ijodkor faqat oʻz xalqining tarixi va madaniyatini emas, bashariyat (ya'ni jahon xalqlari) tarixi va madaniyatini ham bilishi lozim. Oybek shu asosiy xulosaga asoslangan holda jahon xalqlari tarixi va madaniyati (jumladan, adabiyoti)ni oʻzi oʻrganibgina qolmay, yosh avlodning ham shunday bilimga ega boʻlishi uchun koʻmaklashishga ahd qildi.

Oybek 1930-yili Oʻrta Osiyo davlat universiteti (hozirgi Oʻzbekiston Milliy universiteti)ning ijtimoiy fanlar fakultetini tugatganida, nafaqat iqtisod fani asoslarini egallagan diplomli mutaxassis, balki bir necha she'riy kitobi chop etilib, she'ri-

yat muxlislari e'tiborini qozongan iste'dodli shoir ham edi. 1935-yilga kelib, Germaniyada, shuningdek, Moskva, Leningrad va boshqa shaharlarda oʻqib kelgan yoshlar hisobiga respublikada kadrlar masalasi ozmi-koʻpmi hal boʻlgan edi. Shuning uchun Oybek ikki sohadan birini tanlashga majbur boʻldi va u «sevdigi» adabiyotni tanladi.

30-yillarning oʻrtalarida adabiyot boʻyicha maktablar uchun oʻquv dasturlari qayta koʻrilib, darslik hamda majmualarga oʻzbek va rus yozuvchilaridan tashqari, jahon adabiyoti klassiklarini ham kiritish lozim deb topildi. Maorif xalq komissarligining shu haqdagi qarori Oybek uchun ayni muddao edi. U 1935-yili oʻrta maktablarning 9-sinfi oʻquvchilariga atalgan «Adabiyot xrestomatiyasi» uchun buyuk olmon shoiri Haynrix Haynening «Sileziya toʻquvchilari» va «Qullar kemasi» she'rlarini tarjima qildi. 1937-yilning Oybekni ham Til va adabiyot instituti hamda Yozuvchilar uyushmasidan uchirib yuborgan boʻron tingach, u 1938-yil oxiri 1939-yil boshlarida prof. N.F.Deratani tomonidan tuzilgan «Antik adabiyot xrestomatiyasi»ning Rim adabiyotiga bagʻishlangan 1-jildini oʻzbek tiliga tarjima qilishga muvaffaq boʻldi.

Garchand mazkur xrestomatiya eramizdan avvalgi III–I asrlar Rim adabiyotining Plavt, Terensiy, Katull singari namoyandalaridan tortib, imperatorlik davri (milodiy I–II asrlar) adabiyotining Petroniy, Apuley singari romannavislarining ijodini qamrab olgan boʻlsa-da, unda shu shoir va yozuvchilarning ayrim asarlari yoki katta hajmdagi asarlaridan parchalargina berilgan edi. Shunga qaramay, bu majmuaning nashr etilishi oʻzbek xalqining madaniy hayotida katta voqea boʻldi. Kitobxonlar Oybek tarjimalari tufayli antik Rim adabiyoti va uning buyuk namoyandalari haqida ilk bor tasavvur hosil qildilar. Bu Oybekning jahon adabiyotini oʻrganish va tarjima qilish so-

hasida olib borgan ijodiy ishlarining oʻziga xos choʻqqisi boʻldi. Agar antik davr yunon va Rim adabiyotlari jahon adabiyotining beshigi boʻlganini e'tiborga olsak, Oybek jahon adabiyoti yutuqlarini oʻrganish va oʻzlashtirish ishlaridan biri boʻldi.

Yuqorida bayon qilingan soʻzlardan shu narsa ayon boʻladiki, oʻtgan asrning 30-yillarida Oʻzbekistonda rus adabiyoti bilan birga jahon adabiyoti durdonalarini ham oʻzbek tiliga tarjima qilishga va oʻzbek adabiyotini jahon adabiyoti yutuqlaridan bahramand boʻlgan holda rivojlantirishga katta e'tibor berilgan. Cho'lpon, Oybek, Hamid Olimjon, G'afur G'ulom, Shayxzoda, Mirtemir, Usmon Nosir singari shoirlar shu imkoniyatdan foydalanib, Sh.Rustavelining «Yoʻlbars terisini yopingan pahlavon», V.Shekspirning «Hamlet», A.S.Pushkinning «Yevgeniy Onegin», «Boris Godunov», «Bogʻchasarov fontani», «Kavkaz asiri», «Suv parisi», «Mis chavandoz», M.Yu. Lermontovning «Demon» singari oʻnlab asarlarini oʻzbek navolarida yangratib yuborishdi. Oybek 30-yillarda shiddat bilan boshlangan shu ijodiy ishni 40-yillarda ham davom ettirib, jahon komediya san'ati qirollaridan biri Jan Batist Molerning «Tartyuf» komediyasini oʻzbek tiliga oʻgirdi. Ammo adib bu asarni hozirgi Oʻzbek Milliy drama teatri buyurtmasi asosida shoshib tarjima qilgani, shuningdek, suronli davrning boshqa muhimroq masalalari bilan bandligi sababli unga sayqal berish imkoniga ega boʻlmagan. Shunga qaramay, bu tarjima bilan tanishgan kitobxon Oybekning asar g'oyasi, qahramonlarning sajiyalari va oʻzaro munosabatlarini chuqur his qilgani hamda buni tarjimada berishga intilganini, albatta, sezadi.

Shuni yodda tutish lozimki, sovet davridagi adabiymadaniy siyosat zaminida sobiq ittifoq hududlarida yashagan xalqlarni nafaqat kommunistik partiya va sovet davlati gʻoyalariga sadoqat ruhida tarbiyalash, balki internatsiona-

lizm niqobi ostida ruslashtirish maqsadi ham yotgan. Sovet davrida rus mumtoz va zamonaviy adabiyoti namoyandalarining juda koʻp asarlari milliy tillarga, jumladan, oʻzbek tiliga shu maqsadda tarjima qilingan. Ammo 20-yillarda A.Serafimovichning «Temir oqim», M.Shaginyanning «Gidrotsentral» singari davrning dolzarb mavzularidagi asarlar tarjima qilingan boʻlsa, 30-yillarning oʻrtalariga kelib, rus va qardosh xalqlar adabiyotining durdona asarlarini tarjima qilishga ehtiyoj tugʻildi. A.S.Pushkin vafotining 100 yilligi munosabati bilan ulugʻrus shoiri durdonalarining oʻzbek tiliga tarjima qilinishi xuddi shu davrga toʻgʻri keldi. Oybek «rus hayotining qomusi» (V.G.Belinskiy) deb baholangan «Yevgeniy Onegin» she'riy romanini oʻgirish jarayonida Pushkinni jahon she'riyatining buyuk arboblaridan biri sifatida kashf etdi. U bu asarni tarjima qilish va pushkinona poetik mahorat «sir»larini oʻrganish jarayonida oʻz ijodida ham, qolaversa, oʻzbek she'riyatida ham yuksalish ro'y berishi mumkinligini sezdi. Ana shu sezgi va Pushkin asarining badiiy latofati «Yevgeniy Onegin»ni katta ilhom va muvaffaqiyat bilan tarjima qilishiga sabab boʻldi. Oybek nafaqat oʻzining, balki qalamkash do'stlarining ham Pushkin ijodi durdonalarini o'zbek tiliga tarjima qilganidan gʻoyat mamnun boʻlib bunday yozdi: «Bu yil oʻzbek adabiyoti uchun juda baxtli yil boʻldi: Pushkinning koʻp she'r va poemalari, hikoya va qissalari tarjima etildi. «Muftax ul-jinon»larni oʻqib, «oxirat azoblari» vahimasidan koʻzlarga yosh olib uxlaydigan zamonlar koʻpdan yoʻqolgan. Endi oʻzbek kitobxonlari Pushkin she'rlarining fikrlariga, musiqasiga berilib, goʻzallikni tuyadilar».

Oybekning Pushkin ijodiga boʻlgan qiziqishi «Yevgeniy Onegin»ni tarjima qilish bilangina yakunlanmadi. U V.G.Belinskiyning Pushkin ijodiga bagʻishlangan maqolalarini qunt bilan oʻrgandi, uning «Poeziyaning xil va turlarga boʻlinishi» maqolasini va shu maqoladan oʻrin olgan ulugʻ shoirning «Qishloq», «Tun nuri sohir...», «Bulut» singari she'rlarini tarjima qildi. Uning nazarida, ketmon, traktor, gudok, fabrika, zavod haqidagi «she'rlar» boʻgʻziga kelgan kitobxonlar Pushkinning bu va boshqa asarlarida tarannum etilgan fikrlar, tuygʻular, musiqaning goʻzalligini tuyib yayrashlari, shoirlar esa Pushkindan poetik mahorat «sir»larini oʻrganishlari mumkin edi. «Pushkin asarlarini xalqqa yetkazish kabi sharafli ishni bajarish bilan bir qatorda, – deb davom etdi u, – oʻzbek shoiri va yozuvchilari ham Pushkin ijodining boy xazinasini atroflicha tekshirish, oʻrganish vazifasini qoʻyishlari lozim. Yildan-yil oʻsayotgan oʻzbek adabiyotining gullashiga Pushkin ijodi katta ta'sir koʻrsatishi shubhasizdir».

Oybekning oʻzi nafaqat Pushkin, balki Lermontov, Tyutchev, Tolstoy, Chexov, Gorkiy, Blok «ijodlarining boy xazinasi»ni ham atroflicha tekshirib, oʻrganib, ulardan saboq olishga urindi. Zero, jahon adabiyotining muhim bir qismi boʻlgan rus adabiyoti yutuqlarini oʻrganish uning oʻz mahoratining oshishi, ijodining yangi, yuksalish bosqichiga koʻtarilishi uchun zarur jarayon edi. «Rus tili va adabiyotini oʻrganish bilan, – deb yozdi u bir maqolasida, – kishi butun jahon madaniyati va butun jahon adabiyoti bilan-da tanishishga imkoniyat topadi. Chunki jahon adabiyotining eng yaxshi asarlari rus tiliga moʻl-koʻl tarjima etilgan va hozir ham tarjima etilmakdadir».

Biz Oybekning bu soʻzlarini oʻqir ekanmiz, Pushkindek buyuk dahoning tugʻilishida buyuk ingliz shoiri Bayronning roli oz emasligi yodimizga keladi. Boshqa rus shoir va yozuvchilarining shakllanishida ham ingliz, nemis, fransuz, italyan adabiyotlari buyuk namoyandalari ijodining ta'siri oz boʻlmagan. Umuman, adabiy ta'sir, adabiy aloqa badiiy ijod-

ni harakatga keltiruvchi, yangilab turuvchi, boyituvchi muhim vositadir. Oybek 30–50 yillarda qaysi shoir yoki yozuvchi asarini tarjima qilgan, ijodini oʻrgangan boʻlmasin, shu shoir yoki yozuvchiga jahon adabiyotining vakili sifatida yondashib, uning ijodiy yutuqlaridan, tajribasidan bahramand boʻlishga, shu asosda ijodiy oʻsishga intildi.

Oybek juda koʻp iste'dodli shoir va yozuvchining asarini tarjima qilgan. I.A.Krilov (masallar), M.Yu.Lermontov («Maskarad»), M.Gorkiy («Makar Chudra», «Lochin qoʻshigʻi»), Anna Axmatova («Mardlik», «Bogʻda gʻalati chuqur...»), A.Tvardovskiy («Garmon») shular jumlasidan. Ularning orasida falakning gardishi bilan urush yillarida Toshkentga kelib qolgan chex shoiri, lax adabiy tilining asoschisi Ondra Lisakovskiy ham boʻlgan. Uning «Samarqand kuzi», «Bombardimon vaqtida», «Konchi partizanlar qoʻshigʻi», «Men shoir» degan she'rlari 1943-yilda «Qilich va qalam» toʻplamida Oybek tarjimasida dunyo yuzini koʻrgan.

O.Lisakovskiy garchand chex adabiyotining koʻzga koʻringan vakili boʻlsa-da, biz uni jahon adabiyoti namoyandasi sifatida alqash niyatida emasmiz. Zero, jahon adabiyoti milliy adabiyotlarning shoh asarlaridan, yillar va zamonlar oʻtsa hamki, badiiy latofatini yoʻqotmaydigan asarlardan iborat xazinadir, oltin fonddir. Shubhasiz, O.Lisakovskiy singari ijodkorlarning ham adabiyotning bepoyon olamida oʻz oʻrni, oʻlan-toʻshagi bor.

Oybek jahon adabiyotining nafaqat ingliz, nemis, fransuz, balki fors, hind, ozarboyjon, oʻzbek va rus millatlariga mansub namoyandalarining oʻlmas asarlarini ham oʻqib-oʻrgandi yoki tarjima qildi. Har ikki holda ham ulardan estetik zavq olish bilan birga ularga badiiy mahorat maktabining ustozlari sifatida munosabatda boʻldi.

Oʻylaymizki, oʻzi ham «Qutlugʻ qon», «Navoiy» romanlari va goʻzal, dilbar, umrboqiy lirikasi bilan jahon adabiyoti xazinasining boyishiga hissa qoʻshdi.

Ishq, dard va isyon shoiri¹

Zamonamizning mashhur shoirlaridan biri «Iste'dodning tabiati – isyon», deb ta'kidlagan edi. Darhaqiqat, chinakam har bir iste'dod sohibi yer yuzidagi zulm va bedodlikka qarshi kurash va isyon uchun dunyoga keladi. Hayot va jamiyat haqiqiy talant nigohi bilan oʻziga boqib, soʻz va ifodalaridagi gʻam-gʻussa, kulfat va musibatlarni tan olgandagina bir qadar yengil tortib mazlum-u bechora, gʻarib-u gʻurabolarni tushkunlik va umidsizliklardan har qalay muhofaza etadi. Hech kim buni fahmlamasa ham, shoir fahmlaydi, xalq-u xaloyiq shafqatsiz va berahm voqelik qarshisida qoʻrqib-qaltirab ojiz qolganda ham shoir hayotga suyanadi. Zero, hayotga yelkadosh va maslakdosh ijodkorning umri boqiy boʻladi. Qadim Xorazmning iste'dodli, demakki, isyonkor farzandi Avaz O'tar ana shunday benazir shoirdir. Avaz she'riyati an'anaviy adabiyot bilan yangi oʻzbek she'riyati orasida mustahkam bir koʻprik vazifasini oʻtagan, desa xato boʻlmaydi.

Avaz oʻzigacha yashab ijod etgan turkiy va forsiy adabiyotdagi salaflari ijod maktabidan ilhomlanib saboq olgan. Ammo nainki oshiqona, balki orifona she'rlarida ham u Pahlavon Mahmud, Alisher Navoiy, Fuzuliy, Ogahiy, Bedil kabi buyuk sharq shoirlarining vorisi va munosib izdoshi qiyofasida oʻzini koʻrsata bilgan. Chunki u ruh, ma'ni, goʻzallik va haqiqat fayziga yetishishning asl ma'naviy manbalariga tayangan.

¹ Хаққулов И. Ишқ, дард ва исён шоири// http://kh-davron.uz

Istagil darveshlardin fayzi ma'ni istasang Kim, xarobi koʻhnalarda boʻlgʻusi maxsuri ganj.

Avaz Oʻtarning fikr hayoti, axloqiy-ma'naviy qismati, iztirob koʻlami va ruhiy yuksalishlari boshqa bir shoirnikiga aytarli oʻxshamaydi. Shoirligida she'riyatda koʻp takrorlangan gʻam-gʻussa, hasrat va anduhdan quvvatli hamda fojeroq bir tuygʻu – yaratuvchan ehtiros mavjud. Ana shu ehtiros bosh koʻtarganda u oʻzini goh unutsa, goh oʻzidan qochib fano holidan najot istaydi

Dunyoda zabun xalq va foje Vatan ishqi bilan ogʻrigan qalbchalik toʻgʻri yoʻl koʻrsatadigan ulugʻ rahnamo boʻlmaydi. Ammo kaltabin va ongi zaif kimsalar buni fahmlamaydilar. Chunki ular ezgulik va taraqqiyot dushmanlari, «riyozat bila bermayin nafsa ranj», ishi «xoʻrd-u xob» boʻlgan qorin bandalari. Bundaylar «dam-badam bedod-u jabr-u zoʻrliklar» qilib «zulm ila» millatni xarob etguvchilar. Avazning xudbin amaldorlariga boʻlgan nafrat aks etgan she'rlari koʻpaygan sari unga nisbatan dushmanlik xurujlari ham kuchaygan. Biroq bor-yoʻgʻi oʻttiz besh yilgina umr kechirgan, shu qisqa hayotning keyingi yillari ham kulfat va ogʻir azoblarga toʻla boʻlishiga qaramay, Avaz katta ijodiy meros yaratib qoldira oldi.

Poetik soʻz hech payt vaziyat, maqsad, shoirning ichki ruhiy xususiyatlaridan ajralgan holda paydo boʻlmaydi. Bas shunday ekan, shoirlik mahoratini ham ijodkorning hayotga qizgʻin aralashuv hislari, umrning hal qiluvchi fursatlardagi hayotiy qarashlari, gʻoyaviy tugʻyonlardan uzilgan masalaga tushirilmasligi kerak.

Avaz – umid shoiri, zamonasi tan olmagan, turfa xil ishonchsizliklar ichida qaddini tiklay borgan tilaklar kuychisi. U hammadan ortiq hayotdagi oʻzgarishlarga, qullik va nodon-

lik kishanlari parchalanishiga umid bogʻlar hamda ishonardi. Avaz koʻp ijodiy fursatlarini gʻazal yozishga bagʻishlagan shoirlardan. Gʻazal – inson qalbining armonli ohanglari, dardli ruhning alohida va yaxlit manzarasi. Gʻazalnavislik – ruh haqiqatlarini aks ettirishdir. Bu ma'nolar xoh ishqiy mavzuda boʻlsin, xoh falsafiy yoki axloqiy yoʻnalishlarda boʻlsin buning ahamiyati yoʻq, hamma gap tiriklik yoki oʻlim mohiyatida bahsga kirishgan Ruhning hurriyatida. Chunki ruhiy koʻtarilish boʻlmagan yurakda aqliy balandlik boʻlishi mushkul.

An'ana iste'dodni tarbiyalaydi. Did, saviya imkoniyatlarning ochilishi va kengayishiga ta'sir koʻrsatadi. Biroq u yurakka oʻt yoqmaydi. Avaz tasviridagi oshiqning tushunchasida olam va odamdagi mavjud barcha yomonlik hamda noqisliklarning oʻzak-negizi «ahli olam»ning muhabbatsizligida. Uningcha, haqiqiy baxt ham, taxt ham, poklik ham muhabbatda:

To muhabbatni kulohin kiymasam ushshoq aro, Emdi Iskandar masallik toji Doroni netay?

Avaz – mazlumsevar shoir. Ezilgan el va yurt qaygʻulari uning ruhida. Shuning uchun boʻlsa kerak, unda el tilidan gapirish, «millati mazluma ahvolin parishon» etganlar bilan xalq nomidan poetik mubohasalar yaratish mahorati yorqin. Uning bu yoʻnalishdagi she'rlarida soʻz sadolari ogʻzaki nutqqa yaqinlashadi, xalqning asriy dardlari, turmushi va taqdiriga oid savollar qoʻyilib, poetik ta'kidlar qilinadi:

Bizni aylab xor-u zor-u notavon etmoq uchun, Bermayin osori hurlik bandi zindon etdingiz. Bu falokatlar uchun mas'ul oʻlursiz oqibat, Zulmi istibdod ila millatni vayron etdingiz.

Avaz oʻzidagi uygʻonish va fikriy oʻsuvni zamondan deb baholaydi, ongi uygʻonayotgan kishilarni oʻziga oʻxshatadi.

Badiiy ijodda ba'zan shunday she'rlar dunyoga keladiki, ular alohida shoirlarnigina emas, davr va zamon she'riyatining nafasini belgilashga xizmat qiladi. Bunday she'rlar oʻqilganda «Shoir kim va mahoratining kuchi nimada?» degan savolga kishi javob topganday boʻladi:

Yoʻq jahon mulkida bizdek ojiz-u bechora xalq, Zulm tigʻi birla boʻlgʻon bagʻri yuz ming pora xalq.

Shoirning vazifasi – ezilgan odamning dilini ezish, ahvolning behad ogʻirligini pisanda qilib, ruhni jonsarak etishdan iborat emas. Balki har qanday qiynoq va nochorlikning sabablarini yoritish, ularga qarshi keskin norozilik uygʻotib, kurashga chorlashdan iborat. «Xalq» she'rida Avaz ham shu pozitsiyada turib qalam yuritgan.

«Adabiyot oʻz oldiga qoʻygan maqsad borasida muvaffaqiyat qozonish uchun metaforalardan, allegoriyalardan, poetik vaznlardan, imo-ishoralardan foydalanadi», — deydi Rabindranat Thokur. She'riyatda tadbiq qilinadigan poetik tasvir usul va vositalardan ham bosh muddao shu: his-tuygʻuga asoslangan fikrni jozibador, inson qalbiga teran va uzoq ta'sir koʻrsata oladigan uslublarda tasvirlashda muvaffaqiyat qozonish. Shoir buni mukammal darajalarda eplasa, demak u mahoratli. Uning qalamida sir bor — oʻquvchini hayajonlantirish siri.

Avaz she'riyati gʻoya va tuygʻulari bilan emas, badiiy vositalari, serjilo tashbihlari obrazlar olamining originalligi bilan ham tahsinga loyiq. Bu tomondan ham, uning oʻz soʻzlari bilan ta'riflaganda, «Avaz nazmigʻa har abyot-u devon oʻxshamas»dir.

Meni holim ash'orim ichradurur, Bayon-u, bayon-u, bayon-u bayon,

deydi Avaz. Bu – haqiqat! Avaz oʻzining sevimli qahramoni – oshiq kechinmalari, orzu, dard va fikrlarini aks ettirganida oʻz yurak holati va iztiroblari manzaralarini ham ularga uygʻunlashtiradi. Boshqacha qilib aytganda, Avaz gʻazallarini uning shaxsiyati, shaxsiyatidagi porloq fazilatlar bezab turadi.

Avaz Oʻtarning fikr hayoti, ma'naviy toleyi, qalb iztirobi va ruhiy isyoni boshqa bir shoirnikiga oʻxshamaydi. Uning shoirligida oʻzgalar tomonidan koʻp takrorlangan gʻam-anduh va hasratdan quvvatli hamda koʻlamliroq bir tuygʻu mavjud.

Avaz ham dili ezgin, «yaralari ochiq» (Asqad Muxtor) shoirlardan. Uning nola-yu nadomat, gʻussa-yu hasratlarini koʻngildan oʻtkazib, ruhan idrok aylay bilgan she'rxon tasavvurida Avaz oʻzbekning eng buyuk jafokash shoirlaridan biri sifatida suvratlanib qolishi shubhasizdir. Xato va kamchiliklaridan qat'i nazar oʻnlab olimlarning xizmatlari tufayli yurtimizda avazshunoslik, degan fan tarmogʻi shakllangan. Davr va zamon talablarini toʻla inobatga olib, bilimdonlik bilan uni rivojlantirish lozim. Shunda Avaz Oʻtar bizga, biz esa uning hasratkash shaxsiyati va she'riyatiga har qalay yaqinlashgan boʻlamiz.

«Xamsa» obrazlar tizimida «Oshiq», «Ma'shuqa», «Raqib» uchligi¹

Har bir asarni u maydonga kelgan ma'naviy-ma'rifiy, tarixiy-badiiy, ijodiy-individual kontekstda, ayni paytda, umumbashariy tafakkur doirasida muqoyasaviy planda kuzatadigan bo'lsak, biz ushbu bob markaziga qo'ymoqchi bo'layotgan

¹ Жўракулов У. Алишер Навоий «Хамса» сида хронотоп поэтикаси. Монография. — Тошкент: Турон-икбол, 2017.

obraz va tizim tushunchalarining bir qadar shartli ekani ma'lum boʻladi. Ya'ni bu oʻrinda antik yunon adabiyoti asosida shakllangan poetika ilmi, uning izchil davomi sifatida yashab kelayotgan Yevropa adabiy-nazariy tafakkuri maydonga olib chiqqan va bugun jahon xalqlari uchun yagona qoidaga aylanib boʻlayozgan janr, kompozitsiya, syujet, obraz singari poetik birliklar kanonlarini boshqa bir adabiy-tarixiy maydonlarda shakllangan, mustaqil estetik hodisalarga nisbatan toʻgʻridan-toʻgʻri qoʻllash qanchalik oʻzini oqlaydi, degan metodologik savolga duch kelamiz.

Garchi, bugun biz tayanadigan adabiyot nazariyasi fani, barcha zamon-makonlarga xos adabiy manbalarga nisbatan yagona mezon mavjud degan tushunchani ilgari sursa-da, har bir badiiy hodisaga nisbiy mustaqil fenomen sifatida qarash zarurati, ushbu tushunchaning toʻla ma'noda oʻzini oqlamasligini koʻrsatadi. Masalan, xitoylardagi dao, hindlardagi dxarma, yaponlardagi tsiogun asosida shakllangan poetik kanonlar, ularning negizida talqin etiladigan janr, kompozitsiya, syujet, obraz tushunchalari Yevropa nazariy poetika ilmidagi badiiy kanonlardan ma'lum darajada farq qiladi. Hatto Yevropa adabiyotining bir davridagi (masalan, Antik davr) nazariy kanonlar boshqa bir davrdagi (masalan, oʻrta asrlar yoki Uygʻonish) nazariy kanonlar bilan ayniyatda emasligi kuzatiladi¹. Bizningcha, buning ijtimoiy-tarixiy davr, tuzum, adabiy muhit, poetik kanonlar, milliy va ijodiy individuallik singari qator obyektiv va subyektiv sabablari bor. Ammo bularning ichida eng muhimi, uch zamon va uch makon voqeligini poetik idroklash usuli – dunyoqarash, e'tiqod masalasidir. Nazariy-poetik kanonlar xilma-xilligining eng muhim sababi aynan shu, boshqa barcha sabablar birinchilikka da'vo qila olmaydi.

«Xamsa» tarkibini tashkil etuvchi besh doston alohida janr, syujet, kompozitsiya, ritm (vazn) xususiyatlarini namoyon etishi, fabula tizimi, obrazlarning tarixiy, rivoiy, xalqona asoslari turli zamon va makonlarga tegishli boʻlsa ham, toki yagona xronotop maydoni doirasida qaralmas ekan, Navoiy ilgari surmoqchi boʻlgan badiiy konsepsiyaning tub mohiyatini anglash mumkin emas. Toʻgʻri, «Xamsa»dagi Farhod chin, Shirin arman, Majnun va Layli arab, Bahrom va Ravshanak fors, Dilorom xitoy, Iskandar rum, Mehrnoz hind millatiga mansub. Ular orasidagi zamon munosabatlarini ham aniq belgilash mumkin emas. Chunki ularning ba'zilarida tarixiylik (xususan, Iskandar va Bahrom) xususiyati yetakchi boʻlsa, boshqalarida rivoiylik, afsonaviylik (Farhod, Majnun, Shirin, Layli va h.k.) xos.

Xoʻsh, shunday ekan, «Xamsa» obrazlarini yagona tizim ostida uygʻunlashtiruvchi, bir butun badiiy xronotop tarmoqlari sifatida namoyon etuvchi asos konsepsiya nimada? Biz qaysi nazariy kriteriyga koʻra, «Xamsa»da obrazlar tizimi, degan muammoni qoʻya olamiz? Agar bu tizim mavjud boʻlsa, qanday poetik strukturaga ega va uning asosida nima turibdi? Ushbu boʻlimning bosh vazifasi ayni savollarga javob berishdan iborat. Shunda biz Sharq-islom adabiyotiga xos poetik kriteriylarning oʻziga xosligi, xususan, «Xamsa» obrazlari tizimi, unga xos xronotop poetikasi haqida muayyan xulosalarga ega boʻlishimiz mumkin.

Biz tomonimizdan ushbu boʻlim markaziga olib chiqilgan «oshiq», «ma'shuqa», «raqib» obrazlari adabiyot tarixida «Xamsa»dan oldin ham mavjud edi. Qadim (ya'ni xamsachilikkacha) epos, roman, doston va qator lirik janrlar (masalan,

¹ Chunki yagona geografik hudud, yagona mentalitet doirasidagi millatlar hayotida Antik davr politeistik (koʻpxudolilik), oʻrta asrlar va Uygʻonish davrlarida moneteistik (yakkaxudolik) qarash yetakchilik qilganki, bu ularning badiiy tafakkuri, adabiy manbalarida bevosita oʻz aksini topgan (U.J.).

elegiya, qasida, gʻazal, sonet, oda, ruboiy va h.k.) tarkibida an'anaviy obrazlar guruhi oʻlaroq yashab keldi. Epos, roman, qissa singari sof epik janrlar badiiy strukturasida keng epik plandagi poetik vazifasini aniq-tiniq namoyon etdi. Muayyan tizim sifatida shakllandi. Avvalgi boblarda ta'kidlaganimizdek, ayni tizim Sharq mumtoz dostonchiligi, xususan, «Xamsa» obrazlari bilan toʻgʻridan-toʻgʻri genetik munosabatga ega. Shu nuqtayi nazardan, mazkur tizimning paydo boʻlishi, tarixiy shakllanish bosqichlari, poetik vazifalarini toʻgʻri belgilash uchun «oshiq», «ma'shuqa», «raqib»dan iborat uchlik obrazlar genezisi xususida muxtasar toʻxtalish zarurati bor.

«Oshiq», «ma'shuqa», «raqib» uchligining «Xamsa» xronotopi tomon poetik hamda xronologik harakat trayektoriyasi taqriban shunday: ilohiy kitoblar – mif – epos – roman – qissa – doston – «Xamsa». Ayni obraz tizimi semantik-struktural xossasiga koʻra «Xamsa»ga qadar quyidagi sinkretizm, differensiatsiya va sintetizm bosqichlarini bosib oʻtgan:

a) ilohiy kitoblar («Zabur», «Tavrot», «Injil», Qur'oni Karim)da. Bunda bashariyat uchun zarur, uning kelajak faoliyatiga qaratilgan muhim axborot sifatida nozil etildi¹. Ilohiy axborotlarda bayon etilishicha, yer yuziga qadam qoʻygan odam

zoti borki, oxir bir kun oʻz Yaratguvchisiga qaytadi. Boshqacha aytganda, yer yuzida hayot kechirishdan asl maqsad Yaratgan amriga muvofiq yashash. Shundagina inson mangu saodat (Uning visoli)ga erishadi. Ammo bu yoʻlda jiddiy toʻsiqlar bor. Bu to'siq Iblis bo'lib, uning vazifasi insonni asl maqsad - Yaratgan buyurgan yoʻldan chalgʻitish, jamoliga vosil boʻlish saodatidan mahrum etish. Bu ulkan jarayonda Iblisning yordamchilari juda koʻp: shayton, jinlar, inson nafsi, nafs voʻliga kirgan odamlar (shaytanat), turli-tuman dunyo ne'matlari (boylik, martaba, aysh-ishrat) va h.k. Demak, ilohiy kitoblarda Haq jamoli (jannat, ajr-mukofot)ga talabgor inson – oshiq, insonni bu ne'matlardan bahramand etuvchi Yaratgan (Olloh) - ma'shuga (yoki ma'shug), oshiq va ma'shuga oʻrtasiga toʻsiq boʻlishga intiluvchi kuch (Iblis) – raqib tarzida namoyon boʻladi. Bu tizim ilohiy kitoblarda qanday bayon etilgan boʻlsa, zamon oxir boʻlgunga qadar shu holatda qoladi. Mutloq haqiqat sifatida oʻzgarmaydi (bu tizim bashariyatning diniy-ma'rifiy, ma'naviy-ijtimoiy ehtiyojlarini ifodalaydi);

b) mifda – bunda syujet va obrazlar tartibi oʻzgardi. Ba'zan ma'shuqa oʻrnini raqib egallagan boʻlsa, ba'zida oshiq nazari tamomila boshqa obyektlarga qaratildi, bunda raqib goh homiy, goh doʻst sifatida talqin qilindi. Keskin oʻzgarish shundaki, oshiq oʻzining asl maqsadidan chalgʻidi. Uning harakatlari xaotik tus oldi. Har uchala obraz individual sifatlarini yoʻqotdi, umumlashdi (bunda bashariyatning nafsoniy, jismoniy va psixologik intilishlari aks etdi);

d) eposda. Epos uchligi qisman ilohiy kitoblar, qisman mif ta'sirida shakllandi. Zamonlar oʻzgarishi (bu oʻrinda mif hukmron boʻlgan – johiliya davrlari va ilohiy aqidalar hukm surgan ma'rifat davrlari nazarda tutilyapti)ga qarab, ayni uchlik mohiyati, shuningdek, epos syujet tizimi ham turli oʻzgarishlar-

¹ Ayni axborot Odam Ato, Momo Havvo va Iblis oʻrtasida kechgan voqea tafsiloti sifatida oʻzining aniq bayon strukturasi bilan ilohiy kitoblar, xususan, Qur'oni Karim sahifalarida nozil boʻldi. Real dalillar, rad etib boʻlmas tarixiy asos, yuksak badiiy shaklda (i'joz maqomida) hikoya qilindi. Shunga koʻra, bu voqea oyat, ilohiy koʻrsatma, shariat yoʻli, ibrat, nasihat, yaxshilikka chaqiriq (amri ma'ruf), yomonlikdan qaytaruv (nahyi munkar) boʻlishi bilan bir qatorda ijodkor inson tayanishi, ulgi olishi, taqlid qilishi mumkin boʻlgan hikoya (badiiyat shakli) hamdir. Haqiqatan, adabiyotning ilk namunalari mana shu asl manba negizida shakllandi. Yoʻqdan bor qilish qudratidan mahrum odamzot, barcha ishlarda boʻlgani kabi, oʻz adabiyotni kashf etishda ham har narsaga qodir Zot (Olloh)ning kitoblariga taqlid qildi. Mana shu dalilga tayangan holda «oshiq», «ma'shuqa», «raqib» uchligi ishtirok etadigan mazkur ilohiy voqea tafsiloti bayon etilgan matnni shartli ravishda «ilk syujet» deb atadik. Bu haqdagi dastlabki ilmiy tadqiqotlar sifatida qarang: Драма жанри (ёзилиш санаси 2011 йил) // Жўракулов У. Назарий поэтика масалалари. — Тошкент, 2015. — Б.49 — 53; Биринчи ўзбек романи — «Ўткан кунлар» (ёзилиш санаси 2014 йил) // Жўракулов У. Назарий поэтика масалалари. — Тошкент, 2015. — Б.51—193; Ишқ қисмати шу азал-абад // Тафаккур. 2014. №3. — Б.54—61 (U.J.).

ga uchradi. Obrazlar ijtimoiy-falsafiy, badiiy-estetik jihatdan milliylashdi. Oshiq – milliy qahramonga, ma'shuqa – millat onasiga, raqib – millat raqibiga aylandi (bunda insoniyatga xos ijtimoiy-milliy maqsadlar ifodalanadi);

g) roman, qissa, doston janrlarida. Bu janrlar doirasida «oshiq», «ma'shuqa», «raqib» uchligini birlashtirib turadigan yagona jihat ayni tizimning umumiylikdan xususiylikka, umuminsoniylik yoki milliylikdan individuallikka tomon ogʻishidir. Sharq va Gʻarb adabiyotida ulkan zamon va makon koʻlamini ishgʻol etadigan bu janrlar ilohiy, umuminsoniy, milliy muammo (maqsad, dard, intilish)larni tom ma'noda xoslashtirdi. Bu janrlar doirasiga kirgan oshiq – oʻz jufti talabidagi insonni, ma'shuqa – ayni juftning oʻzini, raqib – juftlik orasiga tushgan boshqa bir talabgorni bildiradi. Bunga misol tariqasida «Tohir va Zuhra», «Oshiq Gʻarib va Shoxsanam», «Bahrom va Gulandom» tipidagi dostonlarni, «Siyovush va Sudoba», «Yusuf va Zulayho» singari qissalarni, «Levkippa va Klitafont», «Armeniy va Tusenilda», «Tristan va Izolda» tipidagi romanlarni koʻrsatish mumkin (bunda odamning maishiy, moddiy, jismoniy ehtiyojlari yuzaga chiqadi). Bu oʻrinda istisno oʻlaroq oʻz cherkovi ordeni va Yaratgan amri uchun kurashni bayroq qilib olgan Yevropa ritsar romanlari, Xudo yoʻlida xizmat qiluvchi ruhoniylar haqidagi diniy-mistik qissalar, dramalar (misteriyalar)ni qayd etish joiz. Biroq Sharq-islom adabiy muhitida maydonga kelgan «Ismoil alayhissalom», «Zufnun», «Ka'b ul-axbor», «Ibrohim Adham», «Shoh Mashrab» qissalari, islom shariati va tariqati ruhida ijod etilgan dostonlar bu qatorga kirmaydi. Ayni paytda, bu tip asarlar «Xamsa» badiiy konsepsiyasi, obrazlar tizimining shakllanishida muhim oʻrin tutganini yana bir bor ta'kidlash zarurati bor;

d) xamsa janrida: 1) universal badiiy matn qamrovini egalladi (besh doston yagona kontekstda umumlashdi); 2) epik tasvir koʻlami kengaydi (makon-zamon jihatidan butun sayyorani qamrab oldi); 3) konseptual nuqtayi nazardan ilohiy miqyosga qaytdi (abror-odamning oshiqlik yoʻli Qur'oni Karim asosida shakllantirildi); 4) oshiq – ma'shuqa – raqib haqidagi ilohiy axborot badiiy planda talqin etildi, asar poetik doirasiga asos qilib olindi; 5) uchlik obraz tizimini uch maqomda, bosqichma-bosqich badiiy aks ettirdi: avom ishqi, xavoss ishqi, siddiq ishqi yoki hayvoniy (shahvoniy) ishq, majoziy ishq, haqiqiy ishq.

Oshiq – ma'shuqa – raqib obrazlar tizimi oʻzak-mohiyatida ishqning uch bosqichi turishi adabiyot tarixida ilk bor «Xamsa» janri misolida universal koʻlamda oʻrtaga qoʻyildi. Shu nuqtayi nazardan «Xamsa»dagi obraz tushunchasi, obrazlar tizimi mohiyatini belgilovchi asos ishq fenomeni hisoblanadi. Bir yoki bir necha obraz tabiati, ichki semantikasi, maqomi (darajasi), xususan, xronotopik shakli va koʻlamini bevosita ishq belgilaydi.

Sharq va oʻzbek mumtoz adabiyoti, islom tasavvufiy timsollar nazariyasiga oid manbalarda oshiq ishqning, ishq esa oshiqning fenomenal manbasi, quvvat zahirasi ekani qayd etiladi. Oshiqning mohiyati u hosil etgan ishq maqomi bilan belgilanadi. Oshiq atrofidagi barcha shaxs, narsa va hodisalar u erishgan maqom xronotopi doirasida mavjud boʻladi. Shunga koʻra oshiqning ma'shuqa tomon yoʻli har doim undagi ishq darajasi, holati va mezonlari bilan oʻlchanadi. Ammo oshiq harakati ma'shuqa harakati, oshiq xohishi ma'shuqa xohishi, oshiq holati ma'shuqa holatidan kelib chiqadi. Shu ma'noda oshiq ma'shuqa suratining aksi, soyasiga oʻxshaydi.

Ayni paytda oshiq – ma'shuqa – raqib uchligi uchun sinov maydoni, ishq va oʻzlikni anglash jarayoni ilk uchrashuv, ayriliq, visol xronotoplarida sodir boʻladi. Odatda ushbu xronotop shakllari syujet qurilishini tashkillovchi poetik komponent (motiv)lar hisoblanadi. Ammo ularning asl mohiyati syujetdan koʻra obraz tabiatini yoritishda yorqinroq koʻrinadi. Aniqrogʻi, badiiy asar tarkibidagi har qanday obrazning «hayot yoʻli» shu xronotoplar oralab oʻtadi. Bu xronotop maydonlarida sinaladigan qahramon oʻzining kim ekani, qanday vazifa bilan dunyoga kelgani, nimalarga qodirligi va nimalarga loviqligini isbotlaydi. Umuman, «ilk uchrashuv», «ayriliq», «visol» xronotoplari uygʻun holatda faqat oshiq-ma'shuqa-raqib yoki bosh qahramonni emas, asardagi bir butun obrazlar tizimini uygʻun tahlil etish imkonini beradi. Hatto badiiy asardagi syujet, obraz, xarakter, portret, detal, uslub singari boshqa muhim komponentlar ham faqat uchrashuv (kontakt) jarayonida (zidlash, qiyoslash, mulogot koʻrinishida) oʻzini toʻla namoyon eta oladi.

...»Xamsa»dagi oshiq – ma'shuqa – raqib tizimi va bu tizimning bir butun janr xronotopida universallashuvi aynan «Mahbub ul-qulub» tasnifidan kelib chiqadi. Hatto muallifning oʻzi xavoss ishqi ta'rifida bevosita «Xamsa» qahramonlariga havola qiladiki, bu bizni oshiq – ma'shuqa – raqib uchligining bir butun «Xamsa» janri doirasida ichki semantik-struktural munosabatga ega ekani, ishq bosqichlarining tadrijiy yoʻsini oʻlaroq bir-birini toʻldirishi, universal badiiy konsepsiyani ifodalashi xususida xulosa chiqarishga olib keladi. Xususan, Navoiy yozadi: «Inodi olinda teng ham podshoh, ham gado. Bedodi qoshinda bir ham fosiq, ham porso. Oshiq koʻngliga ma'shuq havosin solgʻuchi ham ul va bir jilvasi bila naqdi havosin olgʻuvchi ham ul. Va oshiq mundoq baloning giriftori va mundoq ofatning beixtiyori...

Ishq koʻhistoni bedodining noshodlaridin biri Farhoddur va sahroyi junun zabunlaridin biri Majnundur...»¹.

Shularga asosan «Xamsa» obrazlar tizimidagi oshiq – ma'shuqa – raqib uchligini «Mahbub ul-qulub» tasnifiga koʻra oʻrganish, avvalo, Sharq-islom adabiyotining poetik oʻziga xosligini koʻrsatsa, ikkinchidan, «Xamsa» obrazlar tizimi mohiyatini toʻgʻri belgilashga olib keladi degan tezisni ilgari surish mumkin.

«Mahbub ul-qulub» tasnifiga koʻra ishqning ikkinchi maqomi boʻlib xavoss (xoslar) ishqi keladi. Ishqning oʻrta maqomiga mansub va asosida xavoss ishqi turuvchi oshiq obrazini esa «Xamsa»dagi ikkinchi, uchinchi dostonlarda kuzatamiz. Ularning oshiqligi, ishq yoʻlida koʻrgan-kechiryotganlari «Mahbub ul-qulub»dagi ta'rifga toʻla mos keladi. Yuqorida qayd etganimizdek, «Mahbub ul-qulub»da bu ikki qahramonga ochiq ishoralar boʻlgani singari, ayni qahramonlar tabiati, maishati tasvir etilgan koʻp oʻrinlarda «Mahbub ulqulub» ta'rifiga aynan mos tushadigan oʻrinlarni uchratamiz.²

Navoiy «Farhod va Shirin»dagi ishq konsepsiyasiga «ahli namoz» (ya'ni Ibrohim Adham) yoʻlini asos qilib olgan. Asardagi oshiq – ma'shuqa – raqib uchligini ham ayni maqom asosiga qurgan. Farhodni ma'shuqa tomon olib boruvchi yoʻl mehnat-mashaqqatlar oralab oʻtadi. U ham, xuddi Ibrohim Adhamga oʻxshab, muayyan xarita boʻylab harakatlanadi. Uning faoliyatida tavakkul asosiy oʻrin tutmaydi. Uning tavakkuli avvaldan tuzilgan reja doirasidan chiqmaydi (deylik, tilsim yozuviga koʻra Ahrimanni yenggan Farhod tavakkuli ham oldindan belgilab qoʻyiladi). Shuningdek, Farhod biografiyasi

¹ Alisher Navoiy. Koʻrsatilgan asar. – B.66.

² Masalan, Majnun Layli visoliga yetishgan nuqtada shunday tasvir keladi: Har ishki oʻtub haloklikdin / Ayru emas erdi poklikdin / Ishq ahli bu nav' oʻlsalar pok / Gar vasl muabbad oʻlsa ne bok... («L.M.», 250-bet).

(tugʻilishidan tortib, oʻlimiga qadar) muayyan dinamikadan kelib chiqadi. Dastlab u oddiy odamlar egallagan boʻlgan barcha ilmlarni egallaydi: oʻqish, yozish, hunar, harbiy ilm kabi. Soʻngra oʻz nomiga qilingan tilsim boʻyicha harakatlanadi. Farhod erishadigan har bitta bosqich muayyan ilm, riyozat va mehnatni talab etadi (gʻor, suv xronotoplarida amalga oshirgan ishlarini eslang).

Farhod mana shunday mashaqqatli sinov yoʻlini bosib oʻtgandan keyingina yor jamolini koʻrishga erishadi. Ammo bu yoʻlda unga raqib toʻsqinlik qiladi. Bu vazifani asarda Xusrav bajaradi. Xusrav xuddi xalq ertaklari, doston va qissalaridagi raqiblar singari oʻz vazifasini mukammal bajaradi. Turli yoʻllar bilan oshiqning visol saodatiga erishuviga toʻsqinlik qiladi: Shiringa sovchi qoʻyadi, Farhodni asir oladi, odam yollab, oʻlimiga sabab boʻladi. Ammo Xusrav faqat zohiriy raqib, xolos. Mohiyatga koʻra qaralganda uning chin ma'nodagi raqib emas, oshiqning asl maqsadiga yetishuvi uchun bir vosita ekani ma'lum boʻladi.

Farhodning asl raqibi hayotning oʻzi. Uning chin ma'shuqa, ya'ni Olloh visoliga yetishuvida oʻz hayoti toʻsiq boʻlib xizmat qiladi. Xusrav esa unga mana shu toʻsiqdan qutilishiga yordam beradi. Shu nuqtayi nazardan bu uchlik tizimidagi Shirinning oʻrni ham ikkinchi darajaga tushadi. U ham xuddi Xusrav kabi vositaga aylanadi. Natijada Farhod oʻlimi bir butun asar kontekstida fojia emas, yechim vazifasini bajaradi. Boshqacharoq aytganda, Ibrohim Adham singari soʻngsiz mashaqqatlar bilan manzilga yetib kelgan Farhod Ka'bani topmaydi. Murodiga yeta olmaydi. Safarning ikkinchi bosqichi (Shirin yurtida kechgan voqelik nazarda tutilyapti) Farhod uchun azaliy dardning kulminatsion nuqtasi boʻlib keladi. Faqat oʻlim uni asl maqsadiga – Yor visoliga yetkazadi.

«Farhod va Shirin», «Layli va Majnun» asarlarini «xavoss ishqi» konsepsiyasiga koʻra talqin etilganda mana shunday oddiy, ayni paytda oʻta murakkab talqin maydonga keladi. Aslida xavoss ishqi nisbiy stixiyaga asoslanadi. Shuning uchun bu yoʻlda chalkash, murakkab, tushunib boʻlmaydigan jihatlar koʻp. Negaki, bu yoʻlda inson tabiatidagi oliy va tuban sifatlar sinovdan oʻtadi. Bu esa obraz talqinida ayrim murakkabliklarni yuzaga keltiradi. Bundagi oshiq – ma'shuqa – raqib tizimi ham, ayni sababdan, ikki qatlamli harakat trayektoriyasiga ega.

Mana shu konsepsiyadan kelib chiqqanimizda, «Saddi Iskandariy»da tasvir etilgan yoʻl siddiq yoʻli, undagi badiiy talqin «siddiq ishqi» talqiniga qaratilgani ma'lum boʻladi. Haqiqatan ham, Farhod va Majnun obrazlaridan farqli oʻlaroq Iskandar siddiq ishqini talqin etadi. Negaki, muallif Farhod va Majnun obrazlarini tasvirlashda an'anada mavjud xalq afsonalarini vosita qilib olgan boʻlsa, Iskandar haqidagi asarning maydonga keltirishda bevosita Qur'oni Karim haqiqatiga tayanadi. «Qur'oni karim» talqiniga koʻra Iskandar, avvalo, tarixda yashab oʻtgan real odam. Ikkinchidan va, eng muhimi, tom ma'noda siddiq. Ya'ni Olloh buyurgan vazifani hech ikkilanmasdan, Yaratguvchiga cheksiz muhabbat bilan bajargan Haq oshigʻi.

Biroq Iskandar ham, aynan raqib masalasida Farhod va Majnun bilan qismatdosh (zotan, dunyoni Olloh visoliga yetish uchun bir vosita deb biladigan har bir e'tiqod egasi, har qanday moʻmin uchun dunyo raqibdan boshqa narsa emas). Ammo bu shunday raqibki, uni oʻrganish, mahv etish yoʻlida ma'shuqa koʻrsatmalariga sadoqat bilan amal qilgan insonni mangu saodatga yetkazadi. Shu bois Iskandar yoʻli qandaydir tilsim xaritasi yoki ishq jazbasidan kelib chiqadigan xaotik soʻqmoqlar

oralab oʻtmaydi. Uning yoʻli aniq va ishonchli yoʻl – Qur'oni Karim «xaritasi»ga asoslanadi. Bu xaritani Iskandar hech qachon qoʻlidan qoʻymaydi. Xaritada belgilangan yoʻldan sira chekinmaydi. Qalbidagi ilohiy ishq uni shu qadar qat'iyat va sadoqatga olib keladi. Shuning uchun ham biz Iskandarni tom ma'noda siddiq, uning ishqini esa siddiq ishqi deyishga haqlimiz.

Yuqoridagi ikki asardan farqli oʻlaroq «Saddi Iskandariy»da «arusi dahr» xronotopidagi turli-tuman raqiblarga oʻta kam e'tibor qaratiladi: jahongirlik shuhrati, hisobsiz boylik, dunyoning eng goʻzal ayollari (Ravshanak, Mehrnoz, Chin goʻzali) u qadar hal qiluvchi rol oʻynamaydi. Iskandar qat'iyat va soʻngsiz shijoat bilan oʻz vazifasini bajaradi, xolos. Shu sabab Olloh marhamatiga erishadi. Dunyo hayotida valiylik, nabiylik maqomiga erishadiki, na Farhod, na Majnunning ishq saltanatida egallagan maqomi bunga teng kela oladi.

«Hayrat ul-abror»ning XLIX bobida Iskandar haqidagi mashhur bir rivoyat keltiriladi. Ayni rivoyat «Saddi Iskandariy» syujeti finishida ham aynan takrorlanadi. Rivoyat dunyoning bevafoligi, undan hech kim, hech narsa olib keta olmasligi haqida. Bu rivoyatda sidq ahlining dunyo haqidagi xulosasi aks etgan. Umuman, ushbu xulosa «Xamsa»dagi konseptual sintezni, ayni paytda, dunyo haqida muallif toʻxtamini ham ifodalaydi. Qarilik yoki o'lim arafasi (o'lim yosh-qarini tanlamasligi ham ulkan bir xulosa), oxirzamon yoki qiyomat universal ma'noda dunyo hayotining intihosidir. Bu universal voqelik Sharq adabiyotida, asosan, qish timsolida tasvir etiladi. Yetti iqlimni oʻz bilimi va hukmi ostiga jamlagan Iskandar olamshumul safarlari soʻngida, qish faslida ustozi Arastu bilan inson umrining intihosi xususida soʻzlashadi. Mohiyatan olganda, «Xamsa»dagi «boʻsh qoʻl» konsepsiyasining nazariy asoslari shu suhbatda oʻz ifodasini topgan.

Zotan, «Xamsa»ning qayerda tanazzul, keksayish, intihoga oid voqealar tasvir etilsa, albatta, qish fasliga bogʻlanadi. Iskandar syujetida ham ayni mavzu «boʻsh qoʻl» konsepsiyasi oldidan keladi. Goʻyo muallif bu bilan oʻz qahramonini dunyo va uning mohiyati haqidagi ulkan bir xulosaga tayyorlaydi. Ayni xulosa muallif tilidan shunday bayon etiladi:

Navoiy, jahondin vafo istama, Tutub benavoligʻ, navo istama! Birovga jahondin yetishmas ano Kim, ul tutsa oyini faqr-u fano... («S.I.». 533-bet.)

Bu xulosa «Xamsa»dagi boshqa qahrmonlar xulosasi bilan aynan mos kelishi barobarida muallif badiiy konsepsiyasining Sharq-islom adabiyoti, xususan, epik poeziyasi kontekstidagi ulkan muloqot (global disskurs)ning salmoqli va muhim qismi ekanini koʻrsatadi.

Bundan chiqariladigan xulosa shuki, Sharq-islom tafak-kuridagi oʻlim u qadar katta fojia deb qaralmaydi. «Qutadgʻu bilig» muallifi aytmoqchi, tirik odam borki, albatta oʻladi (aslida bu Qur'oni Karim oyatidan iqtibos: «Har bir tirik jon oʻlim sharobini totguvchidir». 3: 185). Muhimi oʻlim tomon qay holatda borishda. Boshqacha aytganda, dunyo maydonini qanday xulosa bilan tark etishda.

Bahrlar va ulardan hosil boʻluvchi vaznlar qiyosi¹

Aruz tizimida ruknlar birlashib, bahrlarni hosil qiladi. «Bahr» soʻzi arab tilida «dengiz» degan ma'noni bildiradi. Manbalarda bahrning dengiz bilan aloqadorligi xususida deyarli ma'lumot keltirilmagan, faqat Sayfiy ushbu soʻzni istiloh bilan bogʻliq holda quvidagicha talqin qiladi: «Bahr «dengiz» degan ma'noni bildiradi; ammo forsiy tildagi atamalarda u she'riyatdagi bir qancha turlarni ichiga olgan vaznli oʻlchovlarning toʻplam yoki sinflarining biri ma'nosini anglatadi. U dengizga solishtiriladi, chunki dengiz narsalarning turlarini, marjonlar, oʻsimliklar, hayvonlar va boshqalarni oʻz ichiga oladi, shuningdek, she'rlar ham izohlanayotganidek, turli bahrlarda yaratilgan boʻladi. Ba'zilar bundagi oʻxshashlikni joylashuvda deb aytadilar, kishi suv tubiga yiqilganda gangiydi va chalkashadi, she'riyat dengiziga yiqilganda ham vaznlarning koʻplab oʻzgargan shakllariga duch keladi»². Koʻrinadiki, Sayfiy «bahr» soʻzining lugʻaviy va istilohiy ma'nolari orasidagi bogʻliqlikka e'tibor qaratar ekan, aruz tizimidagi hech bir atama tasodifiy boʻlmasdan, muayyan asosga ega ekanligini ta'kidlamoqchi bo'ladi.

«Navoiy ham, Bobur ham oʻz risolalarida zihof va rukndan keyin turuvchi asosiy masala vazn emas, balki bahr ekanini alohida ta'kidlab oʻtganlar. Bu holat oʻzbek aruzshunosligiga arab va fors aruzshunosligidan an'ana sifatida oʻtgan»³. Darhaqiqat, temuriylar davrigacha yaratilgan barcha risolalar, jumladan bu davr aruzshunosligi uchun asos boʻlgan nazariy manbalarda ham asliy ruknlar va zihoflar masalasidan soʻng bahrlar tavsifiga oʻtilgan.

Ramal (ar.»boʻyra toʻqish»; «tuyaning loʻkillashi») – turkiy va forsiy she'riyatda keng qo'llanilgan aruz bahrlaridan biri. Undagi vatadi majmu'lar (V-) va sababi xafif'lar bir-birining orasida joylashgani va bu xuddi boʻyrani arqon bilan toʻqishni eslatgani uchun shunday atalgan. Ba'zi aruzshunoslarning fikriga koʻra, bu soʻz tuyaning loʻkillab chopishini anglatuvchi ramalon kalimasidan olingan, chunki uni oʻqishdan kelib chiqadigan ohang tuyaning loʻkillashini eslatadi¹. Shuningdek, ba'zi rivoyatlarda aytilishicha, ramal qo'shiq nomlaridan biri boʻlib, u mazkur vaznda yozilgani uchun shu nom bilan atalgan. Ramal bahri foilotun (-V--) asliy ruknining baytdagi takroriga asoslanadi. Asosan *musamman* va *musaddas*, ba'zan *mu*rabba' ruknli vaznlarni oʻz ichiga oladi. «Funun ul-balogʻa»da Ramal bahrining 8 ta musamman ruknli, 3 ta musaddas ruknli, bitta murabba' ruknli va bitta mutatavval (jami 13 ta) vaznlari keltirilgan. E'tibor qaratilsa, Ramal bahri asarda hazaj bahri singari batafsil emasligini sezish mumkin. Buni olim quyidagicha izohlaydi: «Bilgilkim, biz yuqori aytib erdukkim, uch bahrni sharh etoli deb. Emdi bu bahr (*Ramal* bahrining – D.Yu.) ning muzohifotining tarkibin va tartibin hazaj bahrindin qiyos qilsoq, ma'lum bo'lurkim, har bahrg'a ne miqdor shu'ba lozim bo'lur. Agar barchasin bitir bo'lsoq, bu kitob aning ehtimolin qila olmas...»². Shu tariqa muallif endi *Ramal* bahrining faqat «matbui mashhur va mu'tabar» vaznlariga toʻxtalib oʻtadi.

Alisher Navoiy «Mezon ul-avzon» da ushbu bahrning yettita musamman ruknli vaznlarini, toʻrtta musaddas ruknli vaznlarini va ikkita murabba' va bitta *mutatavval* ruknli (jami 14

¹ Юсупова Д. Темурийлар давридаги арузга доир рисолаларнинг қиёсий таҳлили. Монография. – Тошкент: Та'lim-media, 2019.

² Сайфий. Арузи Сайфий / Нашрга тайёрловчи Х.Блошман. – Калькутта, 1872. – С.15.

³ Тўйчиев У. Ўзбек поэзиясида аруз системаси. – Тошкент: Фан, 1985. – Б.74.

¹ Шамс Қайс Розий. Ал-мўъжам / Муаллифи сарсухану тавзехот ва хозиркунандаи чоп У. Тоиров. – Душанбе: Адиб, 1991. – С.65; Сайфий. Арузи Сайфий / Нашрга тайёрловчи Х.Блошман. – Калькутта, 1872. – С.47 (форс тилида); Мухаммад Fиёсуддин. Меърож ул-аруз.

² Шайх Ахмад ибн Худойдод Тарозий. Фунун ул-балоға (Бодлиан кутубхонасида сақланувчи Eliott №-127 рақамли қўлёзма). – Б.115а.

ta) vaznlarini sanab oʻtadi. Bobur oʻz risolasida Ramal bahriga mansub 59 ta vaznni keltirib, ulardan 38 tasi musamman, 13 tasi musaddas, 6 tasi murabba' va 2 ta mutatavval ruknli ekanini ta'kidlaydi. Ushbu vaznlardan 31 tasi musta'mal, 28 tasi muxtara', 12 tasi musta'mali matbu' vaznlardir¹. Abdurahmon Jomiyning «Risolai aruz» asarida Ramal bahrining jami 14 vazni keltirilgan boʻlib, shulardan 7 tasi musamman, 5 tasi musaddas va 2 tasi murabba' vaznlardir. Mazkur bahr vaznlarini keltirish jihatidan Navoiy va Jomiy risolasida oʻzaro yaqinlik bor. Atoulloh Husayniy Ramal bahri aslida arablarda musaddas shaklda boʻlishini, juzvlari olti marta foilotundan iborat ekanini, forsiy she'riyatda esa musamman shaklida qoʻllanilishini aytish bilan cheklanadi, unda bahrdan hosil boʻladigan vaznlar keltirilmagan. «Aruzi Sayfiy»da esa ushbu bahrning 19 vazni keltirilgan, ularning 12 tasi musamman, 7 tasi musaddas ruknli vaznlardir. Ramal bahrining risolalardagi oʻrni va vaznlar miqdorini quyidagi jadvalda koʻrish mumkin:

Risola nomi	Bahrning kel- tirilish oʻrni	Bahr mansub doira	Musamman vaznlar	Musaddas vaznlar	Murabba' vaznlar	Mutatav-val vaznlar	Jami
«Funun ul-balogʻa»	3		8	3	1	1	13
«Mezon ul-avzon»	3	Mu'talifa	7	4	2	1	14
«Aruzi Sayfiy»	3	Mujtaliba	12	7	-	-	19
«Risolai aruz»	3	Mu'talifa	7	5	2	-	14
«Aruz risolasi»	5	Mujtaliba	38	13	6	2	59
«Badoyi' us-sanoyi'»	8	Mujtaliba	_	_	_	_	

¹ Хасанов С. Бобурнинг «Аруз рисоласи». – Тошкент: Фан, 1981. – Б.77.

Biz temuriylar davrida yaratilgan aruzga doir risolalarda bahrlar masalasini qiyosiy jihatdan oʻrganish asnosida quyidagi xulosalarga keldik:

- 1. Xalil ibn Ahmad yaratgan aruz tizimida 15 ta bahr (*Tavil, Madid, Basit, Vofir, Komil, Hazaj, Rajaz, Ramal, Sari', Munsarih, Muzori', Xafif, Muqtazab, Mujtass* va *Mutaqorib*) mavjud edi, keyinchalik uning izdoshi Abulhasan Axfash Balxiy ushbu bahrlar qatoriga yana bir bahr (*Mutadorik*)ni qoʻshib, arab bahrlari sonini 16 taga yetkazdi. Bu koʻrsatkich arab tilida undan keyin yaratilgan manbalar: Mahmud Zamaxshariyning «Al-qistos», Abu Zikriyo Xatib Tabriziyning «Al-kafi fil aruz val qavofiy», Abu Jaysh al-Ansoriy Andalusiyning «Aruzi Andalusiy» va boshqa asarlarda aynan takrorlandi.
- 2. Forsigoʻy aruzshunoslar Xalil ibn Ahmad ta'limotini mukammalashtirib, bahrlar sonini koʻpaytirdilar. Bahrom Saraxsiy, Buzurgmehr Qosimiylar aruzning yangi bahrlarini kashf etdilar. Bizgacha yetib kelgan aruzga doir ilk forsiy asar «Al-moʻjam»da mavjud 16 ta bahrga yana uchta bahr (*Gʻarib*, *Qarib*, *Mushokil*) qoʻshilib, 19 ta bahr tahlilga tortilgani holda, risolada aruzshunoslar kashf qilgan 21 mustahdas (yangi) bahrlar haqida ham aytib oʻtiladi.
- 3. Nasiriddin Tusiyning «Me'yor ul-ash'or» asarida 18 bahr keltirilgan boʻlib, unda avvalgi risolada tilga olinmagan *Maqlubi tavil* bahrining berilishi hamda *Mushokil* va *Gʻarib* bahrlarining tushib qoldirilishi muallifning ushbu masalaga oʻz salafidan ayri munosabatda boʻlganini koʻrsatadi.
- 4. Temuriylar davri aruzshunosligida bahrlar miqdorini keltirishda har xilliklar bor. Shayx Ahmad Taroziy oʻz risolasida bahrlar sonini 40 ta deb koʻrsatsa, Abdurahmon Jomiy, Atoulloh Husayniy, Alisher Navoiy va Sayfiy Buxoriylar ular-

ning miqdorini umumiy ma'noda 19 ta deb belgilaydilar. Ular orasida Abdurahmon Jomiy masalaga bir oz oʻzgacharoq yondashib, «Risolayi aruz»da 14 bahrni misollar bilan izohlaydi, arab aruziga xos boʻlgan *Tavil, Komil, Basit, Madid, Vofir* bahrlariga keng toʻxtalib oʻtirmaydi. Boburning «Aruz risolasi»da esa ushbu bahrlarga qoʻshimcha ravishda yana ikki bahr (*Ariz* va *Amiq*) tadqiq qilingan. Ushbu risolalardan faqat «Aruzi Sayfiy»da bahrlarning lugʻaviy ma'nolariga ham toʻxtalib oʻtiladiki, bu bevosita risolaning qoʻllanma xarakteriga ega ekani bilan bogʻliq.

- 5. Shayx Ahmad Taroziyning «Funun ul-balogʻa» asarida nomi keltirilgan 40 ta bahrdan 20 tasi aruzshunoslikka doir boshqa forsiy va arabiy manbalarda uchramaydi. Bu holat ushbu bahrlarning mumtoz aruzshunoslik uchun ham yangi ekanligini va ularning aksariyatini muallifning oʻzi kashf etganligini koʻrsatadi.
- 6. Shayx Ahmad Taroziy bahrlarni ikki katta guruh: muttafiq ul-arkon hamda muxtalif ul-arkonga ajratishda vatandoshimiz Mahmud Zamaxshariyning «Al-qistos» asaridagi tasnifga suyanadi. Bu tasnif keyinchalik Bobur risolasida ham istifoda etilgan.
- 7. «Funun ul-balogʻa»da muxtalif ul-arkonga kiruvchi bahrni hosil qilishda juftlashtirish (uxti) tamoyiliga amal qilish lozimligi ta'kidlanadi, unga koʻra yangi bahr hosil qilinganda ushbu bahr ruknlari oʻzidan avvalgi bahr ruknlarining aksini takrorlashi lozim, agar bu shart ado etilmasa, u bahr sifatida tan olinmaydi. Bu tamoyil temuriylar davridagi boshqa risolalarda kuzatilmaydi.
- 8. Aruzshunoslik tarixida *maf'uvlotu* asliy rukni bahr yasamaydi degan qat'iy qarash mavjud edi. Shayx Ahmad Taroziy ushbu asliy rukndan *Saqil* bahri hosil boʻlishini asoslab, oʻz

risolasida ushbu bahrning ikki vaznini keltirdi va *Saqil* bahrini aruz nazariyasiga olib kirdi.

- 9. Alisher Navoiyning «Mezon ul-avzon» asarida 19 bahr, 160 ta vazn keltirilgan. Navoiy oʻz risolasida tayanch manba sifatida Abdurahmon Jomiyning «Risolayi aruz» asaridan foydalangani uchun aruzshunoslikda mavjud an'anaviy 19 bahrgagina toʻxtalib oʻtadi.
- 10. Zahiriddin Muhammad Boburning «Aruz risolasi»da an'anaviy 19 bahrga qoʻshimcha tarzda yana ikki bahr (*Ariz* va *Amiq*), jami 21 bahr keltirilgan. Shunga binoan uning asarida 9 doira, 537 vazn tahlil qilingan.
- 11. Shayx Ahmad Taroziy asarida keltirilgan *Javil* bahri Zahiriddin Muhammad Bobur keltirgan *Ariz* bahri bilan, *Jadid* bahri *Amiq* bahri bilan tarkiban bir xil boʻlib, ular manbalarda turli nomlar bilan atalgan.
- 12. Aruz tizimi urgʻu bilan bogʻliq she'riy oʻlchov boʻlib, unda soʻz urgʻusi emas, balki rukn urgʻusi yetakchilik qiladi va bunday urgʻu ritm yaratishga xizmat qilganligi uchun ritmik urgʻu deb ataladi. Mumtoz aruzshunoslikda garchi urgʻu alohida hodisa sifatida ta'kidlanmagan boʻlsa ham, mutalavvun hodisasining temuriylar davridagi risolalarda qayd etilishi ritmik urgʻuning aruzshunoslik tarixida muayyan oʻringa ega ekanini va mumtoz aruzshunoslarimizning aruzni urgʻu bilan bogʻliq holda talqin qilganini koʻrsatadi.

Umuman olganda, ijodkorlarning aruz ilmiga doir risolalarini bahrlar va vaznlar misolida qiyosiy oʻrganish natijalari turkiy aruzshunoslik temuriylar davrida oʻzining tadrijiy takomiliga yetganligini koʻrsatadi.

Biografik romanda gʻoya va kompozisiyaning qiyosiy talqini¹

Qiyosiy adabiyotshunoslik sohasida amalga oshirilgan tadqiqotlarda turli adabiy hodisalar muqoyasa qilingan. Bir yoki bir necha adabiy hodisani tipologik qiyos markaziga qoʻyish orqali badiiy asarlarning umumiy va xususiy jihatlari topiladi. Keng qamrovli tahlil amalga oshiriladi. Bugungi kunda qiyosiy adabiyotshunoslik sohasiga oʻz hissasini qoʻshayotgan rus tanqidchisi Yu.I.Mineralov adabiy qiyosning qoʻllanilish miqyosi nihoyatda kengligini, bir milliy adabiyotni xuddi tilshunoslikda turli tillar muqoyasa qilinadigandek boshqa adabiyot bilan, u yoki bu yozuvchilarning ijodini, yoki boʻlmasa, ularning asarlarini syujet-kompozitsiyasi, uslubi, gʻoyaviy mazmuni jihatidan va hokazo koʻrinishlarda oʻzaro muqoyasa qilish mumkinligini, adabiyotni san'atning bir turi sifatida musiqa, rassomchilik va boshqa lisoniy boʻlmagan san'at turlari bilan ham qiyoslash kerakligini ta'kidlaydi².

Oʻzbek adabiyotshunosligida keng miqyosli tipologik tadqiqotga misol sifatida A.Qosimovning «Tipologik oʻxshashliklar va oʻzaro ta'sirning nazariy muammolari» doktorlik dissertatsiyasi³ni qayd etish mumkin. Ishning asosiy maqsadi A.de Sent-Ekzyuperi va A.Kamyu ijodidagi an'ana, novatorlik masalasi, ijodkorlarning oʻzbek tiliga qilingan tarjima variantlarini tahlil qilish, A.Kamyuning zamonaviy oʻzbek nasriga ta'siri muammolarini oʻrganishdan iborat boʻlib, vazifalar qatoriga gʻoya talqini, an'ana, novatorlik, janr va qahramonlar oʻrtasidagi tipologik oʻxshashliklarni aniqlash, A.Kamyu mahorati qirralarini belgilash va h.k.dan iborat. Demak, tipologik qiyos nafaqat bir adabiy hodisani oʻrganishni, balki bir necha tipologik oʻxshashliklarni tahlil qilishni ham taqozo etishi mumkin. Shunday ekan, ishda biografik roman xususiyatlarini koʻrsatish uchun janr namunalari imkon qadar har tomonlama tahlil qilinishi talab etiladi. Roman janriga xos boʻlgan jihatlardan biri roman poetikasi masalasi hisoblanadi.

Biografik romanda syujet va kompozitsiya, mavzu va gʻoya, maktub, dialog, portret, peyzaj, tush, gallyutsinatsiya, badiiy detal, badiiy tafsilot kabi adabiy tushunchalar oʻziga xos tarzda namoyon boʻladi. Syujet prototip hayotini aks ettiradi. Asardagi mavzu va gʻoyalar prototip faoliyati, hayotiy falsafasiga bogʻlanadi.

Oʻzbek adiblari tomonidan yaratilgan «Ibn Sino», «Roʻzi Choriyevning soʻnggi vasiyati» hamda amerikalik yozuvchi Irving Stoun qalamiga mansub «Iztiroblar va quvonchlar», «Hayot ishtiyoqi» romanlarining har birida mavzu va gʻoya, syujet va kompozitsiya oʻziga xos tarzda namoyon boʻladi.

«Ibn Sino» hamda «Iztiroblar va quvonchlar» romanlariga diqqat qaratadigan boʻlsak, ularda turli davr voqealari badiiy ifoda topgan boʻlsa-da, syujetining shakllantirilishida mushtaraklik bor. Ikkala asar ham realistik uslubda yozilgani uchun voqealar dinamik tarzda, sabab-oqibat zanjirida rivojlanib boradi. Romanlar syujeti bevosita biografiyasi bayon etilayotgan shaxslar hayot yoʻllarini tasvirlovchi va ularning vafotlari bilan tugaydigan chiziqdan iborat. Har ikkala asar syujeti an'anaviy biografiyadan farq qiladi. Romanlar qahramonlarning dunyoga kelish voqeasi bilan boshlanmaydi. Biri – oʻn uch yoshli oʻspirinning hayotda oʻz yoʻlini belgilay-

¹ Хажиева Ф.М. Биографик роман жанри хусусиятлари (И.Стоун, М.Қориев ва Н.Норматов асарлари асосида). – Тошкент, 2018.

²Минералов Ю.И. Сравнительное литературоведение. – М.: Высшая школа, 2010. – С.3.

³ Қосимов А. Типологик ўхшашликлар ва ўзаро таъсирнинг назарий муаммолари (А.де Сент-Экзюпери ва А.Камю ижоди мисолида): Фил. фан. докт... дисс. автореф. – Тошкент, 2007. – Б.45.

digan lahzasidan, ya'ni Mikelanjelo san'at olamiga kirib kelishidan; ikkinchisi – oʻn sakkiz yoshli yigit Ibn Sinoning hali yosh boʻlishiga qaramasdan elga tanilgan, bilim olishning eng yuqori pallasiga koʻtarilgan davridan boshlanadi. Qahramonlarning bolalik yillari, ota-onalari toʻgʻrisida ma'lumot retrospeksiyada beriladi. Bu bilan biografik roman mualliflari kitobxonni bayon bilan zeriktirmay, syujet tuguni sifatida oʻz qahramonlari hayotining ziddiyatlar, konfliktlar, boʻronli ijodiy hayot, boshqacha aytganda, iztiroblar va quvonchlar boshlanadigan dramatik momentini belgilaydilar. Oʻquvchini voqealar girdobiga toʻgʻridan-toʻgʻri jalb qilib, qiziqtirib qoʻyadilar. «Iztiroblar va quvonchlar»ning dastlabki sahifalarida freska chizish boʻyicha birinchi ustozi Girlandayo bilan dastlabki uchrashuvga otlanishi arafasida hayajondan kechasi uxlolmay chiqqan Mikelanjeloning ichki hissiyotlari tasvirlangan. Undan soʻng Mikelanjelo tugʻilgan Florensiyaning koʻhna koʻchalari, arka va gumbazli binolari, marmardan oʻymakorlik yoʻli bilan yaratilgan fasadlar, haykallar, bozorlarni ekspozitsiya sifatida badiiy tasvirlaydi.

«Ibn Sino»da muallif asarni Buxoroyi sharifning gumbazli binolari, tor koʻchalari, bozor-u doʻkonlari tasviridan boshlaydi, soʻng alloma Ibn Sinoning kitob doʻkonidan Forobiyning «Ilohiyot» risolasini sotib olib, kechasi bilan uxlamasdan «zakiy muallim»i bilan gaplashib chiqqani voqeasini bayon etadi. Asarning dastlabki qismlarida ora-orada har ikki allomaning ota-onalari, oila a'zolari haqida ma'lumot berib boriladi. Bu ma'lumotlar qatoriga Mikelanjeloning ukalari, tuqqan onasi va tugʻilish voqeasi, oʻgay onasi, uning pazandaligi, italyancha ovqatlar, odatlar; Ibn Sinoning ota-onasi va ularning toʻngʻichlariga mehr-ixloslari, allomaning yagona ukasi, Afshonadagi dala hovlilari, bolalik xotiralari kiradi.

Ikkala asar **syujeti orasida** ham **farq** mavjud. Jumladan, Irving Stoun asarida syujet Mikelanjelo hayoti va faoliyati bilan bogʻliq bir chiziqdan (bu koʻproq biografik janrga xos) iborat boʻlsa, «Ibn Sino»da u bir necha tarmoqdan tashkil topgan. Shu oʻrinda aytish joizki, Maqsud Qoriyev otashparastlar diniga mansub Sanam bilan bogʻliq syujet chizigʻini yaratgan. Unda Ibn Sinoning ushalmagan muhabbati, oʻsha zamondagi oddiy xalq vakillarining hayotini koʻrsatish va, asosiysi, xalq orasida Ibn Sino haqida yoyilgan afsonalardan foydalanish maqsadi nazarda tutilgan. Ibn Sino tarafidan oʻlimga qarshi yaratilgan dori, uning shogird qoʻlidan bexosdan tushib ketishi oqibatida insonni oʻlimdan asrab qolishdan iborat olamshumul kashfiyotning amalga oshmay, ora yoʻlda qolgani, shundan soʻng allomaning vafot etgani toʻgʻrisidagi rivoyat va shu kabilar Sanam bilan bogʻliq syujet chizigʻidan joy topgan. Asar boshida tutash holda turgan syujetning bu ikki chizigʻi voqealar rivoji davomida alohida-alohida koʻrinishda shakllantirilgan.

Har ikki asarni inson buyukligi va u qoldirgan merosning abadiyligi haqidagi **mavzu birlashtirib turadi**. «Iztiroblar va quvonchlar»da ham, «Ibn Sino»da ham ikki buyuk shaxsning hayoti, faoliyati va qoldirgan oʻlmas asarlari badiiy tusda hikoya qilinadi. Oʻquvchi syujetning ana shu voqealari silsilasida tafakkuri, maqsad va intilishlari, xayollari bilan oʻz zamonasidan ancha ilgarilab ketgan, oʻz tafakkuri mevalari bilan hamma zamonlarga xizmat qila oladigan ulugʻ mutafakkirga roʻbaroʻ keladi.

«Iztiroblar va quvonchlar» hamda «Ibn Sino» romanlarining bosh qahramonlari mutafakkir shaxslar boʻlishiga qaramasdan, turli soha vakillari. Shunday boʻlsa-da, bu asarlarda tipologik oʻxshashliklar boʻlgani singari mavzu va gʻoya, syu-

jetni shakllantirish va kompozitsiyani tuzish jihatdan mushtarak jihatlar bor; shuningdek, har bir asar oʻziga xos, soʻz san'atining betakror namunalaridir.

Irving Stounning «Hayot ishtiyoqi» va Nodir Normatovning «Roʻzi Choriyevning soʻnggi vasiyati» biografik romanlari mavzu va gʻoyasi, syujet va kompozitsiyasida ham **mushtarak** jihatlarni kuzatish mumkin.

«Hayot ishtiyoqi»da bosh qahramon sifatida golland rassomi Vinsent Van Gogning badiiy obrazi yaratilgan boʻlib, uning hayot yoʻli va ijodiy yaratmalari tarixi syujetning asosini tashkil qiladi.

Nodir Normatov asarida, yuqorida aytilganidek, oʻzbek rassomi Roʻzi Choriyev hayoti va ijodi yoritilgan. Taniqli adib Erkin A'zamov asar yaratilishi toʻgʻrisida shunday deydi: «Bu kitobni yozish N.Normatovning burchi edi. Roʻzi Choriyev xuddi shunday ajoyib asarga qahramon boʻlishga arziydigan inson edi. Nodir bu rassomni yaqindan bilardi. Ushbu asari yozuvchi doʻstimning ulugʻrassomga chin ehtiromi ramzi boʻlibdi».¹

Rassomning bolalik chogʻlaridan tortib, vafotiga qadar — mashaqqatli, ammo sermazmun va sermahsul hayotini aks ettirgan bu asarning yaratilish sababini muallif romanning boshidayoq qayd etadi. Rassomning *«Birgalashib bir kitob yozsag-u, shu kitob ularning (ixlosmandlarning) savollariga (Qanday qilib rassom boʻldingiz?) javob boʻlsa...»*², degan taklifi biografik romanning yaratilishiga turtki boʻlgan.

Har ikki asarning kompozitsiyasiga e'tibor beradigan boʻlsak, ular bir-biridan farq qiladi. Biri («Hayot ishtiyoqi»)ning kompozitsion qurilishi an'anaviy, spiralsimon, ya'ni voqealar xronologik tarzda rivojlanuvchi yagona syujet chizigʻiga ega.

Asar Van Gog bilan bogʻliq bir syujet chizigʻidan iborat boʻlib, unda buyuk impressionist rassom Van Gog hayoti, ijodiy kamoloti, ruhiy kechinmalari, ijodga boʻlgan betinim ishtiyoqi tasvirlanadi. An'anaviy biografiyadan farqli ravishda I.Stoun yaratgan «Hayot ishtiyoqi»da syujet chizigʻi Van Gog tugʻilishi tarixi bilan boshlanmaydi. Van Gog romanga oʻz hayot yoʻlini topishi arafasida turgan, kartinalar galereyasida sotuvchi boʻlib ishlab, kun kechirayotgan yigirma bir yoshli yigit sifatida kirib keladi. Ursula ismli qizni sevib qolgan Van Gog sarguzashtlari – syujetning asosiy voqealari uning muhabbati rad etilgandan soʻng boshlanadi. Ruhan singan yigit nima qilarini bilmay, ruhoniylikni qabul qilib, oʻz hayotini bechoralarga yordam berishga baxshida qilmoqchi boʻladi, ammo shaxtyorlar orasida yurganida bekorchilikdan koʻmir bilan ularning suratlarini chiza boshlaydi. Chizilgan suratlarda shaxtyorlar tashqi koʻrinishidan ham koʻra, ularning xarakteri, kasbiy qiyofasi namoyon boʻladi. Buni yigitning oʻzi ham his etadi. Shundan soʻng Vinsentda rassom boʻlish istagi paydo boʻladi. Muqaddima (prolog) va sakkiz qismdan iborat asosiy syujet Van Gog yashab, ijod qilgan shaharlarning nomlari bilan (London, Borinaj, Etten, Gaaga, Nyuenen, Parij, Arl, Sen-Remi, Over kabi) atalgan. Har bir joy bilan bogʻliq voqealarda, tarixiy shaxslar jonli ishtirok etadi. Van Gog hayoti va ijodi syujetni rivojlantiradi. Shu bilan bir qatorda, muallif asarda Yevropaning turli qishloq va shaharlaridagi san'at ahli va san'at dargohlari, rassomchilik maktablari toʻgʻrisida ham soʻz yuritadi. Van Gog chizayotgan rasmlar vositasida oʻquvchini kambagʻal dehqonlar, oddiy xalq vakillarining hayoti, ularning uyi, ishi, oilasi kabilar bilan tanishtiradi. Shu tariqa rassom yashagan ijtimoiy-tarixiy davr manzarasi hosil qilinadi. Bu esa badiiy roman syujetining asosiy xususiyatlaridan biridir. Ana shu

¹ Улуғов А. Улуғ рассом ҳақида роман // Ўзбекистон адабиёти ва санъати. 2009. №27.

² Норматов Н. Рузи Чориевнинг сунгги васияти. – Тошкент, 2008. – Б.4.

tarixiy-ijtimoiy sharoit fonida rassom yaratgan kartinalarning tarixi bilan tanishib boriladi.

Oʻzbek yozuvchisi Nodir Normatov yaratgan «Roʻzi Choriyevning soʻnggi vasiyati»da rassomning badiiy biografiyasi noan'anaviy usulda yaratilgan. Roman uch qismga ajratilgan va qismlar bir-biridan bayon texnikasi bilan tubdan farqlanadi. Adibning syujet va xarakter yaratish texnikasini oʻzbek adibi I.Gʻafurov quyidagicha ta'riflaydi: «U tabiiy hodisalarni tabijy magomini topib chizadi. Shu xolos. «Chizish» soʻzi Nodir Normatovning badiiy usuliga g'oyatda mos, bu usulni rosmana xarakterlaydi. U batafsil uzoq tasvirdan koʻra chizishni yaxshi koʻradi, zero, chizishda ham chizish bor – Nodir xarakter qirralarini kesma punktir bilan chizadi. Voqealardan voqealar shunday kesma punktirlarda tugʻilib bir-biriga gʻuluv bilan ulanib boradi. Bunda tabiiyki, bayonda parokandalik xavfi ham tugʻiladi, voqeaning boshi, davomi va oxiriga bogʻlanmay qolishi ehtimoldan xoli emas. Ammo yozuvchi qandaydir oʻziga ma'lum hikoya qilish zahiralarini bizga bilintirmaygina qoʻllab, syujet va kompozitsiyada yaxlitlik, butunlikka erishadi. Kesma punktir vositasida hikoya tarzida erishilgan butunlik – Nodirning yozuvchilik mahorati va badiiy uslubining oʻziga xos, uni boshqalardan ajralib turadigan koʻzga koʻrinarli qirrasidir»1.

Qiyoslanayotgan mazkur ikki asar arxitektonikasida tubdan farq boʻlsa-da, har ikki asarda ham xronikal syujetdan foydalanilgan; bundan tashqari, ularda yoritilgan mavzu va gʻoya bir-biriga mushtarak.

Har ikki asarda bosh qahramon rassom boʻlganligidan bu asarlarda san'at va uning sirli olami mavzui keng va atroflicha

yoritib berilgan. Ularda buyuk musavvirlar, san'at maktablari, rassomchilikning oʻziga xos qonun-qoidalari toʻgʻrisida bayon etilgan. I.Stoun XX asr boshlarida Gʻarbiy Yevropada yashab ijod etgan koʻplab rassomlar haqida ma'lumot berib, jumladan, impressionizmning mohiyati va uning boshqa oqimlardan farqini – uning mohiyati rassomchilikning umumiy qonunlariga boʻysunmasdan, voqelikni taassurotlar prizmasi orqali chizish, rassom nigohida qay tarzda gavdalangan boʻlsa, shundayligicha polotnoga tushirishda ekanini Van Gog ijodi misolida, jonli voqealarda koʻrsatgan.

«Hayot ishtiyoqi» va «Roʻzi Choriyevning soʻnggi vasiyati» romanlarida yana bir **mushtarak jihat** bor – bu ularda ifodalangan insonparvarlik va san'atga fidoyi boʻlish gʻoyasidir. Bu mushtaraklik adabiy ta'sir natijasida tugʻilmay, har ikki bosh qahramonning hayoti va faoliyati mazmunidan, roman mualliflarining badiiy maqsadidan kelib chiqadi.

I.Stoun yaratgan Van Gog – telbalarcha ijodga berilgan shaxs. Kitobxon uning oʻta fidoiyligidan hayratga tushadi, chunki u san'atni oʻz shaxsiy hayotidan ustun qoʻyadi. Umri davomida yagona kartinasini sota bilgan rassom har qanday muvaffaqiyatsizlikka qaramay, oʻz ijodiy yoʻnalishiga sodiq qoladi. Ommaga ma'qul tushadigan, ammo hayotiy haqiqatdan yiroq kartinalarni chizishdan bosh tortadi. Oʻzining ishlariga Van Gog quyidagicha ta'rif beradi: «Mine are better... Mine are truer, deeper. I'll take my life of reality and hardship. That is not the road on which one perishes».¹ («Mening kartinalarim yaxshiroq... Meniki haqqoniyroq va falsafiyroq. Haqiqat va qiyinchilik yoʻlini tanlayman. Birov halok boʻladigan yoʻl emas bu»).

¹ Fафуров И. Нодирнинг Ойтоши ёки Сурхон руҳи // Ўзбекистон адабиёти ва санъати. 2010. №52 (4087).

¹ Stone Irving. Lust for Life. – New York: Pocket books, 1945. – P.181 – 182.

Van Gog impressionizm oqimiga mansub rassom boʻlgan. Yangi shakllangan impressionizm va uning vakillarini Yevropa, boshqa har qanday yangilik va hamma joyda boʻlgani singari darhol hazm qila olmaydi, chunki ular «oʻz asarlarida xunuklik va axloqsizlikni tasvirlashadi» va shu orqali «achchiq haqiqat tomon, undan esa chin goʻzallikni» koʻrsatishga intilishadi. Dastlabki qarashda paradoksal bu ibora aslida roman mohiyatini, magʻzini, gʻoyaviy mazmunini ifodalaydi.

Asarda kuchli pafos va boʻrttirish usuli yetakchilik qiladi. Van Gog xarakteriga xos xususiyatlar shunchaki sanab oʻtilmay, voqealar vositasida ochib boriladi. Asarda doim pulga muhtoj, och va telbalarcha yuradigan Van Gog umri past tabaqa vakillari: konchilar, fohishalar, kambagʻal dehqonlar orasida kechadi. Ular bilan birga achchiq hayot kechiradi. Qoʻlidan kelgancha mehr-oqibatli boʻlib, ulardan yordamini ayamaydi. Konchilarning ogʻir ahvolini koʻrib achinganidan oxirgi kiyimigacha boʻlib beradi. «The suit of clothes he left with the old man who had fragile written across his back. The underwear and shirts he left for the children, to be cut and made into little garments. The socks were distributed among the consumptives who had to descend Marcasse. The warm coat he gave to a pregnant woman whose husband had been killed a few days before by a cave-in, and who had to take his place in the mine to support her two babies»¹. («U egni-boshini ortiga moʻrt yozuv bitilgan qariyaga qoldirdi. Ichki kiyim va koʻylagini yosh bolalarga koʻylakcha qilib bichish, tikish uchun hadya qildi. Paypoqlarini Markass shaxtasiga tushib, silga chalinganlarga boʻlib berdi. Issiq paltosini bir necha kun oldin shaxtada roʻy bergan baxtsiz hodisada halok boʻlgan erkakning homilador bevasiga berdi; Chunki ayol ikki goʻdagini boqish uchun erining oʻrnini egallashga majbur boʻlgandi»).

Koʻrinib turibdiki, Vinsent tabiati uning xatti-harakatlarida koʻrsatilgan. Muallif bunday batafsil tasvir orqali Vinsentda fidoyilik va yuksak shafqat bilan xarakterlanadigan insonparvarlik hissi hamma narsadan ustun turishini koʻrsatadi. Keyingi boblardagi voqealar ham muallifning bosh qahramonga xos aynan ana shu xususiyatga ayricha e'tibor qaratganini koʻrsatadi.

Asarda Van Gog timsolida insonparvarlik va fidoiylik ulugʻlanadi. Bosh gʻoya ham mana shu.

N.Normatovning «Roʻzi Choriyevning soʻnggi vasiyati» asarida oʻzbek rassomining insonparvarligi va fidoyiligi milliy mentalitet doirasida tasvirlangan. Adib asarda oʻz qahramoni xarakterini koʻproq muallif xarakteristikasi va bayon vositasida yoritishga harakat qilgan.

Muallif asar davomida qahramonining odamiyligi, oʻzbek xalqi ayniqsa, oʻz yurti Surxon zamini odamlariga cheksiz muhabbatini voqealar orqali ham koʻrsatib boradi. Binobarin, Roʻzi Choriyev oʻz kartinalarida aynan oddiy xalq vakillarini aks ettiradi. Negaki san'at mazmunini butun olam va uning markazida turgan insonga boʻlgan muhabbat tashkil qiladi. Ana shunday muhabbatsiz olamni ham, odamni ham real aks ettirish mumkin emas. Roman muallifi ana shu haqiqatni teran anglagan holda, oʻz qahramonining insonga boʻlgan muhabbatini birinchi planga olib chiqadi.

Xulosa qilib aytganda, I.Stounning «Hayot ishtiyoqi» va N.Normatovning «Roʻzi Choriyevning soʻnggi vasiyati» romanlari bosh qahramon tanlash tamoyili, qalamga olingan mavzu va badiiy gʻoya nuqtayi nazaridan mushtarak. Ammo tarixiy-ijtimoiy sharoit, milliy mentalitet, tarixiy shaxs

¹ Stone Irving. Lust for Life. – New York: Pocket books, 1945. – P.69.

boʻlgan bosh qahramon ruhiy olami, hayot tarzi, orzu-intilishlarining turlichaligidan kelib chiqadigan oʻziga xoslikdan tashqari, har bir yozuvchining individual tasvir usuli, voqealarni tanlash tamoyili mavjud. Nodir Normatov romanida, Irving Stoun asaridagidan farqli oʻlaroq, ayrim oʻrinlarda bavon, muallif munosabati, publitsistik uslub vetakchilik qiladi. «Roʻzi Choriyevning soʻnggi vasiyati»da «Hayot ishtiyoqi»dagi singari syujet izchil, voqealar ketma-ketligida rivojlanib bormaydi. Yozuvchi asarning uch qismida uch xil kompozitsion qurilmadan foydalanadi. Bu qismlarda voqealar davom etmaydi, balki bu qismlar bir-birini toʻldirishga, chuqurlashtirishga, ma'lum hodisaga turli rakursdan qarashga, o'quvchining turlicha idrok etishiga yoʻnaltirilgandir. Nodir Normatov romanida an'anaviy va modern romanchilik uslublarining sintezini koʻramiz. Umuman, mazkur roman oʻzbek adabiyotida oʻziga xos hodisadir.

Jek London va Abdulla Qahhor ijodida badiiy psixologizm¹

XIX asr oxiri XX asr boshlarida oʻz faoliyati va asarlari bilan butun afkor ommanining diqqatini tortgan amerikalik adib Jek London ijodi va hayotiy biografiyasi adib bilan zamon nuqtayi nazaridan deyarli ketma-ket yashagan, ijtimoiy kelib chiqishi va hayot yoʻli ma'lum ma'noda yaqin boʻlgan Abdulla Qahhor e'tiborini ham qozongan. Abdulla Qahhor, oʻzi e'tirof etganidek, Jek London asarlari bilan tanish boʻlgan. Adabiyotshunoslarning kuzatishiga koʻra, u Jek London adabiy maktabidan bevosita ta'sirlangan. Abdulla Qahhor oʻzining

bir qator hikoyalarini, «Sarob» romanini yaratishda amerikalik adibning «Martin Iden» romani syujeti skeletidan, shuningdek, yozuvchining biografiyasidan foydalangan.

Jek London hayotning butun mashaqqatlari, ziddiyatlari, miqyoslari bilan toʻqnash keladi va keyinchalik bularning barini oʻz asarlarida badiiy qayta gavdalantiradi. Mana shu hayotiyligi sabab adib romanlari, qator povest va hikoyalari, pyesalari butun jahon kitobxonlarining sevimli mulkiga aylangan. Jek London hikoyalarida hamisha qahramonning rang-barang ruhiy holati tasviriga duch kelamiz. Jek London koʻp hollarda qahramonning ichidan turib uning ichki olamini kashf qiladi.

Abdulla Qahhor hikoyalari qisqaligi, asosan, qahramon ruhiy holatining uning qiyofasidagi aksi tasviri, qahramon nutqi va detallarga asoslangani bilan ajralib turadi. Abdulla Qahhor Jek London singari bir yoki bir necha voqeani batafsil, barcha ikir-chikirlari bilan qalamga olmaydi. Adibning hikoyalari voqelikning bir momentini qayd etgan fotosuratlarga oʻxshaydi. Ularda har bir soʻz, detal yoki tafsilot Sharq mumtoz lirikasidagi singari kuchli ramziy yukka ega va mana shular orqali qahramonning ichki olami kashf etiladi.

Har ikkala adib ijodida badiiy psixologizm kompozitsion asos darajasiga koʻtarilgan hikoya bor. Bu – Jek Londonning «Buyuk sehrgar» hamda Abdulla Qahhorning «Koʻr koʻzning ochilishi» hikoyalaridir. Har ikki hikoyada ham qahramonlar inson psixologiyasidan foydalanib oʻz maqsadlariga erishadilar. Bu ikki hikoya psixologik motivning kompozitsion asos darajasiga koʻtarilishi, syujeti bilan bir-biriga yaqin boʻlsa, «Hayotga muhabbat» hamda «Ming bir jon» hikoyalari gʻoyaviy jihatdan mushtarak. Har ikkala hikoyada ham hayot va oʻlim oraligʻida turib, tirik qolish uchun kurash olib borgan qahramonlar tasvirlanadi.

¹ Қобилова Н.С. Жек Лондон ва Абдулла Қахҳор ижодида бадиий психологизм. – Тошкент, 2019.

«Martin Iden» va «Sarob» romanlari oʻrtasida bir qator mushtaraklik koʻzga tashlanadi. Bu, eng avvalo, qahramonlarni tanlash va voqealar rivojida koʻrinadi. Har ikkala romanning bosh qahramoni – ijodkor shaxslar. Ularning har ikkalasi ham kambagʻal oiladan chiqqan.

Asar voqealari boshlanganda Martin ham, Saidiy ham ota-onalaridan ajralib, yetim boʻlib qolgan edilar; har ikkala qahramonning bu olamdagi eng yaqin kishilari – opalari edi. Saidiyning bir, Martinning ikki opasi bor edi. Tabiiy qon-qardoshlik bogʻlab turgan bu opalar oʻz jigariga ona singari har qancha mehribon boʻlmasin, ular Martin va Saidiyning yuksak orzu-niyatlarini anglay olmaydilar. Ruf otasi, onasi, akalaridan iborat toʻlaqonli badavlat oilaning erka farzandi boʻlgani singari, Munisxon ham onasi va akasining mehr-muhabbati panohida toʻq, betashvish hayot kechiradi.

Har ikkala romanda ham pochcha obrazi bor. Martinning pochchasi Bernard Xigginbotam va Saidiyning pochchasi Muhammadrajab savdogarlik bilan shugʻullanadi. Ularning ikkalasi ham oʻz rafiqalarini ayovsiz xoʻrlaydi, bu mushfiq ayollarni inson oʻrnida koʻrmaydi, uka tufayli oilada gʻidi-bidi boʻlib turadi. Gertrudaning taqdiri Martinning yurak-bagʻrini ezgani singari, Saidiy ham opasiga qarab qattiq iztirob chekadi. Martin ham, Saidiy ham ma'lum muddatga qoʻli kaltalik sabab pochchalarinikida turishga majbur boʻladilar. Har ikkisining orasi pochchasi bilan boshqalar tushunmaydigan orzu-niyatlar tufayli – Martinda adib boʻlish orzusi, Saidiyda esa oʻqishga kirish niyati tufayli buziladi.

Har ikkala asar qahramonlarining hayotidagi juda muhim oʻzgarish – ular ilohiy muhabbat bilan sevgan qizni uchratishlari voqeasi bilan boshlanadi. Ruf ham, Munisxon ham yuqori tabaqa vakili boʻlib, Martin uchun ham, Saidiy uchun ham qoʻl yetmas yuksaklikda yashaydilar.

Voqealar har ikki romanda bir-biriga mushtarak ravishda rivojlanib boradi. Yuqori tabaqaga mansub boʻlgan boy-badavlat qizga erishish maqsadi Martin va Saidiyni birdek iztirobga solib, ulardagi ichki kuchni uygʻotib yuboradi. Har ikkala yigit oʻz sevgilisiga munosib boʻlish, unga erishish uchun jamiki imkoniyatni ishga soladilar. Martin va Ruf oʻrtasidagi muhabbatni Rufning yaqinlari qabul qila olmaganlari singari, Munisxonning akasi Muxtorxon ham ikki yosh oʻrtasidagi munosabatga yuzaki qaraydi, bilib turib oʻzini bilmaslikka soladi.

Voqealarning keyingi rivoji roman mualliflarining badiiy maqsadiga koʻra turlicha rivojlanadi. Martin kapitalizm sharoitida mumkin boʻlgani singari kutilmagan muvaffaqiyatga, katta boylikka erishadi. Saidiy esa mustabid tuzumning minglab qurbonlaridan biriga aylanadi. Yechim esa har ikki asarda oʻxshash: tabiat tomonidan katta potensial kuch ato etilgan, yuksak orzu-maqsadlar bilan yashagan ikki navqiron yigit xudkushlikka yuz tutadilar.

«Martin Iden» va «Sarob»da motivlararo mushtaraklik ham koʻzga tashlanadi. Binobarin, voqealar Martin va Saidiyning oʻzlari uchun yangi boʻlgan muhitga – birining oʻzi yot boʻlgan tabaqa vakillari xonadoniga, ikkinchisining universitetga qadam qoʻyishi bilan boshlanadi. Rufni ham, Munisxonni ham birinchi koʻrishdayoq yigitda barq urib turgan sogʻlom navqironlik oʻziga jalb qiladi; umuman, har ikkala qiz ijtimoiy tafovut haqida oʻylab koʻrishga, bu yigitlarning yuksak ma'naviy dunyosi bilan tanishishga ulgurmay, tabiiy maylning asiri boʻlib qoladilar. Har ikkala romanda birinchi uchrashuvdayoq maftun boʻlish motivi bor. Bu romanlarda qahramonlar xarakterini ishlashda ham mushtaraklik koʻzga tashlanadi. Har

ikki yigit ma'shuqa nazariga tushish uchun favqulodda vaziyat tugʻilishini orzu qiladi. Martin va Ruf, Saidiy va Munisxonning muloqot qilib turishlariga vosita boʻladigan badiiy detal – kitoblar, mutolaa edi. Kitob vosita boʻlgani har ikki asarda bir-biriga oʻxshash epizod orqali muayyanlashtiriladi. Har ikki romandagi velosiped detali, velosipedda shahardan tashqariga sayrga chiqish epizodi, Martin va Saidiyning matbuotda chiqadigan asarlarini ustunlar bilan oʻlchashi, yozuvchilikdan maqsad – boylik orttirish orqali ma'shuqa vasliga erishish ekani, jamiki orzu-a'mollaridan judo boʻlgan oshiqlarning bir payt qoʻl yetmas yuksaklikda deb tasavvur qilingan, pirovardida esa bosh egib kelgan mahbubani rad etishlari kabi motivlar ham mushtarak.

Ammo bu mushtarakliklar Abdulla Qahhor romanining original asar ekanini rad etishga asos boʻlolmaydi. Chunki oʻxshash syujetlar boshqa yozuvchilar ijodida ham uchrab turadi¹.

Har ikki romanda davr psixologiyasiga moslasha olmagan qahramonlarning tragik qismati qalamga olingan. Qiyoslanayotgan ikki romanda bir-biridan keskin farq qiladigan ikki xil milliy psixologiya tasvirlangan. Milliy psixologiya koʻproq oilaviy-maishiy masalalarda namoyon etilgan.

Jek London qahramon ruhiy dunyosini batafsil, tadrijiy oʻsishda koʻrsatadi va badiiy psixologizmning monolog, gallyutsinatsiya va psixologik parallelizm shakllaridan keng foydalanadi. Abdulla Qahhor esa oʻz qahramonlarining ruhiy-psixologik holatlarini koʻproq ularning xatti-harakati, qiliqlari orqali koʻrsatadi. Fikrlar, hislarning uzluksiz oqimini, dialektikasini koʻrsatish (analitik prinsip) «Sarob»da koʻp uchramaydi.

Omon Muxtor va Oskar Uayldning badiiy-estetik olami¹

Qiyosiy adabiyotshunoslikning asosiy oʻrganish obyekti boʻlgan, bevosita adabiy aloqalar, ta'sirlar, oʻzlashtirmalar, tipologik oʻxshashliklar hamda milliy adabiyotlar rivojining oʻziga xos xususiyatlari tadqiqiga bagʻishlangan ishlar filologiya uchun muhim ahamiyat kasb etishi bilan birga barchada birdek qiziqish uygʻota oladi.

Adabiyotshunoslikdagi soʻnggi yillarda olib borilgan izlanishlarni kuzatar ekanmiz, komparativistikaning nihoyatda keng qamrovli soha ekaniga ishonch hosil qilish mumkin. Biz ham bir tadqiqot doirasida koʻzgu, portret ramz va motivlarining nasr va she'riyatdagi oʻrnini oʻrganish imkoni cheklangan degan xulosa asosida badiiy adabiyotdagi koʻzgu, surat ramzlarining gʻoyaviy-estetik vazifasini oʻzbek va Gʻarb adabiyotidagi bir nechta yozuvchilarning nasriy asarlari asosida olib borishni ilmiy ishimiz uchun asosiy maqsad qilib oldik. Maqsadni amalga oshirish uchun qiyoslash, chogʻishtirish usullaridan keng foydalandik.

Tadqiqotimizda oʻzbek adabiyotshunosligida ilk bor Oskar Uayld ijodi oʻrganish obyekti qilib olindi. Shu bilan birga Omon Muxtor asari birinchi marta Oskar Uayld asari bilan qiyosiy asosda oʻrganildi.

Dissertatsiyada asosiy tadqiq obyekti sifatida turli tarixiy davr, geografik makon, ijtimoiy-siyosiy tuzum hamda oʻziga xos adabiy-estetik muhitda yashab ijod qilgan ikki yozuvchi tanlab olindi. Ularning biri, ijodining asosiy qismi XX asrning

 $^{^1}$ Норматов У. Адабий ўхшашликлар хусусида // Норматов У. Етуклик. – Тошкент: Адабиёт ва санъат, 1982. – Б.120 – 133.

¹ Тоирова Н.И. Бадиий адабиётда кўзгу ва сурат рамзларининг ғоявий-эстетик вазифалари (Омон Мухтор ва Оскар Уайльд асарлари асосида). Филол. фан. номз... дисс. – Тошкент, 2018. – Б.68 – 79.

soʻngi choragi va XXI asrning boshlariga toʻgʻri kelgan, zamonaviy oʻzbek adabiyotida oʻz oʻrniga ega boʻlgan yozuvchi Omon Muxtor boʻlsa, ikkinchisi asosan, XIX asrning soʻngi choragida ijod qilgan va estetizm yoʻnalishining asoschilaridan boʻlgan taniqli ingliz adibi Oskar Uaylddir.

Mazkur adiblar bir tadqiqot doirasida oʻrganish uchun tanlab olinganining asosiy sababi ular tomonidan yaratilgan «Koʻzgu oldidagi odam» va «Dorian Greyning portreti» romanlari hisoblanadi. Birinchidan, Omon Muxtor romanida koʻzgu (Siroj muallimning koʻzgudagi aksi) Oskar Uayld romanida portret (Dorian Greyning yoshlikda chizilgan surati), asosiy ramziy obraz sifatida gavdalanadi. Ikkinchidan, har ikki roman ham yozuvchilarning ijodiy-poetik olamida muhim oʻringa ega boʻlib, adiblar mazkur asarlar paydo boʻlgunga qadar oʻziga xos ijodiy evolyutsiya yoʻlini bosib oʻtgan. Demak, koʻzgu va portret ramzlariga asos boʻlgan asarlar ijodiy izlanishlar samarasidir.

XX asrning 90-yillariga kelib, Omon Muxtor ham shakli, ham mazmuni jihatidan oʻziga xos boʻlgan, xalq afsona va ertaklari motivi asosiga qurilgan realistik nasr uchun yangi boʻlgan romanlar yaratdi. «Ming bir qiyofa»(1994), «Koʻzgu oldidagi odam»(1996), «Ayollar mamlakati va saltanati», «Ffu»(1997), «Aflotun»(1998) shular jumlasidandir. «Ming bir qiyofa» mustaqil, biridagi voqealar davomi ikkinchisida kuzatilmagan, bir-birini badiiy-gʻoyaviy mantiq bogʻlab turuvchi uch hikoyatdan tashkil topgan.

Omon Muxtorning koʻplab asarlarida ramziylik muhim ahamiyat kasb etgan. Tarixiy mavzuga bagʻishlangan «Aflotun» asari bunga yorqin misol boʻla oladi. «Undagi sahro, ayniqsa, quduq, lagan, sandiq, suv – bular ramzlar. Demak, shart-

lilik kuchli»¹. Bu yerda xalq afsona va ertak elementlari ham yaqqol koʻzga tashlanadi.

Omon Muxtorning «Tepalikdagi xaroba», «Ming bir qiyofa», «Koʻzgu oldidagi odam» romanlari yaxlit holda «Toʻrt tomon qibla» (2001) trilogiyasini tashkil etgan². Uch romandan iborat «Sharq daftari» deb berilgan bu romanlar yozuvchining ijodiy tajribasida muhim bosqich sifatida ham ahamiyat kasb etadi.

Omon Muxtor asarlari bir-birini takrorlamaydi. Ularda inson tafakkurining muayyan qirralarini yorqin badiiy obrazlar, ramziy detallar orqali yoritishga harakat qilingan. Inson tabiatida ezgulik va yovuzlik mujassam, degan Sharq falsafasiga tayangan holda yozuvchi an'anaviy ijobiy va salbiy qahramon tushunchalaridan voz kechadi.

Omon Muxtorning «Ishq ahli» va «Buyuk farrosh» nomli romanlarini oʻz ichiga olgan «Navoiy va rassom Abulxayr» kitobi 2006-yili chop etildi. 2009-yili nashr qilingan «Odamlar kulishlari kerak» nomli kitobiga adibning xuddi shu nomdagi yangi romani va kichik hajmdagi asarlari kiritilgan. 2010-yili nashr qilingan «Xotin podshoh» kitobiga «Xotin podshoh», «Egilgan bosh», «Maydon» romanlarini oʻz ichiga olgan. Omon Muxtor, shuningdek, «Daraxtlar parvozi», «Shuhrat domla» nomli esselar muallifi hamdir.

Omon Muxtorning ijod olamiga qiyoslash uchun tanlaganimiz ingliz adibi Oskar Uayld Yevropa va jahon adabiyoti tarixida estetizm adabiy oqimining yorqin namoyandasi, shoir, essenavis, nasr ustasi, komediyalar muallifi sifatida oʻz oʻrniga ega. Oskar Uayld shifokor-oftolmolog oilasida dunyoga keldi.

¹ Муҳаммад Али. Қунту сабот билан тикланган қаср // Ўзбекистон адабиёти санъати. 1998. №23 – Б.З.

² Мирвалиев С., Шокирова Р. Ўзбек адиблари. – Тошкент: Фан, 2007. – Б.176.

Oskar yoshligidan fenomenal qobiliyatga ega boʻlib, atrof-olamga jiddiy nazar bilan qarar va shu bilan birga, tashqi koʻrinishiga, chiroyli va hashamdor liboslarga juda ruju qoʻygan bola edi. 1871–1874-yillarda Dublin universitetida tahsil olgan davrda qadimiy tillarni oʻzlashtirish va Ellada madaniy merosini oʻrganishga katta e'tibor qaratdi. Bu O.Uayld estetikasining shakllanishida poydevor rolini oʻynadi. Keyin (1874–1877-yillari) oʻqishni Angliyada, Oksford universitetida davom ettirib, barcha gumanitar fanlardan yuqori yutuqlarga erishdi, oʻzining nozik badiiy didini namoyon etdi.

Oskar Uayld 1875-yili Italiyaga sayohat qiladi. Ana shu sayohat taassurotlari asosida yaratilgan «Ravenna» dostoni uchun 1878-yili Oksford universitetining eng taniqli bitiruvchilariga beriladigan Nyudigeyt mukofotiga sazovor boʻladi.

Oskar Uayld zamondoshlari Balzak, Ivan Turgenev, Lev Tolstoy, Fedor Dostoyevskiylar ijodini qadrlagan boʻlsa-da, oʻz ijodida realizm tamoyillariga rioya etishni xohlamadi. «Yolgʻon san'at inqirozi» maqolasida voqelik (hayot) san'atga taqlid qiladi, deya ta'kidlaydi. U shu tariqa san'atni hayotdan ustun qoʻyadi, hayotdan koʻra san'at asarining nafosati, jozibadorligi va maftunkor tarovatini afzal koʻradi.

Rus adabiyotshunosligida Oskar Uayld ijodi bilan shugʻullangan dastlabki munaqqidlardan boʻlgan A. Volinskiy fikricha, «yozuvchi tashqi olamni jonsiz, passiv kuch va qoʻpol, qotib qolgan realizm sifatida inkor etadi. Haqiqiy borliqqa xayolot, fantaziya kuchini, ya'ni «yolgʻonni» qarshi qoʻyadi»¹.

Umuman olganda, Oskar Uayld qarashlari oʻta ziddiyatli edi. U ayrim maqolalarida estetizm va individualizm gʻoyalarini targʻib qilsa, boshqalarida Angliyadagi burjuaziya jamiyati-

ni keskin tanqid ostiga oladi. Ba'zi asarlarida, ayniqsa, ertaklarida shaklan va mazmunan estetizmdan uzoqlashganini kuzatish mumkin.

Aslida, ertak janri Uayld uchun qulay boʻlib, hayotiy muammolar haqida, yozuvchiga yot boʻlgan maishiy, naturalistik tafsilotlarga berilmasdan hikoya qilish mumkin edi. Uning ertaklari lirizm va mistika bilan sugʻorilgan. Uayld ertaklari loʻnda, chiroyli tuzilgan boʻlib, koʻpincha sentimental ohangda boʻlib, hikoyatga yaqin turadi.

Oskar Uayld oʻz ertaklarida burjua jamiyatining mazmunsiz va najotsiz hayotiga sira oʻxshamaydigan yorqin, turli ranglarda jilvalanib turuvchi yangi olamni tasvirladi. Ertaklarda yozuvchiga xos badiiy fantaziya, uslub bejirimligi namoyon boʻladi. Oskar Uayldning bu davrda yaratgan hikoyalari «Kentervil arvohlari « (1887), «Lord Arturning jinoyati» (1891) ham oʻziga xosligi bilan ajralib turadi.

O.Uayld ijodini tadqiq etgan olimlar (R.Ellman, Yu.Kovalev, A.Zverev) uning ertak janriga xos boʻlmagan asarlarida ham ertakona-mifologik obrazlar, motivlar, syujet va uslubning paydo boʻlishi ijodkor olamni moʻjizalarga boy, ertakka monand qabul qilgani bilan izohlaydilar.

Xulosa qilinadigan boʻlsa, adib estetik qarashlaridagi zid-diyatlar uning ijodidagi yagona roman – «Dorian Greyning portreti»da ham yaqqol namoyon boʻladi. Roman yozilishiga turtki boʻlgan voqea quyidagi: bir kuni yozuvchi musavvir doʻsti Bezil Uord (romanda Bezil Xolluord) ustaxonasida malla sochli, juda chiroyli yigitni koʻrib, mana shunday benazir goʻzallik bir kun kelib vaqt va ehtirosning domidan qochib qutula olmasligi haqidagi fikrini bildiradi. Bunga javoban musavvir suratni vaqt ta'siridan saqlash, asarning asl holidagi maftunkorligini saqlab qolish uchun portretni qayta

 $^{^1}$ Гиленсон Б.А. История зарубежной литературы конца XIX — начало XX века. — М.: Академия, 2008. — C.215.

va qayta yaratishga tayyor ekanini aytadi. Roman juda tez, ya'ni «bir nafasda» yozib tugallanadi. Unda yozuvchining shu vaqtga qadar yaratgan ertak, hikoya va esselaridagi gʻoyalar oʻz aksini topadi. Roman haqidagi munozaralarni oldindan bilganday asar muqaddimasida: «There is no such thing as a moral or immoral book. Books are well written, or badly written. That's all»¹ (Axloqiy yoki axloqsiz kitob boʻlmaydi. Faqat yaxshi yoki yomon yozilgan kitoblargina boʻladi xolos), deydi muallif.

Oskar Uayld ijodiy-estetik olamining shakllanishida san'at nazariyotchilari Jon Ryoskin, Uolter Peyterning qarashlari muhim rol oʻynagan boʻlib, «Dorian Greyning portreti» romani muallif tomonidan ishlab chiqilgan estetizm nazariyasining badiiy in'ikosi sifatida paydo boʻlgan. Omon Muxtorning 90-yillarda yaratilgan «Ming bir qiyofa», «Koʻzgu oldidagi odam», «Ayollar mamlakati va saltanati», «Ffu», «Aflotun» singari romanlari shakl va mazmun jihatdan ana shu davr adabiy jarayonida yangilik boʻlib, ularda xalq afsona va ertaklarining motivlari, sharq falsafasi va adabiyoti, xususan, Alisher Navoiy ijodiy merosi bilan birga, Gʻarb modern adabiyotiga xos ruhiy olam manzaralari tasviri uygʻunlashib ketgan.

Xullas, Oskar Uayldning «Dorian Greyning portreti» va Omon Muxtorning «Koʻzgu oldidagi odam» romanlari yaqin bir asrlik vaqt oraligʻida, turli ijtimoiy-siyosiy jamiyatda yaratilgan boʻlishiga qaramay, ularni inson tabiatidagi ezgulik va yovuzlik oʻrtasidagi kurash, ruh erkinligi va qulligi mavzusi hamda asarlarning gʻoyaviy mazmunida muhim ahamiyatga ega boʻlgan ramziy obrazlar birlashtirib turadi. Asarlardagi gʻoyalar mushtarakligi Valijon va Dorian obraz-

¹ Wilde Oscar. The Picture of Dorian Gray // www.planetebook.com

lari orqali insonning komillik yoʻlidagi intilishlari tasvirida namoyon boʻladi.

Ilm-fan yuksak darajada rivojlangan va axborot texnologiyalari tezkor sur'atlarda taraqqiy etayotgan hozirgi davrda ham badiiy adabiyotning inson hayotidagi oʻrni yetakchi boʻlib qolmoqda.

Bu oʻrinda turli qamrovdagi adabiyotlararo aloqalarni oʻrganish, ularga obyektiv baho berish, mushtarak va farqli jihatlarni aniqlash muhim ilmiy-amaliy ahamiyat kasb etadi.

Alisher Navoiy va Vilyam Shekspir ijodida badiiy tamoyillar mushtarakligi va oʻziga xoslik¹

Badiiy soʻz ustalari Navoiy va Shekspir merosida tipologik oʻxshashliklarning ahamiyatga molik tomonlarini koʻrsatishga urinar ekanmiz, ular dunyoqarashida muhim oʻrin tutgan mavzulardan biri muhabbat muammosiga e'tiborimizni qaratamiz.

Alisher Navoiy asarini («Layli va Majnun») Shekspirning («Romeo va Julyeta») asari bilan qiyoslash uning XVII asrdanoq jahonshumul va ilmiy oʻrganilgan badiiy ijodini jahon adabiyoti kontekstida oʻrganish yoʻlida bir urinish desak, xato boʻlmaydi. Ikkala san'atkor ishq mavzusidagi yuksak badiiy asarni yaratar ekan, fojiali sevgi tarixini syujetga asosiy manba qilib olishdi.

Oʻz navbatida, «Romeo va Juletta»ning sevgi tarixi ham xuddi shuningdek, italiyalik novellanavislar tomonidan bir necha marotaba qayta ishlangan Mateo Bandello novellasi

¹ Маматқулова Х.А. Алишер Навоий ва Вильям Шекспир ижодида баддий тамойиллар муштараклиги ва ўзига хослик («Лайли ва Мажнун» достони ҳамда «Ромео ва Жульетта» трагедияси мисолида). Филол. фан. номз... дисс. – Тошкент, 2009. – Б.24 – 49.

(1554) bu muhabbat tarixini butun Yevropaga mashhur qildi. Bu tarixni fransuz tilida Per Buato yaratdi (1559). Fransuz tilidan ingliz tiliga Vilyam Peytner tarjima qilib, nashr qildirdi. Ingliz shoiri Artur Bruk «Romeus va Julyetaning fojiali tarixi» nomli poema yaratdi.

Sharq mutafakkiri «Alloh qudratining nishonasi» boʻlmish buyuk tuygʻuga «Mahbub ul-qulub» asarida mukammal ta'rif beradi¹. «Layli va Majnun» dostonida ham ishq masalasiga doir nazariy mulohazalar bayoniga bagʻishlangan baytlarni keltiradi:

Ey ishq, gʻarib kimiyosen, Bal oyinayi jahonnamosen. Ham zotingga darj kimiyoliq, Ham oyinayi jahonnamoliq².

Allomaning ta'kidlashicha, ishq ham «kimiyo», «ham oyinayi jahonnamodir». Ishq insonga yaqinlashsa, gavdasining loyi tuproqdan oʻzga narsa boʻlmagan insonning yuzini, tanini oltinga aylantiradi, bu bilan ham kifoyalanmay uni oʻtda kuydirib, tamoman eritadi. Bu kuyish natijasida uning vujudi va ruhi oltindek pok boʻladi, ya'ni kimyolanish jarayonida uning vujudi oʻzidagi qusurlardan qutulib va fazilatlar kasb etib, kamolotga erishadi.

Shekspir asarida ham ishq mavzusi koʻp qirrali yoritiladi. Shoir personajlari bu haqda turli sharoitlarda turlicha fikr yuritadilar. Shekspirda sevgi haqida birinchi xizmatkorlar gapirishadi, ular uchun sevgi – qizlar bilan koʻngilxushlik; enaganing

ham Julyettaning yoshligida yiqilganini eslab aytgan gaplari va fikrlari ularnikidan qolishmaydi. Asarda Benvolio va Merkutsio ishq haqida istehzoli soʻzlashar ekan, koʻngilochar hissiyotlar haqida xizmatkorlarning qoʻpol va sodda gaplaridan farqli ravishda yosh aslzodalar bunday hissiyotlardan nafratlanishadi va Romeoning oshiqligini masxara qilib kulishadi.

Gʻarb mutafakkiri Shekspir oksyumoronlardan unumli foydalanib ishq tavsifining nihoyatda yorqin namunalarini yaratadi: a brawling love – savdoyi junun; a loving hate – suyukli nafrat; a heavy lieghtness – qoʻrgʻoshin pat; a cold fire – sovuq alanga; a sick health – sogʻlom bemor. Mutafakkir shoir ishqning ta'rifida davom etar ekan, poetik mahorat bilan uning sitamkorligini, oʻtday kuydirishini, bu oʻt oshiqni koʻz yoshdan jamgʻarilgan **dengizga gʻarq etishini** bayon etadi.

Sharq va Gʻarbda ishq konsepsiyasiga boʻlgan munosabatlar yaqinligini va muhabbat muammosining badiiy yechimidagi gʻoyaviy oʻxshashlikni V.M.Jirmunskiy ham e'tirof etadi: «Dunyoviy muhabbat (ishqi majoziy) konsepsiyasi Haqqa boʻlgan muhabbatning majozi sifatida tasavvuf an'analari bilan bogʻliq»¹. Tasavvufning mumtoz sharq she'riyatiga, xususan «Layli va Majnun» asosidagi muhabbat konsepsiyasiga ta'siri qanchalik katta boʻlgani fanga ma'lum.

Dostonda ham, tragediyada ham qahramonlar fojiasini tasvirlash orqali nohaqlik va adolatsizlik qoralanadi. «Ziddiyat qahramonlarning hissiyotlari asosida tugʻilmaydi... Fojia adovat va dushmanlik dunyosi bilan qahramonlarning ajoyib tuygʻusi toʻqnashuvidan yuzaga keladi»². Ikkala asarda ham qahramonlar xatti-harakatlarini yoʻnaltiruvchi 5 ta asosiy lavha mavjud:

¹ Қаранг: Алишер Навоий. Махбуб ул-қулуб. – Тошкент, 1983. – Б.49.

 $^{^2}$ Алишер Навоий. Мукаммал асарлар тўплами. XX томлик. – Тошкент: Фан, 1992. IX том. – 5.293.

¹ Жирмунский В.М. Сравнительное литературоведение. – Л.: Наука, 1979. – С.182.

² Аникст А. Творчество Шекспира. – М.: Наука, 1963. – С.228.

- 1. Ilk uchrashuv.
- 2. Dil izhori.
- 3. Ayriliq.
- 4. Istamagan kishi bilan nikohga majburlash.
- 5. Xotima.

Navoiy dostonida ham, Shekspir tragediyasida ham muhabbat an'anaviy munosabatlar me'yorini buzadi. Birinchi holatda ijtimoiy tengsizlik, Laylining otasi «devona» Qaysga qizini berishdan or qiladi¹. Ikkinchi holatda azaliy oilaviy nizo toʻsiq boʻladi. «Romeo va Julyetta»da qahramonlar yashirincha nikoh oʻqitishadi. Bu haqda ota-onalarini ogohlantirishmaydi. Ularning roziligini olish ilojsizligini anglab, bu haqda ogʻiz ochmaydilar. «Layli va Majnun»da faqat Majnun ota-onasining istagiga qarshi chiqa oladi, Layli esa ota-onasiga boʻysunadi. Ikkala ijodkor ham qahramonlarining oʻziga xosligiga urgʻu berishadi.

Ikkala asarda ham sevishganlar halok boʻladilar. Majoziy ishq vujudni yoʻq qilib yuboradi. Romeoning oʻlimi Julyettaning, Laylining oʻlimi (jisman) Majnunning jisman oʻlimiga olib keladi. Laylining onasiga qilgan vasiyatiga koʻra har ikkalasini bir kafanga oʻraydilar va bir qabrga qoʻyadilar. Har ikki sevishgan yor shu yoʻsinda bir-birlariga abadiy qovushdilar:

Kirdi ikki jism bir kafangʻa, Yoʻq, yoʻq, ikki ruh bir badanga Donadek oʻlub iki badan bir, Dona qobugʻi kibi kafan bir Yoshurdi chu oy-u kun yuzin abr, Chun goʻr bir erdi, boʻldi bir qabr (292-bet).

¹ Комилов Н. Тасаввуф. Биринчи китоб. – Тошкент: Ёзувчи, 1996. – Б.225.

Shunday qilib, yuqorida bayon qilingan fikrlar asosida quyidagi xulosalarga kelish mumkin:

Navoiy va Shekspir ilgari surgan gʻoyalar mushtarakligi sabablari adabiy aloqa va uslublar ta'siriga emas, balki asarlar yaratilgan davr muammolari, kayfiyati va ularni badiiy aks ettirishdagi yozuvchi iste'dodi, tafakkuri imkoniyatlariga borib taqaladi.

Navoiy va Shekspir gumanizmini harakatga keltiruvchi barcha tamoyillarini oʻz ijodiy, ilmiy, ijtimoiy faoliyatlarida bevosita ifoda ettirishga harakat qilganlar. Bu ularning davlat boshligʻi, milliy til mavqeini koʻtarish va taraqqiyotiga asos solish, shaxs erki va insoniy muhabbat xususidagi mushtarak qarashlarida yaqqol namoyon boʻladi.

Alisher Navoiy «Layli va Majnun» dostonini Shekspirning «Romeo va Julyetta» tragediyasi bilan qiyoslash ikki buyuk ijodkorning ishq konsepsiyasiga munosabatlarining gʻoyaviy yaqinligini koʻrsatdi. Ikki mutafakkir nuqtayi nazarida komillikning muhtasham poydevori ham, oliy choʻqqisi va soʻnmas nur manbayi ham ishqdir.

Gʻarb uygʻonish davri mutafakkiri inson e'tiborini uning oʻz goʻzalligiga, jismoniy va botiniy barkamolligiga (yuksak fazilatlar egasi sifatida) qaratgan boʻlib, ana shu barkamollikni badiiy adabiyotda ifoda etishga intilgan. Uning fikricha, goʻzal inson, albatta, goʻzal dunyoviy hayot sohibi boʻlmogʻi lozim.

Sharq uygʻonish davri mutafakkiri esa butun e'tiborini insonning ruhiy kamoloti masalasiga qaratgan. Uning uchun goʻzal dunyoviy hayot pirovard maqsad emas, balki boqiy ruhiy yuksaklikka erishish uchun bir imtihon vositasi, xolos. Alisher Navoiy va Shekspirning biz tahlil etayotgan asarlari zamirida ana shu gʻoya va oʻzaro tafovut yotadi. Ammo shunga qaramay, ikkala shoir ham real dunyo goʻzalliklari orasida ishqni goʻzallikning bosh manbayi deb qaraydilar. Qahramon-

lar dunyodagi eng qudratli ma'naviy kuch deb muhabbatni bilishadi. Uning ilohiy qudratiga tayanib yashaydilar. Shu ishonch ularni inson sifatida tengsiz yuksakliklarga - hayot, davr, olam va odam mohiyatining tub ildizlarini belgilaydigan gʻoyaviy kengliklarga olib chiqadi.

«Boqchasaroy fontani» poemasi va Mirtemir ijodi ¹

«Boqchasaroy fontani» poemasi A.S.Pushkinga katta shuhrat keltirgani ma'lum. Aslida bu asar, V.M.Jirmunskiyning yozishicha, J.Bayronning «Korsar» poemasi ta'sirida yozilgan². Oʻzbek adabiyotida mazkur asarning ijodiy ta'siri Mirtemirning «Suv qizi» poemasining yaratilishiga asos boʻlgan.

«Boqchasaroy fontani» poemasining «Tatar qoʻshigʻi» qismida tutqun qiz Maryamning taqdiri hikoya qilinadi. Bu gʻamli hikoya asarga epik mazmun baxsh etgan. Natijada qahramonlarning tuygʻu-kechinmalari, oʻy-fikrlari yaxlit syujetni vujudga keltirgan. Shu jihatlar inobatga olinsa, Pushkin va Mirtemir poemalaridagi mushtarakliklar quyidagilarda koʻzga tashlanadi:

1. Har ikki poema ham **ertak ruhida** yaratilgan. «Boqchasaroy fontani»da ertakka xos an'anaviy boshlanma yoʻq. «Suv qizi»da esa bunday boshlanma («Qadim chogʻda, dengiz boʻyida... Hayot koʻrgan ekan bitta chol») mavjud. Biroq ikkala poemadagi obrazlar xam ertakmonand. Binobarin, Pushkin poemasida podsho Taroy, Zarema, Maryam, Maryamning otasi, ogʻa; Mirtemirda sulton, chol, uning qizi Orzi, qaroqchi Alibobo qiyofalarida namoyon boʻlgan. Bu esa ruhiy-ma'naviy jihatdan oʻxshash obrazlarni yuzaga keltirgan.

2. Har ikkala poemada ham **mehribon otalar va qizlar obrazi** yaratilgan. *«Boqchasaroy fontani»da Maryam tasviri*:

Uning yumshoq sevimli nozi, Tabiati, laziz ovozi. Yonib turgan moviy koʻzlari. Dona-dona shirin soʻzlari Bir-biridan jozibadordi; Hammasida ajib kuch bordi¹.

«Suv qizi»da Orzi tasviri:

Boʻlar ekan cholning bir qizi, Shamshod uning boʻyiga xushtor. Labi pista, yuzi qirmizi, Dastor olma kabi zab naqshdor. Sochlariga ilhaq majnuntol. Qoʻshigʻiga bulbullar xumor. Koʻzi shahlo va tillari bol²

E'tibor berilsa, qahramonlar portretidagi oʻziga xoslik milliylik bilan aloqador. Pushkin oʻz qahramonini moviy koʻzli, Mirtemir esa shahlo koʻz tarzida ifoda etadi. Ulardagi ruhiy-ma'naviy yaqinlik nafaqat tashqi koʻrinishi, balki iste'dodi orqali ham namoyon boʻladi. Chunki Maryam ham, Orzi ham qoʻshiq kuylaydi. Mirtemir Sharq mumtoz adabiyoti mavjud an'anaviy oʻxshatishlarni (boʻyning shamshodga qiyoslanishi, labning pistaga, yuzning qirmizi olmaga oʻxshatilishi kabi) mohirona qoʻllaydi.

¹ Қувватова Д. «Боқчасарой фонтани» поэмаси ва Миртемир ижоди.

² Жирмунский В.М. Байрон и Пушкин. – Л.: Наука, 1978. – С.116.

¹ Пушкин А.С. Танланган асарлар. – Тошкент: Адабиёт ва санъат, 1999. – Б.171.

 $^{^2}$ Миртемир. Асарлар. Уч томлик. Иккинчи том. – Тошкент: Адабиёт ва санъат, 1971. – 5.385.

«Boqchasaroy fontani» da:

Amaldorlar, boylar izma-iz Orqasidan izlab yurardi. Yigit-yalang «Oh...» deb oʻyida, Azob chekar edi koʻyida.

«Suv qizi»da:

Koʻrgan koʻzning quvonchi ekan, Koʻrgan yigit qolmas sevgisiz...

Bu bilan qizlarning nihoyatda goʻzalligi ifoda etilmoqda.

3. Syujetlararo oʻxshashlik. Maryam tatarlarning Polshaga hujumi vaqtida podsho haramiga keltirilgan. Orzini esa qaroqchi Alibobo chashma boʻyidan oʻgʻirlab saroyga olib kelgan. Ayni zamonda tutqun qizlarning haramdagi hayoti tasvirida mutanosibliklar bor. Koʻrinadiki, har ikki shoir ham ayollar erksizligi mavzusini hayotiy lavhalarda yoritgan. Bu, oʻz navbatida, ezgulik va yovuzlik, yaxshilik va yomonlik kurashini ham oʻzida ifoda etadi. Garov va sulton yovuzlik timsoli, Maryam bilan Orzi erksizlik qurboni sifatida koʻzga tashlanadi. Har ikkala poema ham qaygʻuli yakun topadi. Ya'ni Maryam «tarki umr» etadi. Orzi esa haramda farzandli boʻladi va qizi bilan oʻzini daryoga tashlaydi.

4.Epik makon mushtarakligi. Har ikki asarda ham asosiy voqealar podsho harami, Dunay sohillari, Qora dengiz boʻylarida boʻlib oʻtadi.

Koʻrinadiki, Mirtemir Pushkinning «Boqchasaroy fontani» poemasidan ijodiy ta'sirlangan. Uning oʻziga xosligi mavzuni milliy ranglarda ifoda etganida koʻrinadi. Bu adabiyotimizda jahon poemachiligi badiiy-estetik tajribalari turli shakllarda namoyon boʻlayotganini bildiradi.

She'riy talqinda ekvivalent va adekvat yondashuv

(«Na'matak» she'rining ruscha tarjimalari misolida)¹

She'riy tarjimada asliyatning poetik parametrlari hisoblangan shakl (qofiya, vazn, turoq, hijolar soni, ohangdorlik, musiqiylik) va mazmunga (timsoliylik, leksik resurslar va stilistik figuralar) adekvat yoki ekvivalentlik darajasida yaqinlasha olish muallif fikr va tuygʻusining, maqsad va gʻoyasining qayta in'ikos etishini ta'minlaydi.

Asliyat matnida mujassamlangan poetik unsurlarning barchasini birdek saqlab, tarjimaning *muqobil* – ekvivalentli yoki *aynan* – adekvatli tarjimasini yaratish, ayniqsa, she'riy tarjimada oʻta murakkab jarayondir. Bunday murakkablik asliyat matnidagi she'riy san'atlar, ekspressiv unsurlar kabi funksional birliklarning oʻzga til doirasida aynan muqobillik darajasida tenglasha olmasligida koʻrinadi. Adabiyotshunos Sh.Sirojiddinov monografiyasida shunday ta'rif beradi: «Tarjima vazifalaridan biri – tarjima matni asliyatning toʻliq kommunikativ oʻrnini egallashi va asliyat oʻquvchisi imkoniyatiga teng darajadagi badiiy zavq mazmuniy va mundarijaviy (strukturaviy) uygʻun muvozanatni (muvofiqlik) tarjima oʻquvchisiga taqdim etilishidir»².

She'riyat tarjimasida bunday murakkabliklardan chiqish maqsadida asliyatning deformatsiyalanishiga (yoʻqotishlar, qoʻshishlar, oʻzgartirishlar va h.) hamda definitsiyalanish (funksional birliklarning nomutanosibligi)ga yoʻl qoʻyiladi, ya'ni she'riy tarjima oʻzida yuqorida sanab oʻtilgan ka-

¹ Салимова Д. Шеърий таржимада муаллиф бадиий нияти ва поэтик махоратининг қайта ифодаланиши (Ғафур Ғулом ва Ойбек шеърларининг таржималари мисолида). Филол. фан. номз... дисс. – Тошкент, 2018.

 $^{^2}$ Сирожиддинов Ш., Одилова Г. Бадиий таржима асослари. – Тошкент: Мумтоз сўз, 2011. – Б.16.

tegoriyalardan birortasining oʻzgartirilishiga ehtiyoj sezadi. Shularni inobatga olib, tarjimon poetik shakl va mazmunni qayta yaratish maqsadida erkin yondashuv yoʻlidan borishi mumkin. Bu holat tarjima nazariyasida erkin ijodga imkon beradi va oʻz oʻrnida bunday imkoniyat me'yorlariga amal qilish talab etiladi. Tarjima matnida mutarjim tomonidan poetik mazmun va shaklni qayta yaratish uchun erkin yondashuv yoʻli tanlanar ekan, asliyatning ekvivalent va adekvat tarjimasining amalga oshirilishi tarjimonning ikkilanishiga olib keladi, ya'ni tarjimon she'r tarjimasini qayta yaratib boʻlmagan sharoitda oʻzgartirishlar va yoʻqotishlarsiz ekvivalentlik va adekvatlik oʻz samarasini bera oladimi, degan savollar tugʻilishi tabiiy. Holbuki, adekvatlik, adekvat asliyat bilan tarjimaning bir-biriga teng boʻlgan «aynan» natijasidir.

Adekvat tarjimada asliyat matnining tarjima matnga tenglashishi mazmunan, estetik va funksional jihatdan oʻzgarishlarsiz, qayta yaratilgan va maksimal tarzda tarjima qilingan boʻladi. Adekvatlik tushunchasi asliyat bilan tarjima oʻrtasiga tenglik ishorasining qoʻyilish natijasidir, ya'ni tarjimada ikki matn bir-biri bilan shaklan, mazmunan va soʻzma-soʻz yaqinlikni hosil qilib, matnning pragmatik, uslubiy jihatdan aynan koʻrinishiga ega boʻladi. Bunday tarjimada ayrim erkinliklarga - qoʻshishlar va yoʻqotishlarga yoʻl qoʻyilmasligi uning asosiy shartlardan biridir. Tarjimashunos, lingvist, va adabiyotshunos olimlar ekvivalent va adekvat tarjima tushunchalarining bir necha konsepsiyalarini ishlab chiqqan boʻlishlariga qaramay, tarjima nazariyasining bu muhim ikki kategoriyalari hanuz ilmiy munozaralar doirasida qolmoqda. Taniqli rus tilshunosi, professor Lev Nelyubin ekvivalentlik va adekvatlik atamalarini oʻzi tuzgan «Tarjimashunoslik atamalarining izohli lugʻati»ga kiritarkan, olimlar tomonidan ishlangan konsepsiyalardan asosiy fikrlarni uygʻunlashtirib, adekvat va ekvivalent tushunchalarining umumiy ta'rifini bir necha variantdagi izohlarda keltiradi. Ushbu ta'riflardan birida «adekvatlik oʻz mohiyatiga koʻra, uch komponentga ega» deb koʻrsatadi: 1) asliyat mazmunini tarjimada toʻgʻri, aniq, toʻkis shakllantirish; 2) asliyat til birliklarining toʻgʻri yetkazilishi; 3) tarjima qilinayotgan tilda dastlabki matn (asliyat) tilining mufassal qayta yaratilishi»¹dan iboratdir. Professor L.Nelyubin ta'kidlaganidek, ekvivalentlik – tarjima va asliyat mazmunining maksimal darajadagi muvofiqligi, tengligi, oʻzaro monandligidir. Bizningcha, ekvivalent tarjima asliyat mazmunining ekvivalentlik turlaridan birida qayta yaratilishidir. Koʻrinib turibdiki, L.Nelyubin ta'riflagan adekvatlik mohiyati ekvivalentlik mohiyati bilan umumiy ma'noda uyg'unlashib ketadi, ya'ni «asliyat mazmunining toʻgʻri, aniq, toʻkis yetkazilishi» ekvivalentlikning «asliyat mazmunining tarjimaga maksimal darajadagi muvofiqligi»ni talab etadi. Tarjimashunoslik manbalarida ekvivalentlik darajalari, turlari xususida olimlarning turlicha izoh va tavsiflari beriladi. Adabiyotshunos olim Sh. Sirojiddinov adekvatlik va ekvivalentlikni tarjima vazifalaridan biri sifatida baholaydi: «Tarjima matni asliyatning toʻliq, kommunikativ oʻrnini egallashi va asliyat oʻquvchisining imkoniyatiga teng darajadagi badiiy zavq, mazmuniy va mundarijaviy (strukturaviy) uygʻun muvozanatni (muvofiqliklar) tarjima oʻquvchisiga taqdim etishdir».²

Mutaxassislar qisman, toʻliq, mutlaq va nisbiy ekvivalentlik kabi turlarni farqlaydilar. Chunonchi, professor Ya.Ret-

¹ Нелюбин Л. Толковый словарь по переводоведению. Третье издание, переработанное. – М.: Флинта, Наука; 2003. – С.13, 253.

 $^{^2}$ Сирожиддинов Ш., Одилова Г. Бадиий таржима асослари. – Тошкент: Мумтоз сўз, 2011. – Б.16.

sker «Tarjima nazariyasi va tarjima amaliyoti» («Теория перевода и переводческая практика») darsligida «qisman va toʻliq» yoki «nisbiy va mutlaq» («частичный и полный», «относительный и абсолютный») ekvivalent turlari toʻgʻrisida ma'lumot berarkan, mutlaq va to'liq ekvivalentlikni quyidagicha izohlaydi: «Toʻliq ekvivalentlik – soʻzning ma'nosiga tarjimada toʻliq mos tushuvchi soʻzni qoʻllashdir.» («Полными эквивалентами являются так, как охватывают полностью значение всего слова, а не одного из его значений».)¹ Ya.Retsker nazariyasida L.Nelyubin ta'riflagan asliyat mazmuniga maksimal darajadagi muvofiqlik aynan mutlaq ekvivalentlik shartlari bilan mos keladi. Xuddi shuningdek, adekvatlikda «asliyat til birliklarining toʻgʻri yetkazilishi»ni talab etadigan shartlari qisman yoki nisbiy ekvivalentlik me'yorlari bilan tenglasha oladi. Chunki ekvivalentlikning qisman yoki nisbiy kategoriyalari asliyatning qaysidir atributlarini (belgilarini), unsurlarini muqobillik darajasida tarjimaga yaqinlashtira olsa, mutlaq va toʻliq ekvivalentlik, aksincha, asliyatning jami – janriy, vazniy, mazmuniy, ma'noviy va shakliy unsurlariga teng qiymatda muqobillasha olishi kerak.

Ushbu taxminlardan kelib chiqib aytish mumkinki, she'riy tarjimada ijodiy erkinlik faqat nisbiy va qisman ekvivalentlikda qoʻl keladi. Ikki til sistemasi va ikki ijtimoiy-madaniy hayotning turli ekanligi bois, she'r vazni, shakli, ohangdorligi, milliyligi, davr koloriti kabi nazmiy belgilarning barchasini birdek saqlab qolish ma'lum tafovutlar tufayli adekvat – «aynan» va mutlaq ekvivalentlik tarjimani aks ettirmasligi tabiiy. Bunday vaziyatda har qanday she'riy tarjima tartib-qoidalarining qat'iy belgilanmaganini nazarda tutib, tarjimon

asliyatning qaysidir jihatlarini oʻzgartirishga majbur. Aksariyat holatlarda she'r shakli saqlanadi, biroq ma'lum miqdorda mazmun oʻzgartiriladi yoki aksincha, asliyat mazmuniy xususiyatlari toʻliq ekvivalentlikka ega boʻlib, shakliy unsurlarni qayta yaratishda ijodiy erkinlikka yondashiladi. Chunonchi, XX asr oʻzbek she'riyatining taniqli tarjimoni, shoir Aleksandr Naumov ijodida vazniy transformatsiyaning asliyatdan farqlanishini, shoira-tarjimon Yuliya Neymanning tarjimonlik talqinlarida esa shaklga sodiq qolish maqsadida mazmunni oʻzgartirish holatlari kuzatiladi. Buning sababi, bizningcha, poetiklik tabiatiga xos boʻlgan xususiyatlar – vazn, qofiya, hijo, turoq, ohanglarning dominantlik (ustuvorlik) mavqeida turgani uchun mutariim asosiv e'tiborni aslivat shaklini saqlab qolishga intilishidandir. Masalan, Oybekning «Lolalar» va «Doʻstim, oʻy oʻyla» she'rlarining ruscha tarjimalarini misol keltirish mumkin:

> Qirlarda lolalar goʻyoki mash'al, Kutamen har bahor sizni, lolalar! Koʻzlar izingizda har bahor, har gal, Yodingiz koʻngilda, tinmas nolalar...¹

A.Naumov tarjimasi:

Опять весна в холмы упала, И землю в зелень облекли, И вы мигнули мне, тюльпаны Как маленькие маяки².

¹ Рецкер Я. Теория перевода и переводческая практика. Очерки лингвистической теории перевода (Наше наследие). – М.: Валент, 2007. – С.15.

¹Ойбек. Мукаммал асарлар тўплами. ІІ том. Шеърлар. – Тошкент: Фан, 1975. – Б.274.

² Гафур Гулям. Айбек. Стихотворения. Переводы с узбекского. – М.: Детская литература, 1983. – С.158.

Oybek:

Doʻstim, oʻy oʻyla, erinma, his qil, Xayollar dengizi misli xazina. Haqiqat duriga toʻladir chin dil, Ijod et, chekinma, ixtiro izla.¹

Yu.Neyman tarjimasi:

Ни чувствовать, ни думать не ленись, Пускай, безбрежен океан познанья, Прилежно изучай и даль и близ. Не в познаванье ль наше воздаянье?..²

Berilgan misollardan anglash mumkinki, she'r tarjimasiga adekvatlikdan koʻra asosan ekvivalentlikning toʻliq turi mos kelmoqda. Chunki «qisman yoki toʻliq», «nisbiy yoki mutlaq» (Ya.Retsker), ayrim hollarda «formal yoki dinamik» (Yu. Nayda) kabi ekvivalentlik turlaridan birida yondashish aynan she'r tarjimasiga xosdir.

Biz yuqorida adekvatlik mohiyati ekvivalentlik mohiyati bilan umumiy ma'noda uygʻunlashib ketadi, deb ta'kidlagan edik. Nazarimizda, shu sababli ayrim tarjimashunos muta-xassislar ekvivalentlik va adekvatlikni ikki mustaqil atama sifatida izohlasalar, (A.Shveyser, Ya.Retsker, N.Garbovskiy) yana bir guruh tarjimashunoslar ekvivalentlik va adekvatlikni bir-biridan jiddiy farq qilmaydigan bir-biriga sinonim atamalar sifatida qabul qiladilar (V.Vinogradov, J.Ketford, L.S.Barxudarov, I.Alekseyeva, R.Levitskiy). Jumladan, rus tilshunos olimi V.Vinogradov *ekvivalentlikni* – teng baholi, *adekvatlikni* – *birxillik*, ya'ni toʻliq muvofiqlik ma'nolarida qoʻllagani va bular

bir-biri bilan muayyan darajada farqlanmagani sababli ekvivalentlik bilan adekvatlik atamalarini bir kategoriyaga mansub boʻlgan ikki nomdagi tushuncha deb qabul qiladi. Olim badiiy asarga, xususan, she'riy tarjimaga adekvat yondashuvda imkon qadar asliyatni tarjima bilan yaqinlashtirishni ma'qul deb hisoblaydi. Shu bilan birga V.Vinogradovning fikricha, she'riy tarjima asliyatning mukammal identifikatsiyasi darajasida baholana olmaydi, chunki she'riy asarda vertikal kontekst turlari boʻlgan – allyuziya, realiya, ramzlar ekvivalentlik tarjima saviyasini tushiradi. Shu bois adekvatlik va ekvivalentlikka nisbiy hodisa sifatida qarab, bunday nisbiylikning bir necha darajalarini koʻrsatib beradi¹.

Davr ijtimoiy-siyosiy sharoitlarining rivojlanib, oʻzgarib turishi tarjimashunoslik ilmida ham yangicha qarashlarning paydo boʻlishiga ta'sir etmay qolmadi. Amerikalik olim Yudjin Nayda² formal va dinamik ekvivalentlik konsepsiyasida dinamik ekvivalentlikning shartlarini asliyat bilan tarjima matnlarini chogʻishtirish yoʻli bilan aniqlamasdan, balki asliyatni ona tilida qabul qiluvchining reaksiyasini xuddi shu matnning tarjima tilida qabul qiluvchining reaksiyasi bilan chogʻishtirish orqali aniqlamoq kerak, degan fikrni oʻrtaga tashlaydi. Uning fikricha, agar ushbu reaksiyalar intellektual (zakiy) va emotsional (ruhiy) planda bir-biriga mos tushsa, demak, tarjima ekvivalentligi yuzaga keladi. Lingvistika tomonidan qaralgan bu nuqtayi nazarda ekvivalentlikning umumiy qoidasi keltirilsa-da, oʻz oʻrnida ushbu qoida adekvatlikka ham taalluqli ekanidan dalolat beradi. Olimning ta'kidlashicha, badiiy asar spetsifikasiga

¹ Ойбек. Мукаммал асарлар тўплами. II том. Шеърлар. – Тошкент: Фан, 1975. – Б.300.

² Айбек. Мой голос. Собрание сочинений. Том пятый. Стихотворения и поэмы. – Тошкент: Литература и искусство, 1987. – С.94.

¹ Виноградов В. Введение в переводоведение (общие и лексические вопросы). — М.: Издательство института общего и среднего образования РАО, 2001. — С.53.

² Найда Ю. К. Науке переводить // Вопросы теории перевода в зарубежной лингвистике. — М., 1983. — С.114.

xos boʻlgan soʻz oʻyinlari, idiomatik birliklar adekvatlikka mutlaqo boʻysunmaydi. Ya.Retsker monografiyasida ta'kidlanganidek, «adekvatlik kriteriyasida asliyatda mavjud vositalarning tengligi aynan tarjima natijasini bermagan holatda voqelikning ma'lum bir qismigagina muvofiq uchrashi bilan asliyatning maksimal darajadagi yaqinligini ta'minlashi nazarda tutiladi. Yuqori saviyada mahorat darajasida qilingan tarjima tahlili uning tenglik darajasini koʻrsatadi¹.

Tarjimaga doir fikrlarni hamisha mutlaqlashtirib boʻlmaydi, chunki har qanday tarjima asarining tahlil natijasi oʻlaroq fikrlar oʻzgarishi sodir boʻlishi mumkin. Tarjima tanqidi filologiyaning boshqa sohalaridan shu jihati bilan ham farq qiladi. Fikrimiz dalili sifatida N.Tixonovning tarjimonlik faoliyatida, xususan, Oybekning «Chimyon daftari» turkumiga mansub «Na'matak», «Xayr, Chimyon!» she'rlari tarjimasida uchraydigan adekvat va toʻliq ekvivalentli yondashuvning funksional koʻrinishlarini misol keltirish mumkin. Realistik tarjima an'analari 50-yillardan boshlangan boʻlsa-da, ayrim she'rlarning oʻttizinchi yillardanoq adekvat tarjimalari mavjud edi. «Birinchi qor», «Xayr, Chimyon!», «Yor koʻzlarining...», «Na'matak» kabi she'rlarni misol keltirish mumkin.

«Na'matak» badiiy latofati ufurib turgan betakror lirik she'r namunalaridan biri sifatida XX asr oʻzbek she'riyatida oʻrniga ega. Ushbu she'rning gʻoyaviy maqsadida goʻzallikning ezgulik yaratishga qodir ekanini anglatuvchi badiiy niyat mujassam. Shoir badiiy niyatini mujassamlantirishga xizmat qiluvchi tasviriy-ifodaviy vositalar, soʻz oʻyinlari uning rus tilidagi tarjimasida ham nafaqat fikr bilan fikrning, jumla bilan jumlaning va shakl bilan shaklning, shuningdek, qofiya tartibi, she'r

ohangdorligida ham Oybekni aynan takrorlaydi. Agar nisbiy ekvivalentlik matn shakli yoki mazmunini «aynan»lashtirish maqsadida ish koʻradigan boʻlsa, unda matnga dinamik yoki formal yaqinlashish talab etiladi. Adekvatlikda va toʻliq ekvivalentlikda har ikkisi ham asliyat bilan «aynan»lashtiriladi. N.Tixonov «Na'matak» she'ri tarjimasida formal, ham dinamik koʻrinishda ana shu aynanlikni qayta tiklay olgan. Tarjimon ijodida formalizm shakli asliyatning grammatik va uslub xususiyatlari qandaydir nusxa olish bilan emas, balki muallif tili va uslub xususiyatlarini oʻzbek tilining tabiati va tabiiy imkoniyatlari darajasida aks ettira olganlik mahoratidan kelib chiqadi:

Nafis chayqaladi bir tup na'matak, Yuksakda, shamolning belanchagida, Quyoshga koʻtarib bir savat oq gul! Viqor-la oʻshshaygan qoya labida – Nafis chayqaladi bir tup na'matak... ¹

Чудно качается куст Наъматака Там, наверху в ветровой колыбели, Солнцу – корзина цветов белоснежных. Гордо над краем утесистой щели Чудно качается куст Наъматака...²

N.Tixonov va Oybek shoir, yozuvchi, tarjimon, adabiyotshunos boʻlib faoliyat yurgizishgan. Ular bir-biri bilan ijtimoiy-siyosiy hayotda hozirjavob publitsist, gʻoyaviy qarashlari oʻzaro monand ham edi. Bir adabiy, siyosiy muhit-

¹ Рецкер Я. Теория перевода и переводческая практика. Очерки лингвистической теории перевода (Наше наследие). – М.: Валент, 2007. – С.16.

¹ Ойбек. Танланган асарлар. Тўрт томлик. Биринчи том. Шеърлар, поэмалар. – Тошкент: Бадиий адабиёт, 1957. – Б.182.

 $^{^2}$ Гафур Гулям. Айбек, Хамид Алимджан. Стихотворения и поэмы. Большая серия. – Л., 1980. – С.285.

da ijod qilgan boʻlsalar-da, his-tuygʻularini she'riy satrlarga koʻchirishda har ikki ijodkor ham mohir ekanligi ma'lum. Oybekning oʻzi ham tarjimon boʻlgani bois, yaqin doʻsti N.Tixonovning «Na'matak» she'rini ruschaga o'girganidan, tarjima tilidan koʻngli toʻlgan va ijobiy baholagani haqida xotira yozgan. 1 Umuman, N. Tixonov tarjimonlik faoliyatida Oybekning «Xayr Chimyon!», «Ilk qor», «Yor koʻzlarining ishqini, xumorini vod et» kabi lirik she'rlari mukammal tarjimalar sifatida baholanishi mumkin. Ushbu she'r tarjimalari ekvivalentlik va adekvatlik talablariga toʻliq javob beradi. Shu bois, davrlar oʻtsa ham, ushbu she'rlarning yuqoridagi muqobil tarjimalari boshqa mutarjimlar tomonidan oʻgirilishga ehtiyoj sezmaydi. Chunonchi, «Yor koʻzlarining ishqini, xumorini yod et» she'rini tarjima bilan solishtirganimizda she'rning muallifi Oybek tarjimoni N.Tixonov, yoki aksincha, she'rni yozgan N.Tixonov, uni tarjima qilgan Oybekmi degan savol tugʻilishi tabiiy. Chunki she'r tarjimasi bilan favqulodda o'xshash holatda talqin etilishi Gʻ.Salomov ta'kidlaganidek, «moʻjiza»ga o'xshaydi:

Yor koʻzlarining ishqini, xumorini yod et!

Милой глаза, что влекут так безудержно,

(Ya'ni: Betinim jazb etgan yor koʻzlarining)

Koʻk gulshani durlar kabi porlaydi bu oqshom.

Неба вечерний цветник - словно жемчужина краса,

(Ya'ni: Koʻk gulshandir – goʻyo durlardek chiroyli)

Har togʻda va qirda yotar nozli bir orom,

На равнинах, в горах всё нежнее покой, всё укромней,

(Ya'ni: Qirlarda, togʻlarda nozli, xilvatli orom)

Dunyodagi koʻzlar aro shahlosini yod et1.

Среди глаза всего мира вспомни милой глаза².

(Ya'ni: Dunyodagi koʻzlar aro yor koʻzlarini yod et).

Koʻrinadiki, toʻliq muqobillik darajasi she'riy tarjimada oʻzini tamoman oqlaydi.

«Saddi Iskandariy» (Navoiy) va «Iskandarnoma» (Nizomiy) debochalari³

Mavzu va faslda qoʻyilgan ilmiy muammo nuqtayi nazaridan ikki doston debochalarini toʻla qiyoslash mumkin. Biroq badiiy mahorat va ijodiy individuallik hodisalarini aniqroq tasavvur etish uchun qiyoslanayotgan obyektlarda adekvatlik va tipologik jihatlarning boʻlishi koʻproq maqsadga muvofiq hisoblanadi. Har ikki dostonning dastlabki toʻrt bobi bu jihatdan toʻla talabga javob beradi, shu bois biz asosiy e'tiborni mazkur boblarga qaratamiz.

Nizomiy «Iskandarnoma»si debochasida kirish va asosiy bob yoki tasvir va bosh mavzu oʻrtasidagi uygʻunlik Navoiyda boʻlgani kabi kuchli emas. Nizomiy sarlavhalari qisqa va asosiy mazmunni ifodalashga qaratilgan, ularda qofiya, ritm va obrazlilik yoʻq. Navoiy esa katta mehnat va mahorat bilan kichik bir sarlavhani oʻsha bob mazmuniga ham, butun asardan koʻzlangan maqsad va mavzuga ham muvofiqlashtirishga intiladi.

Adabiy komparativistikaning muhim tarkibiy qismlaridan biri boʻlgan **tematologiya** nuqtayi nazaridan xamsanavislik

¹ Bu haqda qarang: Ойбек замондошлари хотирасида. – Тошкент: Адабиёт ва санъат, 1979. – Б.19.

¹ Ойбек. Танланган асарлар. Тўрт томлик. Биринчи том. Шеърлар, поэмалар. – Тош-кент: Бадиий адабиёт, 1957. – Б.184.

 $^{^2}$ Гафур Гулям. Айбек, Хамид Алимджан. Стихотворения и поэмы. Большая серия. – Л., 1980. – С.307.

³ Исмоилов И.А. Алишер Навоий «Садди Искандарий» достонининг қиёсий таҳлили. – Тошкент, 2019.

doirasida yaratilgan iskandarnomalarning mavzulari ham e'tiborga molik. Garchi iskandarnomalarning mavzulari genezisiga koʻra qahramonlik mavzulariga taalluqli boʻlsa-da, vaqt oʻtishi bilan mualliflarning originallikka intilishi faqat asar nomining emas, mavzuning ham oʻziga xoslik kasb etishiga olib kelgan. Firdavsiyning «Iskandarnoma»si qahramonlik mavzusida, Nizomiy «Iskandarnoma»si ham koʻproq jangnoma xarakteriga ega, lekin unda mavzu tarkibiga lirik, axloqiy-ma'naviy ruh ham qoʻshilgan. Xusravning «Oyinayi Iskandariy»si qisman jangnoma, koʻproq axloqiy-didaktik yoʻnalishga mansub. Jomiyning «Xiradnomayi Iskandariy»si esa jangnomalik xususiyatini butunlay yoʻqotib, sof didaktik xarakter kasb etgan. Navoiy qoʻygan nom ham asar mavzusini biror predmet yoki motivga aloqadordek koʻrsatsa-da, mazmunan qahramonlik va axloqiyma'rifiy jihat tenglik kasb etgan. Shu tarzda, nomlardagi turfalik mavzulardagi oʻzgarishlarni aks ettirib borgan. Bunday oʻziga xoslikni fotiha baytlar misolida ham kuzatish mumkin.

Sharqda yaratilgan iskandarnomalarda baroati istihlol borasida oʻziga xos an'ana mavjud, ularning aksariyati deyarli bir xil bayt bilan boshlanadi.

Firdavsiyda: Bar on ofarin, k-oʻ jahon ofarid,

Zamin-u, zamon-u makon ofarid.

Nizomiyda: Xudoyo, jahonpodshoy turost,

Zi mo xidmat oyad, xudoy turost.

Amir Xusravda: Jahonpodshoho, xudoyi turost,

Azal to abad podshoyi turost.

Jomiyda: Ilohi, kamoli ilohi turost,

Jamoli jahon podshohi turost.

Navoiyda: Xudoyo, musallam xudoliq sanga,

Birov shahki, da'bi gadoliq sanga.

Abdibek Sheroziyda: Jahonofarino, ilohi turost, Ba mulki jahon podshohi turost.

Ye.E.Bertels oʻz vaqtida mazkur an'anaga e'tibor qaratib, Nizomiy, Xusrav, Jomiy va Navoiy baytlarini oʻzaro qiyoslagan va mualliflar oʻrtasidagi farqni koʻproq ijtimoiy-siyosiy hayot bilan bogʻlab asoslashga harakat qilgan edi.

Faqat xamsanavislik an'anasida yaratilgan iskandarnomalarda emas, bu toifaga kirmaydiganlarida ham debochalar an'anaviy xarakterga ega. Nizomiy va Navoiy dostonlari an'anaviy hamd bilan boshlanadi. Epik hamdlar koʻlamdorlik, vazmin ifoda, obrazlar tizimi bilan lirik hamdlardan farqlanadi. Tavhidning badiiy funksiyasi Nizomiy va Navoiyga qadar tayin boʻlib ulgurgan, shu bois bunday boblar bir maqsadning ikki ijodkor tomonidan qanday ifodalanishi, ijodiy individuallikni kuzatish uchun juda qulay vaziyat hisoblanadi.

Navoiy dostonidagi munojotda aniq voqeaviylik boʻlmasa-da, biror nazariy fikr yoki asos, uning amaliy isboti kabi qismlar, ular oʻrtasida ichki bogʻlanish mavjud. Mana shu izchillik, avvalo, ijodkor fikrlarining ta'sirli chiqishiga xizmat qilgan. Nizomiy dostonidagi munojotda esa mazkur xususiyat u qadar sezilmaydi, uning tasvirlari bir xil ohang va bir xil mazmunda. Navoiy kabi fikrga turli asoslar keltirmaydi, u birgina «yaxshi yoki yomon boʻlsam ham, sening taqdiring tufayli» degan asosni ta'kidlaydi. Navoiy esa qoʻshimcha tarzda banda gunohlarining kechirilishiga akobirlar fikri, Horun haqidagi rivoyat va boshqa mantiqiy asoslar koʻrsatadi. Bunga sabab umidvorlik tuygʻusiga urgʻu berish edi, ya'ni Navoiy munojotida Nizomiydan farqli oʻlaroq umidvorlik ustuvor. Navoiy oʻz gunohlarini umumiy qayd etib qolmay, konkret misollar keltiradi, oʻzini koʻproq malomat qiladi. U bobdagi bu-

tun tasvirni Allohning karim sifati atrofida birlashtiradi, hatto sarlavhani ham shu nuqtaga tutashtiradi. «Akramul-Akramin» iborasining turli ma'nolarini sharhlab, mantiqiy xulosalar chiqaradi. Nizomiy munojotida esa hidoyat soʻrash yetakchi. U Tangrining biror sifati, masalan, karim yoki rahim sifatlariga alohida e'tibor qaratgan emas, balki toʻgʻridan-toʻgʻri Allohga murojaat qilish, uning qudrati haqida soʻzlashga intiladi. Nizomiyda ham oxirgi bayt ikki bobni oʻzaro uygʻunlashtirishga xizmat qilgan.

Qiyoslar paygʻambar haqiqati borasida Nizomiy va Navoiyning dunyoqarashi yaqin ekanini koʻrsatadi:

Nizomiy	Navoiy
Fikrlar koʻproq badiiy yoʻsinda aks etgan	Fikrlar nisbatan ochiq, hatto, Odam va undan keyingi paygʻambarlar- ning Muhammad (a.s.)ga nisbatan mavqeyi aniq qayd etiladi.
koʻrsatgan jasoratlari va ulugʻ zot ekani, sharafini ta'kidlashga koʻp	Ilohiy moʻʻjizalar xususida soʻzlagan boʻlsa-da, koʻproq paygʻambarning yangi shariat barpo etgani va uning oqibatlari haqida soʻz yuritadi.
Na'tda Navoiyda kuzatilgan Muhammad (a.s.) zoti tasviridan to unga Qur'on nozil boʻlgunga qadar vaqtning sabab-oqibat tarzidagi ifodasi yoʻq.	Tartib orqali tushunarlilik, badiiy tasvirdagi tizimlilikni ta'minlashdan tashqari, koinotning yaratilishi ham muayyan tartibga ega ekani, jumladan, Muhammad (a.s.) ana oʻsha jarayonda muhim oʻrin tutishini koʻrsatib berishga muvaffaq boʻlgan.

Nizomiy va Navoiyning me'roj borasidagi qarashlari juda uygʻun, lekin Navoiy bu bobda ham oʻz ijodiy prinsipiga muvofiq yangi yoʻldan yurishga intilgan.

Har ikki ijodkor paygʻambarning Tangri huzuridan qaytishi tasvirida ham oʻziga xoslik koʻrsatgan. Navoiy Muhammad (a.s.)ning bir damlik safardan buyuk himmati bilan ummati murodini hosil qilib qaytganiga diqqatni qaratsa, Nizomiy me'roj voqeasidan soʻng choriyorlarga sano aytadi. Nizomiyning bu tasvirlari debochanavislik an'anasiga muvofiq, chunki Sharq debochalarida manoqib doimiy tarkibiy qism sanalgan.

Alisher Navoiyning badiiy mahorati, kashfiyotlari mohiyatini toʻgʻri va toʻla koʻrsatish uchun u tayangan manbalar bilan atroflicha tanishish, ular orasidagi bogʻlanishlar xususiyatini tahlil qilish zarur. Bu ma'lum faktning saralanishidan boshlab, shakllanishi, badiiy tasviri va talqiniga qadar boʻlgan oraliqda ijodkorlarning individualligini aniqroq tasavvur qilish imkonini beradi.

Xamsanavislik doirasidagi iskandarnomalar Sharqda yaratilgan Iskandar qissalarining oltin halqasi. Ular qadimgi davrdan muallif davriga qadar boʻlgan folklor, diniy-tarixiy, adabiy-falsafiy merosning ensiklopedik umumlashmasi va hosilasi sifatida namoyon boʻladi.

Navoiy «Saddi Iskandariy»da ham debochani asar mazmuniga muvofiqlashtirish prinsipiga amal qiladi. Har ikki dostondagi **tavhid**, **munojot**, **tavsif na't**, **me'roj na't** kabi boblar an'anaviy boʻlgani uchun umumiylikka ega. Qolgan boblar maqsadi, mazmuniga koʻra farqlanadi, tafovutlarning yuzaga kelishi davrlar oʻtishi bilan ham izohlanadi.

Nizomiy debochasi boblarini bogʻlab turuvchi «ketma-ketlik», Navoiy debochasida «uzviylik» darajasiga koʻtarilgan va

kirish bob oʻziga xos kompozitsiyaga aylangan. Navoiyning tafakkur tarzi va tasvir uslubiga xos sistemali yondashuv debochadagi boblar tartibi va tasvirida aniq namoyon boʻladi.

Navoiy tasvir uslubiga muayyan fikrni turlicha poetik ifodalarda tasvirlash – poetik variatsiya hodisasi ham xos. Navoiy tasviridagi poetik variatsiya tabaqalanish xususiyatiga ham ega, ya'ni ularning ba'zilari murakkab bo'lsa, ba'zilari sodda xarakter kasb etadi, poetik variatsiyaning xilma-xilligi istalgan saviyadagi kitobxonga ijodkor fikrining yetib borishiga zamin bo'lgan.

Alisher Navoiy ijodining Ozarboyjon adabiyotiga ta'siri¹

Jahon adabiyotshunosligida Alisher Navoiy ijodini oʻrganish qariyb olti yuz yillik tarixga ega boʻlib, bu davr mobaynida Sharq va Gʻarb mamlakatlarida navoiyshunoslikka doir koʻplab durdona asarlar yaratildi hamda ulugʻ shoir va mutafakkir ilmiy-ijodiy merosining jahon madaniyati tarixidagi oʻrni yuqori baholandi.

Oʻzbek-ozarboyjon adabiy aloqalari, Alisher Navoiy she'riyati, shoir ijodining ozarboyjon mumtoz adabiyotiga ta'siri va adabiy merosining Ozarboyjonda oʻrganilishi kabi masalalar B.Valixoʻjayev, A.Hayitmetov, Yo.Is'hoqov, N.Komilov, A.Hojiahmedov, A.Rustamov, M.Muhiddinov, A.Qayumov, S.Gʻaniyeva, R.Vohidov, M.Hakimov, I.Haqqulov, A.Abduqodirov, M.Akbarova, N.Bozorova, K.Mullaxoʻjayeva, M.Sharipov kabi olimlarning ilmiy asar hamda maqolalarida oʻz aksini topgan.

Mushtarak til, madaniyat va an'analarga ega boʻlgan oʻzbek va ozarboyjon xalqlari orasidagi tarix uzoq oʻtmishga borib taqaladigan adabiy aloqalar XV asrda Alisher Navoiy tufayli yuksak choʻqqiga chiqdi. Nizomiy Ganjaviy, Imodiddin Nasimiy, Ashraf Marogʻiy, Qosim Anvor kabi ozarboyjon shoirlarining asarlaridan bahramand boʻlgan Navoiy oʻz davridan boshlab hozirga qadar Kishvariy, Xatoyiy, Fuzuliy, Rahmatiy, Sodiqiy, Amoniy, Zafar, Soib, Qoʻvsiy va boshqa koʻplab ozar shoirlarining ijodiga ta'sir koʻrsatdi. Oʻzbek shoiri ijodiyotidagi insonparvarlik, chuqur ma'no, yuksak san'atkorlik mahorati asarlarining ulkan joʻgʻrofiyada – butun Turkistondan tashqari Ozarboyjon, Eron, Turkiya va hatto Hindistonda ham yoyilishiga sabab boʻldi. Navoiyshunos olim Porso Shamsiyevning ta'kidlashicha, Navoiy qoʻlyozmalarining dunyoga tarqalishida Abduljamil va Sultonali Mashhadiy kabi xattotlar muhim oʻrin tutgan.

Koʻpchilik manbalarga asoslangan holda shuni ayta olamizki, Nizomiy merosi Oʻzbekistonda Navoiy davriga qadar ham keng yoyilgan, sevib oʻqilgan edi. Alisher Navoiy ozar shoiri Nizomiy Ganjaviyning «Panj ganj» asaridan badiiy ta'sirlangan holda turkiy tilda «Xamsa» asarini yozgan boʻlsa, Ozarboyjonda Ne'matulloh Kishvariy, Muhammad Fuzuliy, Sodiqbek Afshor Sodiqiy, Ahdiy Bagʻdodiy va boshqa mashhur ijodkorlar Navoiy asarlaridan ilhomlanib nazira, taxmis, tazkira hamda dostonlar yaratishdi.

Navoiy ijodining ozarboyjon adabiyotiga ta'sirini koʻrsatuvchi eng muhim manbalardan biri chigʻatoy lugʻatlaridir. Bunday lugʻatlarning aksariyati Eron va Ozarboyjonda yozilgani e'tiborni tortadi. Mualliflar orasida faqat Fazlullohxon va Muhammad Yaʻqub Chingiy hindistonlikdir. Mazkur lugʻatlarning Hindistonda yaratilishi Navoiy asarlari ta'sir darajasini yoritishda muhim ahamiyatga ega.

¹ Султанов Т. Алишер Навоий ва Озарбайжон адабиёти: тарихий илдизлар, анъаналар, ворисийлик (Кишварий ва Содикий асарлари мисолида). – Тошкент, 2019.

Ushbu asarlardan «Badoye' ul-lugʻat» chigʻatoy tilining eng eski lugʻatlaridan biridir. Iroq shevasi va ozarboyjon tili xususida soʻz yuritilgani lugʻatning originalligini belgilaydi.

Yana bir muhim lugʻat «Sangloh»da ozarboyjon shoiri Muhammad Fuzuliy ijodidan namunalar keltirilgan.

XVI asrda Safaviylar hukumat tepasiga kelishdi. Ozarboyjon adabiyotining oltin davri hisoblanadigan mazkur asrning eng taniqli shoirlari Xatoyiy (Shoh Ismoil) va Fuzuliydir. Xatoyiy (1486–1524) Fuzuliy va Soibdan oldin Navoiy yoʻlidan borib, oʻz asarlarini ona tilida yozish orqali ozarboyjon adabiy tilining rivojlanishiga muhim hissa qoʻshgan. Uning devonidan tashqari, «Dahnoma», «Nasihatnoma» nomli dostonlari ham sodda, xalqqa tushunarli tilda yozilgani bilan ajralib turadi.

Xatoyiy ijodida Navoiy she'rlariga oʻxshash jihatlar koʻp. U ham Navoiy kabi insonning mavjudligini kuylash, uning samimiy, real va hayotiy muhabbatini ulugʻlash, hayotdan zavqlanish, umrdan unumli foydalanish gʻoyalarini ilgari surgan. Jumladan, uning «Gəlmədi» («Kelmadi») radifli gʻazali vazn, radif va uslub jihatdan Navoiyning mashhur «Kelmadi» radifli gʻazalini eslatadi:

Alisher Navoiy:

Kecha kelgumdur debon, ul sarvi gulroʻ kelmadi, Koʻzlarimga kecha tong otquncha uygu kelmadi.

Ismoil Xatoyiy:

Dəmbədəm yol gözlərəm, ol sevgi yarım gəlmədi, Qalmışam qış möhnətində, novbaharım gəlmədi.

XVI asrning ikkinchi yarmi va XVII asrning boshlarida Ozarboyjonda yashagan mashhur shoir, mohir nosir, manbashunos olim, xattot va miniatyurachi rassom Sodiqbek Afshor Sodiqiy ham Alisher Navoiy gʻazallaridan ilhomlanib naziralar, shuningdek, «Majolis un-nafois» asari ta'sirida «Majma' ul-xavos» tazkirasini yozgan. Sodiqiyning «She'rlar» asaridagi 40 ta ozarboyjoncha gʻazalni Navoiyning «Xazoyin ul-maoniy» kulliyotidagi 2600 ta oʻzbekcha gʻazal bilan mazmun, shakl va uslub jihatdan taqqoslaganimizda, Sodiqbek Afshorning Navoiy gʻazallaridan adabiy ta'sirlangan holda 21 ta nazira yozgani aniqlandi.

Alisher Navoiy asarlarining ozarboyjon shoirlari ijodiga ta'siri natijasida ozarboyjon mumtoz adabiyotida bebaho asarlar yuzaga keldi va «oltin davr» boshlandi. Alisher Navoiyning ozarboyjon adabiyotiga ta'siri va adabiy merosining oʻrganilishi, gʻazallarining Ne'matulloh Qishvariy ijodiga ta'siri hamda Sodiqbek Afshor Sodiqiy ijodida Alisher Navoiy an'analari masalalari oʻzbek va ozarboyjon adabiyotshunosligi uchun muhim tadqiqot maydoni boʻlib qolaveradi.

Nazorat savollari:

- 1. Oʻzbekistondagi qiyosiy tadqiqotlar istiqboli haqida qanday tushunchaga egasiz?
- 2. Oʻzbek adabiyotini jahon adabiyoti kontekstida oʻrganish qanday samara beradi?
- 3. Abdulla Qahhor va Jek London asarlaridagi umumiy va oʻziga xos tomonlar nimalardan iborat?
- 4. Namuna sifatida berilgan qiyosiy tadqiqotlardan birini qiyosiy tahlil mezonlari boʻyicha oʻrganib chiqing va baho bering.

MUSTAQIL IZLANISH UCHUN MAVZULAR

- 1. Oybek va Pushkin ijodida peyzaj tasviri.
- 2. A.P. Chexov va A. Qahhor hikoyalarida falsafiylik.
- 3. Sharq va Gʻarb adabiyotidagi an'anaviy obrazlar.
- 4. Oʻzbek romanlarida antik obrazlar.
- 5. Abadiy mavzular va ularning qiyosiy talqini.
- 6. Jahon adabiyotida begʻubor bolalik mavzusi.
- 7. Jahon dramaturgiyasida sigʻinish motivi.
- 8. Sharq she'riyatida qish obrazi.
- 9. Gʻarb she'riyatida bahor obrazi.
- 10. Gʻafur Gʻulom va jahon adabiyoti.
- 11. I.V.Gyote ijodida Qur'oniy motivlar.
- 12. F.Dostoyevskiy va U.Hamdam ijodida psixologizm.
- 13. Nemis adabiyotida sharqona motivlar.
- 14. Sharq adabiyotida Gʻarb sivilizatsiyasi.
- 15. Ixtiro jahon adabiyoti kontekstida.
- 16. Oʻzbek va rus realistik romanlarida ijtimoiylik.
- 17. A.N.Tolstoy asarlarida Qur'oniy mavzular.
- 18. Jahon adabiyotida jinoyat va jazo motivi.
- 19. Jahon adabiyotida xiyonat motivi.
- 20. Gʻazal janrida aksioma (isbot talab qilmaydigan xususi-yatlar).
 - 21. Jahon she'riyatida sogʻinish motivi.
 - 22. Oʻzbek hikoyalarida milliy gʻururning ifodalanishi.
 - 23. Antik davr dramalarida fojea estetik kategoriya sifatida.
 - 24. Navoiy va Ogahiy ijodida mifologik motivlar.
- 25. Umar Xayyom va Pahlavon Mahmud ruboiylarida poetik mushtaraklik.
 - 26. Sharq va Gʻarb adabiyotida donishmand obrazi.

- 27. M.Lermontov va M.Yusuf poeziyasida afsuslanish motivi.
- 28. Dostoyevskiy va Shatobrian: an'ana va mahorat.
- 29. Jahon adabiyotida ideal shoh obrazi.
- 30. Folklor motivlarining yozma adabiyotdagi transformatsiyasi.
 - 31. Nosir Zohid va Viktoriya Shvabning «Qasos» romanlari.
 - 32. Bir xil nomdagi asarlar komparativistikasi.
 - 33. Oʻzbek prozasida baxt motivi.
 - 34. Rus yozuvchisining turkiy olami.
 - 35. Oʻtkir Hoshimov va Tohir Malik ijodida diniy motivlar.
 - 36. Jahon adabiyotida sayyor arxiteplar.

KOMPARATIVIST OLIMLAR

Qiyosiy adabiyoshunoslik yoʻnalishida ilmiy ish olib borishni maqsad qilgan tadqiqotchi, albatta, komparativist olimlar va ularning ilmiy-nazariy xulosalari, qiyosiy adabiyotshunoslik rivojiga qoʻshgan hissasini bilishi kerak. Shu maqsadda dunyoga mashhur yevropa va rus komparativistlari toʻgʻrisida qisqacha ma'lumot beramiz.

I.G.Gerder (1744–1803) shoir va yozuvchi, tarjimon, qiyosiy adabiyotshunoslik borasida ilk nazariy fikrlar bildirgan nemis olimi. Oʻzining «Insoniyat tarixi falsafasiga doir gʻoyalar» (1784) asarida birinchilardan boʻlib barcha yevropa xalqlari uchun umumiy boʻlgan, yagona madaniy tarixiy jarayonning birligi gʻoyasini ilgari suradi. «Nemis adabiyotidan lavhalar» kitobidan esa bu fikrni mantiqan davom ettirib, barcha yevropa xalqlari uchun umumiy boʻlgan adabiy hodisalar, an'analar kabi masalalarni yoritadi. «Xalq qoʻshiqlari» antologiyasida (1778–1779) badiiy adabiyotda folklorning oʻrni va yevropa xalqlari uchun mushtarak tomonlari haqida soʻz yuritadi.

I.V.Gyote (1782–1832) shoir, olim, tarjimon, I.G.Gerderning mushtarak madaniy jihatlar haqidagi nazariyasini davom ettirib, fanga «jahon adabiyoti» atamasini olib kirgan. Mashhur «Faust», «Gʻarb-u Sharq devoni» va koʻpgina boshqa asarlar muallifi. Ayniqsa, uning «Gʻarb-u Sharq devoni» qiyosiy metodologiyaga asoslanib yozilgan asar boʻlib, unda Gʻarb va Sharq – jahon adabiyotini tashkil qiluvchi ikki buyuk qoya ekani isbotlab berilgan. Shuningdek, Gʻarb va Sharq doimiy adabiy aloqada ekani, ular orasida umumiy adabiy qonuniyatlar mavjudligi ochib berilgan.

T.Benfey (1809–1881) nemis olimi, sanskritolog, qiyosiy adabiyotshunoslik nazariyotchisi. U fan olamida birinchi boʻlib «syujetlar migratsiyasi», ya'ni syujetlarning jahon adabiyoti boʻylab koʻchib yurish nazariyasini yaratgan. Olim qadim sanskrit asari boʻlgan «Panchatantra»ni tarjima va tadqiq qila turib, undagi syujetlar koʻchib yuruvchi syujetlar ekanini, turli xalqlar folklorida uchrashini qiyoslash metodi orqali isbotlab bergan. T.Benfey fan olamida birinchi boʻlib, «Orient und Occident» («Sharq va Gʻarb») jurnaliga asos solgan. Bu jurnalda dastlabki qiyosiy tadqiqotlar oʻz aksini topgan. Bugungi kunda olim asos solgan «syujetlar migratsiyasi» nazariyasi asosida bir qancha ilmiy loyihalar bajarilmoqda¹.

A.A.Potebnya (1835–1891) – birinchi boʻlib nazariy poetika asoslarini ishlab chiqqan olim, tilshunos, faylasuf, tarjimon. U oʻzining «Nazariy poetika» asarida fan tarixida birinchilardan boʻlib poeziya va proza, badiiy tasvir vositalari, poetik va mifologik tafakkur, stilistik figuralar haqida ilmiy nazariy xulosalarini bayon qilgan. Uning adabiyotshunoslikka doir ayrim izlanishlari keyinchaliik adabiyotshunos M.Baxtin tomonidan davom ettirilgan.

G.M.Brandes (1842–1927) – daniyalik adabiyotshunos olim, publitsist, koʻpgina ilmiy asarlar muallifi. «XIX asr Yevropa adabiyotida asosiy yoʻnalishlar» nomli kitobida birinchi boʻlib ayni haqiqatni, ya'ni bir xalqning dahosi, ikkinchi bir xalq dahosiga ehtiyoj sezadi va bu ehtiyoj unga katta kuch, gʻayrat bagʻishlaydi degan fikrni ilgari suradi. Uning ilmiy asarlari asosan jahon adabiyotining buyuk daholari ijodi tahliliga bagʻishlanadi.

X.G.Gadamer (1900–2002) – nemis faylasufi va adabiyotshunosi. Germenevtika – talqin san'ati nazariyasi asoschisi. «Haqiqat va metod», «Goʻzallikning dolzarbligi» kabi asarlar

¹ Вечные сюжеты и образы в литературе и искусстве русского модернизма // modernista.moscow/

muallifi. Uning asarlari qiyosiy adabiyotshunoslikda tarjima va talqin, tahlil va talqin kabi masalalarga asos boʻlib xizmat qiladi.

Kurt Vays (XXasr) – nemis komparativist olimi, Tyubingen universiteti professori. Qiyosiy adabiyotshunoslik boʻyicha yaratilgan «Yevropa xalqlarining zamonaviy adabiyoti»(1939), «Qiyosiy adabiyotshunoslikda tadqiqotchilik muammolari»(1948) kabi jamoaviy ilmiy asarlarning tashabbuskori boʻlgan.

D.Dyurishin (1928-1997) - qiyosiy adabiyotshunoslik nazariyasi tarixida oʻziga xos oʻringa ega boʻlgan slovak olimi, adabiyotni tipologik jihatdan oʻrganish yoʻnalishining jahondagi eng yirik mutaxassisidir. Olimning «Slovak realistik hikovachisi va N.V.Gogol»(1966), «Adabiy komparavistika muammolari» (1967), «Adabiy komparavistika tarixi va nazariyasidan»(1970), «Adabiyotni qiyosiy oʻrganish»(1972), «Adabiy komparativistik nazariya»(1975), «Slovak adabiy komparavistikasi tarixi»(1979), «Slovak adabiy komparavistikasi bibliografiyasi»(1980) kabi bir necha kitoblari jahonning koʻplab tillariga tarjima qilingan. D.Dyurishinning «Adabiyotni qiyosiy oʻrganish nazariyasi» asarida jahon adabiyotshunosligida qiyosiy tahlil metodining paydo boʻlishi, shakllanishi yoritilgan. U tipologik tahlil adabiyotshunoslik uchun muhim masalalaridan biri ekanini koʻrsatadi va uning vazifasini adabiy ta'sirning tipologik va genetik (adabiy asarlar, yozuvchilarning ijodiy merosi, adabiy maktablar, janrlar, uslublar shakllanishi va boshqalar) mohiyatini aniqlash, ularning ichki qonuniyatlarini ochishdan iborat deb belgilaydi.

A.Dima (XXasr) – rumin adabiyotshunosi, akademik, qiyosiy adabiyotshunoslik xalqaro assotsiatsiyasining a'zosi. Uning mashhur «Qiyosiy adabiyotshunoslik tamoyillari» monografiyasida jahon komparativistikasining tadrijiy taraqqiyoti, rumin qiyosiy adabiyotshunosligi, xalqaro adabiy aloqalarning

turlari va shakllari, komparativistikaning nazariy va amaliy ahamiyati kabi bir qator masalalar yoritilgan. Olim xalqaro adabiy aloqalarning turlari haqida yozar ekan, genetik jihatdan yaqin boʻlmagan, ijtimoiy va tarixiy jihatdan uzoq xalqlar adabiyotida ham tipologik oʻxshashliklar boʻlishi mumkinligini isbotlaydi¹. A.Dima yaratgan nazariya turli xalqlar adabiyotida oʻxshash va farqli tomonlarni tahlil qilish orqali, ular orasidagi umumiy qonuniyatlarni aniqlash imkonini beradi (Masalan, Mark Tven va Gʻafur Gʻulom asarlari komparativistikasi)

A.N.Veselovskiy (1838–1906) – rus adabiyotshunosi, akademik. Tarixiy poetika nazariyasi asoschisi, qiyosiy-tarixiy adabiyotshunoslik boʻyicha yetuk mutaxassis olim sifatida slavyan, Vizantiya, Gʻarbiy Yevropa xalqlari adabiyotini jahon adabiyoti kontekstida oʻrgangan. «Roman va qissa tarixi», «Tarixiy poetika» kabi ilmiy asarlar muallifi.

V.M.Jirmunskiy (1891–1971) rus adabiyotshunosi, komparativist olimi, xorij va oʻzbek adabiyoti tadqiqotchisi. Turli xalqlar adabiyoti tipologiyasini, jumladan «Odisseya» va «Alpomish» asarini qiyosan oʻrganish asosida sayyor (koʻchib yuruvchi) motivlar nazariyasiga asos solgan. «Turkiy epos», «Qofiya tarixi va nazariyasi», «Adabiyot nazariyasi», «Qiyosiy adabiyotshunoslik», «Bayron va Pushkin kabi ilmiy asarlar muallifi. Turkiy qahramonlik eposining paydo boʻlishi, shakllanishi va qarindosh boʻlmagan boshqa xalqlar eposlariga ta'siri borligini ilmiy jihatdan isbotlangan.

N.I.Konrad (1891–1970) – rus sharqshunos olimi, faylasufi va tarjimoni. Yapon, xitoy va turkiy xalqlar adabiyotini jahon adabiyoti kontekstida oʻrganib, fan uchun muhim ilmiy asarlar yozib qoldirgan. Adabiy aloqalar va adabiy ta'sir masalalari qiyosiy adabiyotshunoslikning obyekti ekanini nazariy jihatdan

¹Дима А. Принципы сравнительного литературоведения. – М.: Прогресс, 1977. – С.121.

asoslab bergan. «Gʻarb va Sharq», «Adabiyot va teatr», «Alisher Navoiy va Renessans» kabi koʻplab ilmiy asarlar muallifi.

Ye.E.Bertels (1890–1957) – rus eronshunos va navoiyshunos olimi. «Firdavsiy», «Navoiy va Attor», «Navoiy va Jomiy», «Tasavvuf va tasavvuf adabiyoti», «Nizomiy», «Jomiy» kabi oʻnlab ilmiy asarlar muallifi. Fan tarixida birinchi boʻlib Yevropa olimlarining «Navoiy forsiy adabiyotning taqlidchisi» degan metodologik xatosini oʻz ilmiy asarlari bilan isbotlagan. Deyarli barcha asarlari tilshunos va adabiyotshunos olim I.Mirzayev tomonidan oʻzbek tiliga oʻgirilgan.

I.G.Neupokoyeva (1917–1977) – rus komparativist olimasi, adabiy aloqalar qiyosiy adabiyotshunoslikning predmeti ekanini oʻzining bir qancha ilmiy maqola va monografiyalarida isbotlab bergan. I.G.Neupokoyeva adabiy aloqalarni tarixiy ehtiyoj, tajriba almashish maydoni ekanini e'tirof etib, adabiyot hech qachon boshqa millat adabiyotlaridan ayri holda rivojlana olmasligini ta'kidlagan. «Zamonaviy adabiyotlarning oʻzaro ta'siri muammolari»(1963), «Tizimli va qiyosiy tahlil asoslari»(1976) kabi fundamental asarlar muallifi.

M.P.Alekseyev (1896–1981)) – rus va Gʻarbiy Yevropa adabiyotini qiyosan oʻrgangan olim, akademik. Oʻzining «Qiyosiy adabiyotshunoslik» nomli kitobida roman nemis xalqlari adabiyotidagi parallellar nazariyasini yaratgan.

Shuningdek, Emil Zolya va Chernishevskiy, Gogol va Tomas Mur, Monteske va Kantemir kabi adiblarning qarashlarini qiyosan oʻrgangan.

P.M.Topper (1923–2010) – rus adabiyotshunos olimi, tarjimon. «Chet el adabiyoti» (Иностранная литература) jurnali tahririyati a'zolaridan biri. Uning ilmiy izlanishlari asosan urush mavzusini rus va jahon adabiyoti kontekstida oʻrganishga bagʻishlangan. Bundan tashqari tarjima nazariyasi, tarjimashunoslik tanqidi bilan ham shugʻullangan. Tarjimaning qiyosiy adabiyotshunoslik obyekti ekanini ilmiy nazariy jihatdan asoslab, «Tarjima qiyosiy adabiyotshunoslik tizimida» mavzusida fundamental asar yaratgan.

Boris Reyzov (1902–1981) – Yevropa adabiyoti boʻyicha mutaxassis. XIX asr fransuz tarixiy romanlarini jahon adabiy kontekstida tadqiq qilgan. «Stendal romanist»(1939) mavzusida yirik fundamental asari mavjud.

Yu.Borev (1925) – akademik, rus adabiyotshunos olimi. 50 dan ortiq monografiya, 500 dan ortiq maqolalar muallifi, ilmiy asarlari dunyoning 41 ta tiliga tarjima qilingan. «Академические тетьради» jurnalining bosh muharriri. Ilm olamida mashhur boʻlgan «Estetika» asari estetika va ijodiy faoliyatni qiyoslab oʻrgangan. Yozuvchi uslubini estetik kategoriya sifatida ochib bergan.

R.Zimner (Rüdiger Zymner) – nemis zamonaviy komparativist olimi. Germaniyaning Bergish universiteti professori¹ Qiyosiy adabiyotshunoslik, nazariyasi va metodologiyasi boʻyicha koʻplab kitoblar muallifi. Olimning 2013-yilda hammualliflikda nashr qilingan ilmiy asari (Handbuch Komparatistik: Theorien, Arbeitsfelder, Wissenspraxis) bu boradagi fundamental asarlaridan biri sanaladi².

V.R.Amineva – rus zamonaviy komparativist olimasi. Rossiyaning Qozon shahridagi filologiya va madaniyatlararo kommunikatsiya instituti professori. Qiyosiy va chogʻishtirma adabiyotshunoslik boʻyicha bir qancha qoʻllanmalar va badiiy asar poetikasi, semiotikasi, semantikasi bilan bogʻliq koʻplab ilmiy maqolalar muallifi.³

¹ www.germanistik.uni-wuppertal.de/de/teilfaecher/neuere-deutsche-literatur/personen/ruediger-zymner.html

 $^{^2}$ Handbuch Komparatistik: Theorien, Arbeitsfelder, Wissenspraxis / Hrsg. von Zymner R., Hölter A. – Stuttgart: Verlag J.B. Metzler, 2013. – 406 s.

³ https://scholar.google.ru/citations?user=l id2N4AAAAJ&hl=ru

GLOSSARIY

Sintetizm – fransuz tilida qoʻshish, jamlash degani. Impressionizm (san'atning barcha turlarida taassurot qoldirish) ning bir koʻrinishi. Adabiyotdagi sintetizm har xil ijodiy uslublardan unumli foydalanish, jamlash, mazmun va shakl jihatdan noyob asar yaratish.

Mentallik – u yoki bu millat xususiyatidan kelib chiqadigan tafakkur tarzi, olamni milliy asoslarga tayanib idrok qilish. (Chingiz Aytmatov, Oʻtkir Hoshimov, Muhammad Yusuf asarlarida mentallik kuchli).

Retseptiv estetika – (qabul qilish) Estetikaning bir yoʻnalishi boʻlib, matn va kitobxon orasidagi estetik dialogdir, u yoki bu asarning kitobxon tomonidan qabul qilinishi.

Intertekst(lik) – (1967-yilda fransuz olimasi Yuliya Kresteva fanga kiritdi) matnlarning oʻzaro aloqaga kirishuvi. Adabiy matnlarning oʻzaro aloqasi.

Paratekst(uallik) – epigraf, mavzu, umuman matn atrofidagi unsurlar bilan bogʻliqligi.

Metatekst – asosiy matn yoki badiiy kitob bilan bogʻliq matnlar va kitob (asar)lar aloqasi. Shekspirning «Romeo va Julyetta» asari boshqa shunga oʻxshash asarlar uchun metatekst vazifasini bajara oladi.

Gipertekst – birinchi marta kompyuter lingvistikasida paydo boʻlgan. Havolalar orqali katta matnlar yoki havolalarga oʻtish.

Arxitekst – matnlarning janr jihatdan bogʻliqligi. Tipologik oʻxshashliklari va farqlari.

Imagologiya – («image» – tasvir) bir xalq adabiyotida oʻzga xalqning imidjini yaratish. (Rus nigohida Navoiy ijodi, Немсы глазами русских). Baxtin imogologiyaning asoslarini yaratib, Чужое – свое (Oʻzganiki – oʻzimizniki) nazariyasini yaratgan. «Эстетика словесного творчества» kitobida ochib berilgan.

Vorislik – an'analarga sodiq qolish (Navoiy ijodida antik an'analar, Xamsachilik).

Semiotika – belgilar haqidagi fan. Adabiyotdagi semiotika bu adabiyotning barcha unsurlarini mayda detallarigacha tahlil qilish, umumiy va xos tomonlarini aniqlash. I.Steblevaning «Семантика газеля Бабура» kitobi semiotik tahlil namunasidir. Asoschisi Yuriy Lodman (Latviya XX asr).

Tipologiya – genetik jihatdan oʻzaro bogʻlanmagan, tili, tarixi, madaniyati tamomila farq qiladigan xalqlar adabiyotida mushtarak jihatlarni aniqlashga yordam beradigan komparativistik tushuncha hisoblanadi.

Qiyoslash tipologiyasi – umumiy xususiyatlariga koʻra (bitta til oilasiga kirishi, janr, etnik xususiyatlariga koʻra) u yoki bu adabiyot namunalarining qiyoslanishi. Tipologiya natijasida ayrim til va adabiyotga xos umumiy qonuniyatlar shakllanadi.

Motiv – psixologiyada biron xatti-harakatga turtki beruvchi sabab, adabiyotda syujetning takrorlanuvchi unsuri. Masalan, muhabbat motivi, doʻstlik motivi. Adabiy tushuncha sifatida birinchi marta A.N.Veselovskiyning «Syujetlar poetikasi» (Поэтика сюжетов, 1906) asarida ilmiy jihatdan asoslangan. Olimning fikricha, motivlar kombinatsiyasi syujetni yuzaga keltiradi.

Adabiy arxetip – badiiy asarlarda koʻp uchraydigan va takrorlanadigan obrazlar, syujetlar, motivlar. Masalan, detektiv

asarlarda qotil va maqtul obrazi, xazina izlash syujeti, muhabbat motivi va h.k.

Sayyor syujetlar – bir xalq adabiyotidan boshqa bir xalq adabiyotiga, ayniqsa, folkloriga koʻchib yuruvchi syujetlar. Masalan, uch ogʻayni botirlar, uyqudagi malika, sirli orol bilan bogʻliq syujetlar. Atama birinchi marta nemis olimi T.Benfev tomonidan qoʻllanilgan. U 1859-yilda hind adabiyoti mumtoz namunasi «Panchatantra»ni oʻrgana turib, undagi har bir hikoyatga adabiy parallel, ya'ni boshqa xalqlar adabiyotida shunga oʻxshash syujet topadi va syujetlar migratsiyasi (koʻchishi) haqidagi nazariyani yaratadi. Sayyor syujetlarni adabiy hodisa sifatida oʻrganish, Sharq va Gʻarb adabiyoti aloqalarini yoritish maqsadida T.Benfey «Orient und Occident» deb nomlangan davriy jurnal chiqara boshlaydi. Uning bu boradagi nazariy qarashlarini rus olimi V.M.Jirmunskiy davom ettirgan¹. Sayyor syujetlarni kuzatish asosida turli millat adabiyotlarida yaratilgan nasr va nazm namunalarini keng oʻrganish, adabiy hamkorlikning muhim jihatlarini aniqlash mumkin.

ADABIYOTLAR RO'YXATI

Asosiy adabiyotlar

- 1. Аминева В.Р. Теоритические основы сравнительного и соспоставительного литературоведения. Учебное пособие. Казань, 2014.
- 2. Азизов К., Қаюмов О. Жаҳон адабиёти тарихи (XVIII XX асрлар). Тошкент: Ўқитувчи, 1987.
- 3. Академические школы в русском литературоведении / Отв. ред. П.А.Николаев. М., 1975.
- 4. Алексеев М.П. Сравнительное литературоведение. М.: Наука, 1983.
- 5. Bakhronova D. Literatura comparada. Tashkent: Turon, 2019.
- 6. Бекметов Р.Ф. Литературная компаративистика как методологическая проблема // Филология и культура. №22. М., 2010. С.62 69.
- 7. Бройтман С.Н. Историческая поэтика. Учебное пособие. М., 2001.
- 8. Бойназаров Ф. Жаҳон адабиёти. Тошкент: Зарҳалам, 2006.
- 9. Бекметов Р.Ф. Литературная компаративистика как методологическая проблема // Филология и культура. №22. М., 2010. С.62 69.
- 10. Веселовский А.Н. Историческая поэтика. М., 1989.
- 11. Гиленсон Б.А. История зарубежной литературы от античности до середины XIX века. Учебник для бакалавров. М.: Юрайт, 2014.
- 12. Данилина Г.И. Сравнительное литературоведение. Хрестоматия. Тюмень, 2011.
- Дима А. Принципы сравнительного литературоведения. М., 1977.
- Дюришин Д. Теория сравнительного изучения литературы. М., 1979.
- 15. Дўстмуҳамедов Қ. Нобель мукофотини олган адиблар. Тошкент: Маънавият, 2002.
- 16. Жаҳон адиблари адабиёт ҳақида (Озод Шарафиддинов таржималари) / Тўплаб нашрга тайёрловчилар: Шарафутдинова М., Тўйчиева Ш. Тошкент: Маънавият, 2010. 390 б.
- 17. Ильин И.П. Современные концепции компаративистики и сравнительного изучения литератур. М., 1987.

¹ Жирмунский В.М. Сравнительное литературоведение: Восток и Запад. – Л.: Наука, 1979.

- 18. Проблемы современной компаративистики / Сост. Е.Луценко, И. Шайтанов. М., 2011.
- 19. Сравнительное литературоведение. Хрестоматия; учеб. пособие для студентов вузов / Отв. ред. Г.И.Данилина. 2-е изд., испр. и доп. Тюмень: Изд-во ТюмГУ, 2011. 632 с.
- 20. Каримов Б. Адабиётшунослик методологияси. Тошкент: Мухаррир, 2011.
- 21. Конрад Н.И. К вопросу о литературных связях // Запад и Восток. М., 1966.
- 22. Конрад Н.И. О некоторых вопросах истории мировой литературы // Народы Азии и Африки. 1966. №1.
- 23. Конрад. Н.И. Проблемы современного сравнительного литературоведения // Изв. АН СССР. Отделение литературы и языка. 1959. Т.18. Вып.4.
- 24. Кокорин А.А. Сравнительный анализ: теория, методология, методика. М., 2009.
- 25. Минералов Ю.И. Сравнительное литературоведение (Компаративистика). Учебник. М.: Юрайт, 2018.
- 26. Неупокоева И.Г. История всемирной литературы. Проблемы системного и сравнительного анализа. М., 1976.
- 27. Норматова Ш. Жахон адабиёти. Тошкент: Маънавият, 2008.
- 28. Пруцков Н.И. Историко-сравнительный анализ произведений художественной литературы. Л.: Наука, 1974.
- 29. Реизов Б.Г. Сравнительное изучение литературы // История и теория литературы. Сб. ст. Л., 1986.
- 30. Силантьев И.В. Поэтика мотива. М., 2004.
- 31. Сравнительное и сопоставительное литературоведение. Хрестоматия / Составители: В.Р.Аминева, М.И.Ибрагимов, А.З.Хабибуллина. Казань, 2001.
- 32. Сулаймонова Ф. Шарқ ва Ғарб. Тошкент: Ўзбекистон, 1997.
- 33. Топер П.М. Перевод в системе сравнительного литературоведения. М., 2000.
- 34. Шайтанов И.О. Триада современной компаративистики: глобализация интертекст диалог культур // Проблемы современной компаративистики. М., 2011.
- 35. Қаюмов О. Жаҳон адабиёти тарихи (V XVIII). Тошкент: Ўқитувчи, 1979.

- 36. Qosimov A., Hamroqulov A., Xoʻjayev S. Qiyosiy adabiyotshunoslik. Toshkent: Akademnashr, 2019.
- 37. Қосимов А. Адабиётда типологик ўхшашликлар ва ўзаро таъсир. Тошкент: Фан, 2004.
- 36. Эшонбобоев А. Қиёсий-тарихий метод ҳақида // Ўзбек тили ва адабиёти. Тошкент, 2008. №4. Б.38 46.

Qo'shimcha adabiyotlar

- Адибларнинг Нобель маърузалари. Тошкент: Ғафур Ғулом, 2008.
- 2. Аверинцев. С.С. Древнегреческая поэтика и мировая литература // Поэтика ревнегреческой литературы. М., 1981.
- 3. Алексеев М.П. Пушкин и Шекспир // Сравнительно-исторические исследования. – Л., 1972.
- 4. Бахтин. М.М. Проблемы поэтики Достоевского. М., 1963.
- 5. Бахтин М. Романда замон ва хронотоп шакллари / У.Жўрақулов таржимаси. Тошкент: Академнашр, 2015. 288 б.
- 6. Бахтин М.М. Вопросы литературы и эстетики. М., 1975.
- 7. Бахтин М.М. Эстетика словесного творчества. М., 1979.
- 8. Берков П.Н. Проблемы исторического развития литературы. Л., 1981.
- Беркалиев Т.Н. Особенности компаративистики как науки и метода исследования // Библиосфера. №1. Новосибирск, 2009. C.10 16.
- 10. Богаткина М.Г. О формировании новой парадигмы в современной компаративистике // Международная научная конференция. Казань, 2004. C.302 304.
- 11. Большакова А.Ю. Типология и менталитет (К проблеме русскозападных межлитературных схождений) // Филологические науки. 1996. №6.
- 12. Борев Ю.Б. Эстетика. М., 1969.
- 13. Восток Запад: Исследования. Переводы. Публикации. М., 1989.
- Восточная поэтика. Специфика художественного образа. М., 1983.
- 15. Взаимосвязи и взаимодействие национальных литератур: Материалы дискуссии 11 15 янв. I960 / Редкол. И.И.Анисимов [и др.]. М., 1961.

- 16. Виппер Ю.Б. «Типологические схождения» в изучении мирового литературного процес-са // Классическое наследие и современность. Л., 1981.
- 17. Волков И.Ф. Творческие методы и художественные системы. M., 1989.
- 18. Гринцер П.А. Эпохи взаимодействия литератур Востока и Запада. М., 1997.
- 19. Историческая поэтика. Литературные эпохи и типы художественного сознания. М., 1994.
- 20. XX аср жахон шеърияти / Нашрга тайёрловчи Хабиб Абдиев. Тошкент, 2011.
- 21. Женетт Ж. Работы по поэтике. Фигуры. М., 1998.
- 22. Жирмунский В.М. Эпическое творчество славянских народов и проблемы сравнительного изучения эпоса // Исследования по славянскому литературоведению и фольклористике. М., 1960.
- 23. Жўракулов У. Худудсиз жилва. Тошкент: Фан, 2006.
- 24. Каримов Ш. Немис адабиёти тарихи. Тошкент: Мумтоз сўз, 2010.
- 25. Литературные архетипы и универсалии. М., 2001.
- 26. Лотман Ю.М. Статьи по семиотике культуры и искусства. СПб., 2002.
- 27. Мелетинский Е.М. Введение в историческую поэтику эпоса и романа. М., 1986.
- 28. Мелетинский Е.М. Поэтика мифа. М., 1995.
- 29. Мелетинский Е.М. От мифа к литературе. М., 2001.
- 30. Надъярых Н.С. Типологическое исследование (принципы, задачи, перспективы) // Вопросы литературы народов СССР. Киев, 1975. Вып. 1.
- 31. Наследие Александра Веселовского. Исследования и материалы / Редкол.: П.Р.Заборов (отв. ред.) [и др.]. СПб., 1992.
- 32. Николаев П.А. Типология и компаративистика: современная жизнь понятий // Филологические науки. 1996. №3.
- 33. Комилов Н. Ибн Сино ва Данте. Тошкент: Адабиёт ва санъат, 1989.
- 34. Котенко В.П. Компаративистика новое направление методологии анализа научной деятельности и развития науки // Библиосфера. №3. Новосибирск, 2007. C.21 27.
- 35. Сувон Мели. Навоий ва Данте Юксак фазоларда учрашув // Жаҳон адабиёти. 1998. №2. Б.6 12.

- Поспелов Г.Н. Проблемы исторического развития литературы. М., 1972.
- Рифтин Б.Л. Типология и взаимосвязи средневековых литератур // Типология и взаимосвязи средневековых литератур Востока и Запада. М., 1974.
- 38. Сравнительное литературоведение: теоретический и исторический аспекты: Материалы международной конференции «Сравнительное литературоведение» (V Поспеловские чтения) / Ред. коллегия: П.А.Николаев, М.Л.Ремнёва, А.Я.Эсалнек. М., 2003.
- 39. Саидов У. Европа маърифатчилиги ва миллий уйғониш. Тошкент: Академия, 2004.
- 40. Сулаймонова Ф. Шекспир Ўзбекистонда. Тошкент: Фан, 1978.
- 41. Чернец Л.В. Литературные жанры (проблемы типологии и поэтики). М., 1982.
- 42. Эсалнек А.Я. Типология романа. М., 1991.
- 43. Pierre Brunel, Claude Pichois, André Michel Rousseau. Qu'est-ce que la Littérature Comparée ? Armand Colin. Paris, 2006.
- 44. Comparative Literature in an Age of Globalisation. The Johns Hopkins University Press, 2006.
- 45. Fin d'un millénaire. Rayonnement de la littérature comparée, textes réunis par Pascal Dethurens et Olivier Henri Bonnerot. Strasbourg: Presse Universitaire de Strasbourg, 2000.
- 46. Comparative Literature in an Age of Multiculturalism, dir. Charles Bernheimer. Baltimore: The Johns Hopkins University Press, 1995.
- 47. Clemens R. J. Comparative Literature as Academic Discipline. A Statement of Principles, Praxis, Standards. New York: The Modern Language Association of America, XXII.

Internet saytlari

- 1. https://www.ziyouz.uz
- 2. https://www.e.adabiyot
- 3. https://www.khurshid.davron.uz
- 4. https://www.kitobxon.com
- 5. https://www.tashgiv.uz
- 6. https://cyberleninka.ru
- 7. https://www.cairn-int.info/journal-revue-de-litterature-comparee.htm
- 8. https://www.imli.ru

- 9. https://www.elle.ru/stil-zhizni/books/mirovaya-klassika
- 10. http://elibrary.ru/
- 11. http://www.philology.ru/
- 12. http://biblioclub.ru/
- 13. http://www.tmnlib.ru/ http://znanium.com

QIYOSIY ADABIYOTSHUNOSLIK YOʻNALISHIDAGI ILMIY ISHLAR

(oʻzbek adabiyotshunosligida, xronologik tartibda)

- 1. Владимирова Н. Некоторые вопросы художественного перевода с русского языка на узбекский язык. Автореф. дисс... к.ф.н. Ташкент. 1957.
- 2. Клименко А.А. К вопросу об украинско-узбекских литературных связах. Дисс... канд. филол. наук. Ташкент, 1967. С.117.
- 3. Мирзоев А. Фоний ва Хофиз // Навоий ва адабий таъсир масалалари. Тошкент: Фан, 1968. Б.53 62.
- 4. Гафурова Р. Развитие перевода в Узбекистане. Ташкент: Фан, 1973.
- 5. Очилов Э. Немис поэзиясидан ўзбек тилига таржиманинг баъзи масалалари. Филол. фан. номз... дисс. Тошкент, 1974.
- 6. Отабекова А. Принципы передачи своеобразия узбекской поэзии в русских переводах. Дис... к.ф.н. Ташкент, 1975.
- 7. Каримов Н. Пушкин ва ўзбек шеърияти. Тошкент: Фан, 1980.
- 8. Намазов Н. Узбекско-русские литературные связи (Х.Алимджан и А.Толстой). Дисс... к.ф.н. Самарканд, 1981.
- 9. Якубов С.Б. К проблеме взаимовлияния и взаимообогашения литератур на основе материалов литературных связей Узбекистана и Германской Демократической Республики, 1960 1975 гг. Автореф. дисс... канд. филол. наук. Ташкент, 1981. С.18.
- 10. Сотимов У. Немис адабиётида Бобур ва Алишер Навоий ижоди // Адабий мерос. 1984. №2. Б.63 64.
- 11. Вохидов Р. «Мажолис ун-нафоис» таржималари. Тошкент: Фан, 1984
- 12. Исхоков Ё. «Хамса» поэтикасининг баъзи масалалари // Ўзбек тили ва адабиёти. 1985. №1. Б.10 15.
- 13. Олимов С.Х. Проблемы воссоздания и трансформации поэтических фигур в переводе произведений Алишера Навои. Дисс... канд. филол. наук. Ташкент, 1985.

- 14. Хамраев Х.К. Воссоздание национального колорита произведений узбекской советской прозы во французских переводах (на материале произведений Айбека и А.Каххара). Дисс... к.ф.н. Ташкент, 1988.
- 15. Сотимов У. Исследования жизни и творчества Алишера Наваи в западноевропейском востоковедении. Дисс... докт. филол. наук. М., 1988.
- 16. Сотимов У. Навоий хусусида академик А. Курелла фикрлари // Гулистон. 1990. №7. Б.8 9.
- 17. Холбеков М. Узбекско-французские литературные взаимосвязи (в контексте перевода, критики и восприятия). Дис... д.ф.н. Ташкент, 1991.
- 18. Джураев К. Сопоставительное изучение поэтических переводов в контексте межлитературных и межфольлорных связей. На материале русских переводов «Хамсы» А. Навои и узбекского эпоса «Алпамыш»«. Дисс... докт. филол. наук. Ташкент, 1991.
- 19. Умурова Г. Зулфия ижоди ва рус адабиёти. Ф.ф.н... дис. автореф. Тошкент, 1993.
- 20. Очилов Э. XX аср француз шеърияти ўзбек тилида (таржимада мазмун ва шакл бирлиги масаласи). Филол. фан. номз... дисс. Тошкент, 1994.
- 21. Каримов Р. «Бобурнома» даги шеърлар хорижий таржимасининг киёсий тахлилидан. Филол. фан. номз... дисс. Тошкент, 1994.
- 22. Рустамов Э. Некоторые вопросы сравнительного изучения узбекской литературы XV века с другими восточными литературами. Дис... д.ф.н. Ташкент, 1996.
- 23. Шамусаров Ш. Историко-сравнительный анализ арабского и узбекского фольклора. Дис... д.ф.н. Ташкент, 1997.
- 24. Абдуллажонов А. Навоий лирикаси бадииятини немисча таржималарида қайта яратиш ва татбиқ этиш. Филол. фан. номз... дисс. Ташкент, 1998.
- 25. Қосимов А. Адабиётда болалик маънавий-ахлоқий категория сифатида (А. де Сент-Экзюперининг «Кичкина Шаҳзода» ва Ч.Айтматовнинг «Оқ кема» асарлари асосида). Филол. фан. номз... дисс. Тошкент, 1999.
- 26. Бакаева М. Англия, АҚШ адабиётидан ўзбек тилига шеърий таржима ва қиёсий шеършунослик муаммолари. Филол. фан. докт... дисс. Тошкент, 2004.

- 27. Ҳамроева Д. Боборахим Машраб ғазаллари поэтикаси. Филол. фан. номз... дисс. Тошкент, 2005. 136 б.
- 28. Қурамбоева Г. Миртемирнинг «Қорақалпоқ дафтари» туркуми ва ўзбек қорақалпоқ адабий алоқаларнинг тараққиёти. Филол. фан. номз... дисс. Нукус, 2005.
- 29. Абдуллаева Р. Ғарб олимлари Навоий ва Бобур ижоди ҳақида // Ўзбек тили ва адабиёти. 2007. №1. Б.40 45.
- 30. Қосимов А. Типологик ўхшашликлар ва ўзаро таъсирнинг назарий муаммолари (А.де Сент-Экзюпери ва А.Камю ижоди мисолида). Филол. фан. докт... дисс. Тошкент, 2007.
- 31. Сайдалиев Т. Бобур лирикаси бадииятининг русча таржималаридаги талқини. Филол. фан. номз... дисс. Тошкент, 2007.
- 32. Сидиқов Қ. «Қутадғу билиг» асарининг инглизча бадиий таржималари тадқиқи. Филол. фан. номз... дисс. Тошкент, 2009.
- 33. Хаққул И. Ижод иқлими // Шекспир машъали. Тошкент: Фан, 2009.
- 34. Маматқулова Х.А. Алишер Навоий ва Вильям Шекспир ижодида бадиий тамойиллар муштараклиги ва ўзига хослик («Лайли ва Мажнун» достони ҳамда «Ромео ва Жульетта» трагедияси мисолида). Филол. фан. номз... дисс. Тошкент, 2009.
- 35. Шарафиддинова М.О. Особенности поэтики узбекского романа XX века в контексте мировой художественной традиции. Дисс... док. филол. наук. Тошкент, 2010. 284 б.
- 36. Сирожиддинов Ш. Алишер Навоий манбаларининг қиёсий-типологик текстологик таҳлили. – Тошкент: Akademnashr, 2011.
- 37. Сирожиддинов Ш., Одилова Г. Бадиий таржима асослари. Тошкент: Мумтоз сÿз, 2011.
- 38. Бабаева С.Р. Сравнительно-типологические исследования произведений М.Твена и Г.Гуляма. Филология и искусствоведение // Вестник ЧГПУ. 2011. – С.175 – 182.
- 39. Одилова Г. Инглиз ва ўзбек мумтоз шеърияти таржималарида адекватлик муаммолари. Филол. фан. докт... дисс. Тошкент, 2011.
- 40. Халлиева Г.И. XX рус шарқшунослиги ўзбек мумтоз адабиёти тадқиқи. Филол. фан. докт... дисс. Тошкент, 2016.
- 41. Тоджиходжаев М. Ўзбек адабиёти намуналари Мартин Хартманн таржимаси ва талқинида. Тошкент: Баёз, 2016. 180 б.
- 42. Жўракулов У. Алишер Навоий «Хамса» сида хронотоп поэтикаси. Филол. фан. докт... дисс. Тошкент, 2017. 264 б.

- 43. Ҳасанова Ш.С. Тўтинома ва Куш тили туркумидаги асарларнинг киёсий-типологик ва текстологик тадқиқи. Филол. фан. докт... дис. Тошкент, 2017.
- 44. Мирзаева З.И. XX аср ўзбек адабиётининг Америкада ўрганилиши. Филол. фан. докт... дис. Тошкент, 2017.
- 45. Камилова С.Э Развитие поэтики жанра рассказа в русской и узбекской литературе конца XX начала XXI века. Дис... д.ф.н. Ташкент, 2016.
- 46. Ширинова Р.Х. Олам миллий манзарасининг бадиий таржимада қайта яратилиши. Филол. фан. докт... дис. Тошкент, 2017.
- 47. Тешабоева 3. «Бобурнома» инглизча таржималаридаги фразеологик бирликлар ва уларнинг миллий маданий хусусиятлари. Филол. фан. докт... дис. Тошкент, 2017.
- 48. Холиқов Б.А. Детектив романларда воқеликнинг бадиий талқинини тизимли моделлаштириш (Марио Пьюзонинг «The Godfather» ва Тохир Маликнинг «Шайтанат» асарлари мисолида). Филол.фан. бўйича фалс.докт.(PhD) дисс... Тошкент, 2018.
- 49. Тоирова Н.И. Бадиий адабиётда кўзгу ва сурат рамзларининг ғоявий-эстетик вазифалари (Омон Мухтор ва Оскар Уайльд асарлари асосида). Филол.фан. бўйича фалс.докт.(PhD) дисс...—Тошкент, 2018.
- 50. Сапаева Ф.Д. Махтумқули шеърларининг ўзбекча таржималари қиёсий таҳлили. Филол.фан. бўйича фалс.докт.(PhD) дисс... Тошкент, 2018.
- 51. Хажиева Ф.М. Биографик роман жанри хусусиятлари (И.Стоун, М.Қориев ва Н.Норматов асарлари асосида). Филол.фан. бўйича фалс.докт.(PhD) дисс... Тошкент, 2018.
- 52. Салимова Д. Шеърий таржимада муаллиф бадиий нияти ва поэтик махоратининг қайта ифодаланиши (Ғафур Ғулом ва Ойбек шеърларининг таржималари мисолида). Филол.фан. бўйича фалс.докт.(PhD) дисс... Тошкент, 2018.
- 53. Якубов И. Мустақиллик даври ўзбек романлари поэтикаси. Филол. фан. докт... дисс. Тошкент, 2018.
- 54. Хошимова Д. «Бобурнома» матнидаги тасвирий воситаларнинг инглиз тилига таржималари тадқиқи. Филол. фан. докт... дисс. Тошкент, 2018.
- 55. Дадабоев О.О. Ғарб ва Шарқ адабий контекстида Амир Темур шахси талқини. Филол.фан. бўйича фалс.докт.(PhD) дисс... Тошкент, 2019.

- 56. Жўраев Ж.О. Шарафиддин Али Яздийнинг «Рисолаи муаммо»си текстологик ва қиёсий-типологик тадқиқи. Филол. фан. док... дисс. Тошкент, 2019
- 57. Исмоилов И.А. Алишер Навоий «Садди Искандарий» достонининг қиёсий таҳлили. Филол.фан. бўйича фалс.докт.(PhD) дисс... Тошкент, 2019.
- 58. Суванов 3. Тоғай Мурод насрида образлар поэтикаси. Филол. фан. бўйича фалс.докт.(PhD) дисс... Тошкент, 2019.
- 59. Юсупова Д. Темурийлар давридаги арузга доир рисолаларнинг киёсий тахлили. Монография. Тошкент: Ta'lim-media, 2019.
- 60. Умурзоқов Б.С. Алий Сафийнинг илмий-адабий мероси ва унинг «Рашахот айну-л ҳаёт» асарининг қиёсий-типологик тадқиқи. Филол.фан. бўйича фалс.докт.(PhD) дисс... Тошкент, 2019.
- 61. Султанов Т.И. Алишер Навоий ва Озарбойжон адабиёти: тарихий илдизлар, анъаналар, ворисийлик (Кишварий ва Содикий асарлари мисолида). Филол.фан. бўйича фалс.докт.(PhD) дисс... Тошкент, 2020.
- 62. Қурбонов П.А. Байрон ижодида Шарқ ва шарқона мотивлар тавсифи (қиёс ва таржима) Филол.фан. бўйича фалс.докт.(PhD) дисс...-Т.,2020
- 63. Тоджиходжаев М. Ўзбек мумтоз адабиёти намуналари Мартин Хартманн таржимаси ва талқинида. Филол.фан. бўйича фалс. докт.(PhD) дисс...Тошкент, 2020.
- 64. Садиқов З.Я. Юсуф Хос Ҳожиб «Қутадғу билиг» асарининг немисча ва инглизча таржималари қиёсий таҳлили. Филол.фан. бўйича фалс.докт.(PhD) дисс... Тошкент, 2020.
- 65. Абдуллаева Р Немис-ўзбек адабий алоқаларининг шаклланиши, тараққиёт тарихи ва илмий асослари (адабий алоқа, таржима ва таъсир масалалари). Филол. фан. докт... дисс. Тошкент, 2020.
- 66. Маткаримова С. Анъана, янгилик ва бадиий махорат (Хоразм шоирлари ижодида Навоий анъаналари мисолида). Филол. фан. докт... дисс. Тошкент, 2020.
- 67. Қобилова Н.С. Жек Лондон ва Абдулла Қахҳор ижодида бадиий психологизм. Филол.фан. бўйича фалс.докт.(PhD) дисс...– Тошкент, 2020

MUNDARIJA

Kirish	3
Filologik komparativistika: mazmuni va mohiyati	6
Adabiy komparativistikaga xos xususiyatlar	
Qiyosiy adabiyotshunoslik fan sifatida	11
Qiyosiy tahlilning ilmiy-nazariy asoslari va prinsiplari	14
Qiyosiy tahlilning vazifalari	16
Qiyoslash jarayonidagi eng muhim bosqichlar	18
Qiyoslanishi mumkin boʻlgan tipik vaziyatlar	19
Qiyosiy tahlil metodologiyasi	23
Qiyoslash natijalarini baholashning mezonlari	27
Qiyosiy tahlil natijalarining xolisligini ta'minlash shartlari	28
Tarjima – qiyosiy adabiyotshunoslik obyekti sifatida	30
Tarjima nazariyasiga oid muhim tushunchalar:	31
Asar poetikasi – komparativistika obyekti	37
Adabiyotlararo jarayonlarning shakllari	42
Oʻzbek adabiyotshunosligida qiyosiy tadqiqotlar	53
Oybek va jahon adabiyoti	55
Ishq, dard va isyon shoiri	67
«Xamsa» obrazlar tizimida «oshiq», «ma'shuqa», «raqib» uchligi	71
Bahrlar va ulardan hosil boʻluvchi vaznlar qiyosi	84
Biografik romanda gʻoya va kompozisiyaning qiyosiy talqini	90
Jek London va Abdulla Qahhor ijodida badiiy psixologizm	100
Omon Muxtor va Oskar Uayldning badiiy-estetik olami	105
Alisher Navoiy va Vilyam Shekspir ijodida badiiy tamoyillar	
mushtarakligi va oʻziga xoslik	111
«Boqchasaroy fontani» poemasi va Mirtemir ijodi	116
She'riy talqinda ekvivalent va adekvat yondashuv	119
«Saddi Iskandariy» (Navoiy) va «Iskandarnoma» (Nizomiy)	
debochalari	129
Alisher Navoiy ijodining Ozarboyjon adabiyotiga ta'siri	134
Mustaqil izlanish uchun mavzular	138
Komparativist olimlar	140
Glossariy	146
Adabiyotlar roʻyxati	149

Ilmiy-ommabop nashr

Gulnoz Xalliyeva

QIYOSIY Adabiyotshunoslik

Muharrir: Abdulla SHAROPOV Badiiy muharrir: Bahriddin BOZOROV Texnik muharrir: Dilshod NAZAROV Sahifalovchi: Inomjon OʻSAROV Musahhih: Mahfuza IMOMOVA

Nashriyot litsenziyasi: AI №134, 27.04.2009
Terishga berildi: 18.12.2019-y.
Bosishga ruxsat etildi: 14.12.2020-y.
Ofset qogʻozi. Qogʻoz bichimi: 84x108 ½.
Hisob-nashriyot t.: 6,8. Shartli b.t.: 8,4.
Adadi: 500 nusxa.
Buyurtma №

«AKADEMNASHR» nashriyotida tayyorlandi. 100156, Toshkent shahri Chilonzor tumani 20^A-mavze 42-uy.

> Tel.: (+99871) 217-16-77 e-mail: info@akademnashr.uz web: www.akademnashr.uz

«PRINT LINE GROUP» XK bosmaxonasida chop etildi. 100096, Toshkent shahri Bunyodkor shohkoʻchasi 44-uy.